

上饒縣志卷之十九

人物志

鍾地氣靈稟生民秀樹立挺然不為俗囿扶世維世實惟  
偉人出處窮達罔弗見真厥有專長亦克自見明德馨香  
跂茲俊彥志人物

理學

宋

王時敏

詳後鄉賢

余大雅

詳後鄉賢

陳文蔚

詳後鄉賢

上饒縣志 卷十九 理學

余大猷字方叔大雅弟也借其兄大雅及同里陳文蔚游於

朱子之門朱子示以虛心平氣見理精審之功恪守師訓

學力精進其後朱子致書文蔚曰方叔曾相見否方叔看

得道理儘自穩實又文蔚與方叔倡和詩有坐談冰雪滿


懷秋珍重口君學素優之句其見稱於師友如此

採朱子類編陳

克齋文集暨余氏家譜增

按前志余大雅傳附錄陳克齋所撰墓碣中有與弟大

猷從其所師相繼而往語考朱子類編有與克齋書嘉





許大猷甚至克齋文集亦有推重大猷韻語不知前後志何以不爲立傳也豈以類編第三卷旁注順昌人故歟大雅大猷皆注順昌人曷爲獨遺大猷豈大雅以祀鄉賢祠錄而大猷以旁注遺歟不知類編係朱子十六代孫朱玉所訂世遠年湮難於考核或當日兄弟曾從遊於順昌遂訛傳爲其地人亦未可知是旁注固不足據耳且一兄弟也錄大雅則採類編語而不據旁注遺大猷則據旁注而不取類編語可乎謂不在祀典不錄而自唐宋以來祀典外諸傳林立獨遺大猷可乎是又

上饒縣志

人物 理學

二

卷十九

不免自亂其例矣至大雅崇祀府縣鄉賢世居上饒見於克齋所撰墓碣因同鄉余正叔得師朱子見於張時雨所撰克齋紀述中而墓在邑之裴原讀書廬在邑之雲巖族裔在邑之上瀘又鑿鑿不誣通志暨郡邑志旣皆載爲上饒人不必贅論然亦可徵朱玉旁注順昌人之訛也茲因增大猷傳而爲詳辨之焉

以上前志

徐斯遠字文卿抱道自守不求聞達葉水心評其文集有鋪寫縱送體勢各成詩險而肆對面崖壑咫尺千里又云初渡江時上饒號稱賢俊所聚如漢許下晉會稽焉風流幾



泯議論將絕斯遠與趙昌父韓仲止扶植遺緒以文達志  
為後生法

文獻  
通考

按朱子門人有斯遠名而詩文又見稱於葉氏今志中  
王有道墓碣文是其手筆亦可以得其槩云

舊志

元

劉光字自謙延祐進士授翰林編修少承家學一時名士爭  
與之遊稱之曰泉山先生祖養拙受學黃勉齋得居敬窮  
理之要號白石先生光因創白石書院祀朱文公而配以  
勉齋又建義塾置義田以贍鄉子弟之來學者朝廷嘉其

上饒縣志

人物 理學

三

卷十九

行誼旌表其門

通志乾隆四十九年舊志

明

婁

諒

詳後  
鄉賢

婁忱字誠善幼有奇質落筆驚人不苟時好連不得志晚以  
歲貢授歸安訓導尋棄官歸憂其兄之所為托疾不下樓  
者十年戶部侍郎邵公二泉呼為樓上先生其兄死乃下  
樓國母之喪例投衰服忱獨力陳古義幾為宸濠捶死賴  
都憲王明陽解救得免卒以妃族被逮死獄非其罪也門

人夏尚樸為誌銘

舊志



鄉賢

唐

王貞白字有道靈溪人乾寧二年進士授校書郎先是崔凝  
典文衡不協士論上詔陸扆覆試武德殿貞白占優等授  
校書郎遭時不偶隱居教授以道學自任言論有典則動  
止合準繩士風因之丕變四方學者多宗師之有靈溪集  
行世祀府縣鄉賢祠

舊志

按信乘續葑貞白上饒人今祠永豐以墓在豐故耳集  
名靈溪靈溪在上饒二十里與豐不相涉且豐之分自

上饒縣志

人物 鄉賢

四

卷十九

上饒而貞白故居則在靈溪上下唐乾元析上饒為永  
豐元和復省入上饒然靈溪則在上饒也其自製田舍  
詩有云古今名利路只在儂門前至老不離家一生常  
晏眠牛羊歸自晚兒童戲野田豈思封侯貴惟只待豐  
年征賦不辭苦但願時官賢時官苟貪濁田舍生憂煎  
則貞白居上饒可知作永豐人誤

參原跋

又按容齋隨筆亦載貞白永豐人然唐末無此縣名自  
當從文獻通考作上饒人乾寧二年進士授校書郎林  
志西江詩話俱作祕書郎疑誤舊志謂遭時不偶隱居



教授本於林志所謂以道學自任者疑無所據然考姓源珠璣云貞白性恬順明易象昭宗狩於岐退居著述遂不復仕則亦未爲言大而夸也

舊志

宋

余堯弼字致勳政和進士初調衢州兵曹守李友聞以台輔器目之嘗曰兵曹風度絕類吾舅氏劉公劉公正夫也歷靜樂令餘干安仁公安丞皆有惠政知祁門務以德化人民服其德量指邑之祁山曰雖昇是寘公腹中不礙也高宗時爲御史中丞苟利於國或害於正知無不言除端明

上饒縣志

人物 鄉賢

五

卷十九

殿學士簽書樞密院事踰年參知政事嘗使金專對有體金主敬憚之未幾以忤秦檜乞解機務翛然林下與漁樵

伍者十有六年忘其貴且齒云祀府縣鄉賢祠

通志府前志

按堯弼家乘載勅建屋在城西今子孫居南鄉上瀘由

宋迄今衣冠不替實信之望族云

舊志

又按朱子全書題名錄內載高宗紹興十八年戊辰科堯弼以殿中侍御充考試官朱子中第五甲九十名進

士而知貢舉則弋陽周執羔也

府志

施師黜字聖與十歲通六經十二能文弱冠遊大學試每在



前列司業高宏稱其文深醜有古風尋授以學職以舍選  
奉廷對調復州教授未上丁內艱服除爲臨安府教授乾  
道元年陳康伯薦賜對言歷年屢下詔恤民而惠未加浹  
陛下軫念惟恐一夫失所郡邑搜求惟恐財賦不集無惑  
乎日降絲綸恩不沾被細民旣困於倍輸又困於非法重  
以歲惡室且垂磬租不如期積多逋負今明堂肆赦戶自  
四等以下逋自四年以前願悉除免上曰非卿不聞此言  
詔從之八年兼權禮部侍郎除給事中時太子詹事已除  
上又特令增員爲二命兼之賜對言比年人物飢餓土氣

上饒縣志

人物 鄉賢  
卷十九

六

耗穊當廣儲人才以待用上曰觀卿所奏公輔器也假翰  
林學士知制誥兼侍讀使金致命金廷立班旣定相儀者  
以親王將至命師黜退位師黜屹立相儀者請數四師黜  
正色曰班立已定尙欲何爲不肯少動在廷相顧駭愕知  
其有守不敢復以爲請九年使還有言其事於上者上嘉  
嘆不已及後金使賀正旦至關問館伴師黜今居何官館  
伴宇文介於班列中指師黜以示之金使恍然曰一見正  
人令人眼明十年除端明殿學士簽書樞密院事入奏控  
免上曰卿靖重有守識慮深遠朕欲用卿久矣復詔兼參



知政事除參知政事兼同知樞密院事師點嘗同宰相奏事退復同樞密周必大進呈上曰適一二事卿等各陳所見甚關大體前此宰相奏事執政不措辭今卿等如此深副所望必大奏祖宗時宰執奏事自相可否或至面相切責退不相啣自秦檜用事執政畏避不敢言陛下虛心兼聽若只宰相奏事何用執政爲師點復奏臣敢不竭股肱之力上因諭之曰朕欲天下事日往來胸中未嘗釋也先是州郡上供或不以時進立歲終稽考法及是主計臣有喜爲督促者乞不待歲終先期行之畫命已下師點矍然

上饒縣志

人物 鄉賢 卷十九

曰此策若行上下逼殍民不聊生或謂令已出矣師點曰事有爲天下病惟恨更之不速卽追寢其議樞密周必大舉手賀師點曰使天下赤子不被其毒者公之賜也一日入對後殿上曰朕前飲冰水過多忽慕下幸卽平復師點曰自古人君當無事時快意所爲忽其所當戒其後未有不悔者上深然之十三年辭兼同知樞密院事權提舉國史院權提舉國朝會要十四年除知樞密院事師點惓惓搜訪人才手書置夾袋中謂蜀去朝廷遠人才難以自見蜀士之賢者俾各疏其所知差次其才行文學每有除授



必列陳之五年春以資政殿大學士知泉州除提舉臨安府洞霄宮紹興二年除知隆興府江西安撫使師黠嘗謂諸子曰吾平生仕宦皆任其升沉初未嘗容心其間不枉道附麗獨人主知之遂至顯用夫人窮達有命不在巧圖惟忠孝乃吾事也三年得疾薨年六十九贈金紫光祿大夫見宋史所著有奏議十卷制藁八卷東宮講義五卷易說四卷史識五卷文集八卷祀府鄉賢縣忠義祠前志

王時敏字德修屏門里人學有源流兼該體用嘗從呂東萊遊與朱子友善教授鄉里培植後進維持斯文有大儒風

上饒縣志

人物 鄉賢 卷十九

八

所著師說語孟中庸大學說并雜文若干卷卒葬本都湖潭朱子爲作墓誌哭以詩曰不到湖潭二十年湖潭依舊

故山川聊將杯酒奠青草風雨蕭蕭憶昔賢祀府縣鄉賢

祠 通志府前志

余大雅字正叔德性和粹器量宏遠而於爲善尤力初丁外艱自繩以禮不御酒肉者五年聞朱子講學閩中毅然往師之志道懇惻問難叩擊疊疊不倦揆諸心一毫有未得雖往返十數不置必期於釋然而後已朱子嘉其勤每竭兩端以告焉畧見文集中答余大雅書嘗呈朱子以詩云



三見先生道愈尊言提切切始能安如今決破本根說不作從前料想看有物有恆須自盡中倫中慮覺尤難願言克己工夫熟要得周旋事仰鑽詩見朱子語類惜平居問答皆厄於燬僅存語錄刻於江東庾臺祀府縣鄉賢祠通志

舊志

按先生世居上瀘其後裔猶嘉至今能守其訓讀其書凡雲巖故址經理如新猶可想見其遺風焉舊志

陳文蔚字才卿從學朱子洙泗淵源多深造而自得之著書立言俱得朱子旨趣如論中庸戒懼謹獨二事及大學誠

上饒縣志

人物 鄉賢 卷十九

九

意之說甚為朱子稱服後朱子註儀禮諸書又謂相去之遠以不得賢者之助為恨手書往復論正多契合焉所作州學修禮器記亦推尊朱子儀式而損益之隱居邱園屢聘不起聚徒講學以斯文自任所著述多見於四書集成有克齋文集行世祀府縣鄉賢祠通志前府志

附張時雨紀述一則先生因同鄉余正叔得師朱子其學以求誠為本以躬行實踐為從事先加意於學問思辨所友若徐子顏即朱子所云一室蕭然有以自樂令人敬嘆者吾鈴徐子融志氣剛決勇於求道其切磋尤



詳他如吳伯豐李敬予諸君子一時唱和豫章之學爲不孤云隱居邱園屢聘不起聚徒講學以斯文自任鄉邦尊仰之居恆雅慕邵康節先生性情吟咏每與相近宜其芥視名位而不顧也所最盡心者莫如養志而尊人竹林翁壽九十四而終人以爲孝行所感召子若孫能世其學尤爲孝義之族賢者有後竟不誣矣其見許於朱子者詳性理大全朱子大全故不贅如門人徐元杰每嘗往來問答書啟蠹蝕難以刻紀姑掇拾所見聞於此

舊志

上饒縣志

人物 鄉賢

十

卷十九

徐元杰字伯仁幼穎悟誦書日數千言每冥思精索聞陳文蔚講學鉛山實朱熹門人往師之後師事真德秀紹定五年進士及第簽書鎮東軍節度判官廳公事嘉熙二年召爲祕書省正字遷校書郎奏否泰剝復之理因及右轄久虛非骨鯁耆艾身足負荷斯世者不可輕易又言皇子茲當置後及蚤立太子乞蚤定大計時諫官蔣峴方力排竑置後之說遂力請外不許卽謁告歸丐祠章十二上三年遷著作佐郎兼兵部郎官以疾辭差知安吉州辭召赴行在奏事辭益堅淳祐元年差知南劍州會峽陽寇作擒渠



魁入人斬之餘釋不問父老或相語曰侯不來我輩魚肉  
矣郡有延平書院率郡博士會諸生親爲講說民訟率呼  
至以理化誨多感悅而去輸苗聽其自槩闔郡德之丁母  
憂去官眾遮道跪留既免喪授左司郎官敵國外患乞以  
宗社爲心言錢塘駐蹕驕奢莫尙宜抑文尙質兼崇政殿  
說書每入講必先期齋戒嘗進仁宗詔內降指揮許執奏  
及臺諫察舉故事爲戒語多切宮壺拜將作監進楊雄大  
匠箴陳古節儉時天久不雨轉對極論洪範天人感應之  
理及古今遇災修省之實辭益忠懇丞相史嵩之丁父憂

上饒縣志

人物 鄉賢

十一

有詔起復中外莫敢言惟學校士叩闥力爭元杰時適輪  
對言臣前日晉侍經筵親承聖問以大臣史嵩之起復臣  
言陛下出命太輕人言不可沮抑陛下自盡陛下之禮大  
臣自盡大臣之禮玉音賜俞臣又何所容喙今觀學校之  
書使人感嘆且大臣讀聖賢之書畏天命畏人言家庭之  
變哀戚終事禮制有常臣竊料其何至於忽送死之大事  
輕出以犯清議哉前日朝廷出命之易士論所以凜凜者  
實以陛下爲四海綱常之主大臣身任道揆扶翊綱常者  
也自聞大臣有起復之命雖未知其避就若何凡有父母



之心者莫不失聲涕零是果何爲而然人心天理誰實無之興言及此非可使聞於鄰國也陛下烏得而不悔悟大臣烏得而不堅忍臣懇懇納忠敢詆特爲陛下愛惜民彝爲陛下愛惜名節而已疏出朝野傳誦帝亦察其忠亮每從容訪天下事經筵益申前議未幾夜降御筆黜四不才臺諫起復之命遂寢元老舊德次第收召元杰亦兼右司郎官拜太常少卿兼給事中國子祭酒權中書舍人杜範入相復延議軍國事爲書無慮數十所言皆朝廷大政邊鄙遠慮每裁書至合隱憂處輒閣筆揮涕書就隨削藁雖

上饒縣志

人物 鄉賢  
卷十九

十三

子弟無有知者六月朔輪當侍立以暴疾謁告特拜工部侍郎隨乞納祿詔轉一官致仕夜四鼓遂卒先元杰未死之一日方謁左丞相范鍾歸又折簡察院劉應起將以翼日奏事是夕俄熱大作詰朝不能造朝夜煩愈甚指爪忽裂以死朝紳及三學諸生往弔相顧駭泣訃至帝震悼曰徐元杰前日方侍立不聞有疾何死之遽耶亟遣中使問狀賻贈銀絹二百計已而大學諸生伏闕懇其爲中毒且曰昔小人有傾君子者不過使之自死於蠻烟瘴雨之鄉今蠻烟瘴雨不在嶺海而在朝廷望奮發睿斷大明典刑



於是三學諸生相繼叩閤訟冤臺諫交疏論奏監官亦合辭聞於朝二子直諫直方乞以恤典充賞格有旨付臨安府逮醫者孫志寧及常所給使鞫治既又改理寺詔殿中御史鄭案董之且募告者賞緡錢十萬官初品大理寺正黃濤謂伏暑證二子乞斬濤謝先臣然獄迄無成海內人士傷之帝悼不已賜官田五百畝緡錢二千給其家賜諡

忠愍 規 朱 祀府鄉賢縣忠義祠

附宋史程公許一則程公許亟奏曰正月侍御史劉漢弼死四月右丞相杜範死六月右史徐元杰死漢弼之

上饒縣志

人物 鄉賢 卷十九

死固可疑範之死人言已藉藉然漢弼類風淫末疾範亦羸弱多病諉曰天命猶可也元杰氣體魁碩神采嚴毅議論英發甫聞謁告奄至暴亡口鼻四體變異之狀使人爲之雪涕不已六館諸生叩閤籲告陛下始命有司置獄鞫勘謂當於朝紳中選公正明決無所顧忌者專蒞其事盡情研究務使得實集議朝堂分列首從必誅無赦疏入不報物論沸騰臨安尹趙與篋奏乞置獄天府帝從之公許繳奏與篋乃嵩之死黨乞改送大理寺命臺臣董之詔殿中侍御史鄭案案回懦首鼠事竟



不自然公論莫不偉公許舊志

按四庫全書目錄載元杰棊埜集十一卷謂原本久佚

今從永樂大典錄出云云棊埜集舊志未載附識於此

徐宗仁字求心元杰族子也淳祐進士官國子監主簿開慶

元年上書極論邊事又論董宋臣盤固日久蒙蔽日深又

請有言責者皆得盡其言屢遷考功郎兼崇政殿說書國

史編修實錄院檢討德祐元年授吏部侍郎中書門下檢

正諸房公事權禮部尚書兼益王府贊讀衛益王走海上

厓山敗死焉宋史論曰宗仁國亡與亡與枋得欽崎以全

上饒縣志

人物 鄉賢 卷十九

古

臣節皆宋末之卓然者也見宋史 祀府鄉賢祠

按宗仁號芳溪追諡忠肅舊互載永豐今考宋史及家

譜補人舊志

明

婁諒字克貞少有志絕學聞吳與弼在臨川往從之一日與

弼治地召諒往視云學者須親細務諒素豪邁由此折節

雖掃除之事必身親之景泰四年舉於鄉天順末選為成

都訓導尋告歸閉門著書成日錄四十卷三禮訂訛四十

卷謂周禮皆天子之禮為國禮儀禮皆公卿大夫士庶人



之禮爲家禮以禮記爲二經之傳分附各篇如冠禮附冠儀之類不可附各篇者各附一經之後不可附一經者總附二經之後其爲諸儒附會者以程子論黜之著春秋本意十二篇不採三傳事實言是非必待三傳而後明是春秋爲棄書矣其學以收放心爲居敬之門以何思何慮勿忘勿助爲居敬要旨然其時胡居仁頗譏其近陸子後羅欽順亦謂其近似禪學云子忱字誠善傳父學女爲寧王宸濠妃有賢聲嘗勸王母反王不聽卒反諒子姓皆捕繫遺文遂散軼矣

見明史

祀府縣鄉賢祠

上饒縣志

人物 鄉賢 卷十九

按胡羅一大儒之說皆以新建伯從學故乃明記綱目則以爲守仁少時受諒朱子格物致知之學則致良知之說非諒說也據綱目附誌之

以上前志

婁謙字克讓成化進士任御史嘗督南畿陝西學政以躬行實踐爲教士類風動時汪直新貴能禍福人謙絕不與接銜之使邏校伺察竟莫間陞四川左布政使提調鄉試事監臨以下重其素望較錄諸務盡歸之以勞苦觸疾而卒

祀府縣鄉賢祠

通志府前志

楊時喬字宜遷號邱菴嘉靖四十四年進士除工部主事權



稅杭州令商人自署所入輸之有司無所預隆慶元年冬  
上時政要務言幾之當慎者三以日勤朝講爲修德之幾  
親裁章奏爲出令之幾聽言能斷爲圖事之幾弊之最重  
者九曰治體怠弛曰法令數易曰賞罰無章曰用度大繁  
曰鬻官太濫曰莊田擾民曰習俗侈靡曰士氣卑弱曰議  
論虛浮勢之偏重者三宦寺難制也宗祿難繼也邊備難  
振也疏入帝衷納中外傳誦焉擢禮部員外郎遷南京尙  
寶丞萬厯初以養親去服除起南京太僕丞復遷尙寶移  
疾歸時喬雅無意榮進再起再告闕十七年始薦起尙寶

上饒縣志

人物 鄉賢

六

卷十九

卿四遷南京太常卿疏請議建文帝諡祠祀死節諸臣就  
遷通政使秩滿連章乞休不允三十一年冬召拜吏部左  
侍郎時李戴已致仕時喬至卽署部事絕請謁謝交遊止  
宿公署苞苴不及門及大計京朝官首輔沈一貫欲庇其  
所私憚時喬方正將令兵部尙書蕭大亨主之次輔沈鯉  
不可而止時喬乃與都御史溫純力鋤政府私人若給事  
中錢夢皋御史張似渠于永清輩咸在察中又以年例出  
給事中鍾兆斗於外一貫大溫蜜言於帝畱察疏不下夢  
皋亦假楚王事再攻郭正域謂主察者爲正域驅除帝意



果動特留夢皋已盡留科道之被察者而嚴旨責時喬等  
報復時喬等惶恐奏辨請罷斥帝不問夢皋既留遂合兆  
斗累疏攻純并侵時喬時喬求去已而員外郎賀燦然請  
斥被察科道亦詆純挾權鬪捷顧獨稱時喬又言陛下睿  
斷躬操非閣臣所能竊弄意蓋爲一貫解時喬以與純共  
事復疏請貶黜不報及純去夢皋兆斗亦引歸帝復降旨  
譙讓謂祖宗朝亦常留被察科道何今日揣疑君父誣詆  
輔臣因責諸臣朋比令時喬策勵供職而盡斥燦然及劉  
元珍龐時雍輩時喬嘆曰主察者逐爭察者亦竄矣尙何

上饒縣志

人物 鄉賢

十七

卷十九

覲顏居此乎九疏引疾竟不得請時中外缺官多不補而  
羣臣養病省親給假及建言註誤被譴者克滿林下卒不  
獲召時喬乃備列三百餘人三疏請錄用三十四年皇長  
孫生有詔起廢時喬復列上遷謫鄒元標等九十六人削  
藉范雎等一百十八帝卒不省明年大計外吏時喬已偕  
副都御史詹沂受事居數日帝忽命戶部尙書趙世卿代  
時喬遂中輟蓋去冬所批察疏至是誤發之也輔臣朱賡  
謂非體立言於帝帝亦覺其誤卽日收還時喬堅辭不肯  
任吏科陳治則劾其怨懟無人臣禮有旨詰責時喬乃再



受事永年伯王棟卒其子明輔請襲時喬以外戚不當傳世固爭之弗聽時一貫已罷言路爭擊其黨而李廷機者一貫教習門生也閣臣闕眾多推之惟給事中曹於汴宋一韓御史陳宗契持不可時喬卒從眾議未幾黃汝良全天敘爲侍郎諸攻一貫者益不悅給事中王元翰胡忻遂交劾時喬時喬疏辨力求罷當是時帝委時喬銓柄又不置右侍郎一人獨理部事銓敘平允然堂陛扞格曠官廢事日甚一日中朝議論方囂動見掣肘時喬官位未崇又自溫純去久不置都御史益無以鎮壓百僚由是上下相

上饒縣志

人物 鄉賢

七

凌紀綱曰紊言路得收其柄時喬亦多委蛇議者諒其苦心不甚咎也秉銓凡五年最後起故尙書孫丕揚未至而時喬已卒篋餘一敝裘同列賻襚以殮詔贈吏部尙書諡端潔時喬受業永豐呂懷最不喜王守仁之學闢之甚力又惡羅汝芳官通政時具疏斥之曰佛氏之學初不溷於儒乃汝芳假聖賢仁義心性之言倡爲見性成佛之教謂吾學直捷不假修爲於是以傳註爲支離以經書爲糟粕以躬行實踐爲迂腐以綱紀法度爲桎梏踰閑蕩檢反道亂德莫此爲甚敕所司明禁用彰風教詔從其言

見明史 祀



府縣鄉賢縣忠義

按時喬所著書其名不一孫承澤四朝人物考所載則有南關權事周易諸經全文古今字韻全書人物志所載則有大學古本書經四書古今訓解禹碑釋四庫全書所載又有馬政紀

以上前志

王建中字懋德號信南子生八月而父逝母毛氏和丸課讀嘉端甲辰領鄉薦謁選得蜀蒲江令未幾丁大母憂起補潛江令潛故有水患乃築湯家等堤以障狂瀾至今賴之稍遷大興尹邑居輦轂下多親近貴人中至剔蠹釐奸無

上饒縣志

人物 鄉賢 卷十九

九

所撓中外懾服更市地建屋以棲貧民會臺省交章薦授比部郎慮囚關外推心平反全活無算擢知大理府抵郡即察滇俗之陋有以同姓為婚者首厲禁之歲例有樣金七十兩為太守壽即斥去日民輸金已不堪命安用此重股為因勒碑示後著為令民賴以蘇尋入覲解組歸自箴仕歷郡守清操終始不渝居官日布袍蔬食泊如也退休十餘年卒壽八十五有集行世祀府鄉賢祠

府前志

鄭邦福字羽夫號鐵耕隆慶進士授嵩明知州滇去信萬里江浙仕者多不樂福賦詩就道不以遠近介意至則修學



校課農桑政尚寬大滇人德之陞水部司副轉刑曹郎奉使恤楚囚讞獄多所平反賴全活者眾尋補福建僉事遷粵東兵備時海氛方訖福至嚴斥堠謹偵邏備禦有方人倚爲重以奏最晉南岡卿至江省會疾作卒於道生平善詩歌及古文詞尤工草書所著有采真遊蓮花國若干卷

行於世

見府前志

祀府鄉賢祠

前志

王夢陽字鼇磯萬厯進士授安慶府推官剛正不撓斷獄平允時郡有虎食人夢陽爲文禱於神三日虎自斃自是郡無虎患一時稱爲宏農長者云治多異政以丁艱歸里尋

上饒縣志

人物 鄉賢 卷十九

三

卒祀府縣鄉賢祠

府前志

鄭以偉字子器號方水萬厯二十二年進士改庶吉士授檢討累遷少詹事泰昌元年官吏部右侍郎天啓元年光宗祔廟當祧憲宗大常少卿洪文衡以睿宗不當入廟請祧奉玉芝宮以偉不可而止論者卒是文衡尋以左侍郎協理詹事府四年以偉直講筵與璫忤上疏告歸崇禎二年召拜禮部尚書久之與徐光啓並相再辭不允以偉修潔自好書過目不忘文章奧博而票擬非其所長嘗曰吾富於萬卷窘於數行乃爲後進所藐章疏中有何況二字誤



以爲人名也擬旨提問帝駁改始悟自是詞臣爲帝輕遂有館員須歷推知之論而閣臣不專用翰林矣以偉累乞休不允明年六月卒官贈太子太保御史言光啓以偉相繼沒蓋棺之日囊無餘貲請優卹以媿貪墨者帝納之乃諡光啓文定以偉文恪其後二年同安林鈺爲大學士半歲而卒亦有言其清者得諡文穆見明史所著有靈山藏懷玉藏明府藏山上山諸刻祀府鄉賢縣忠義祠

余桂萼號毓蟾宋樞密院使堯弼裔也萬曆戊子鄉薦初試

爲彭澤縣教諭持已方正爲教以禮讓廉耻爲先時湖口權

上饒縣志

人物 鄉賢 卷十九

三

稅厰閹李道勢炎當途他邑青矜多叩關請謁惟萼與諸生約有赴厰投刺者非吾徒也當以蕩檢揭報故彭士獨全名節四年遷湖廣孝感知縣比至卽廉惠有聲嘗訪民間疾癘輒施藥以救貧民不濟則捐貲痊之孝人爲立祠祀名宦再遷巴州知州值歲歉民不得食卽捐俸買穀置厰設粥而遠近民賴全活者無算又加意勸學如彭澤時邑有寒士夏時亨者每夜讀篝燈達旦萼出巡夜屢見燈火熒然隨遣人訪知其貧輒分俸助讀饌其母如家人使無朝饗夕殮之慮亨果聯壽成進士一州稱爲知人在任



四年移疾歸歸聞人穿柱石巖石等山取灰爲害乃捐貲買贖永禁錐鑿里人至今受其庇芻自幼早孤伯父母待之甚篤及有成事伯父母如所生父母友愛其弟及姪教養婚配如所生同氣其生平廉以居官惠以濟人孝友睦嫻以訓其子弟三祀名宦再與賓筵至今家學相承稱遺武云祀府縣鄉賢祠

通志前府志增

按前志僅載桂萼成就夏時亭事而於前郡志及舊邑志所列處家孝友與居官慈惠實蹟概闕焉非惟剗削太甚亦覺輕重失倫茲悉仍原傳補載其訓士一條則據彭澤縣志名循傳增入庶幾先正風采備著而人祀鄉賢爲有徵焉他傳有增補者放此

以上前志

皇清

張思鏜號秋坪家素貧隨父讀書刻苦自勵自諸生以至成進士均以設帳爲生涯絕不干外事得館俸以承菽水歡母氏極嚴能先意承旨父衰病侍湯藥寢不解帶性復友愛長兄食指繁常分修金以助之初令山西崞縣政不尙苛察而姦民屏迹去後民懷爲立德政碑署洪洞去之日民爲脫靴以留遺愛調陽曲事繁劇而都邑送呈上案民

上饒縣志

人物 鄉賢 卷十九

三



必曰願移公問其得民心如此陞河東監掣同知裁陋規  
清積弊先時河東富民充鹽商者苦稅重往往破產不能  
償為稟請大府轉

奏免其充商改爲官運商民鼓舞爲捐餉銀三百餘萬以濟  
軍需咸豐二年報捐知府旋署潞安府篆時陽城土匪聚  
眾滋事奉檄往辦至則示諭解散擒其首逆趙連城而平  
民得以無累嗣陞四川鹽茶道洊陞至臬司時髮賊竄擾  
東南欽奉

諭旨督辦接濟江西軍餉先捐廉七千兩以倡平居自奉儉約

上饒縣志

人物 鄉賢

卷十九

三

宴客必豐雖日費萬錢不計也而友朋之困阨同官之負  
累無不傾囊以助云年六十有二卒於任所舉人郭守訓  
貢生譚鳳來何天衢合七邑紳士稟請從祀鄉賢祠

新  
增



名臣

宋

余堯弼

見前鄉賢

施師點

見前鄉賢

徐元杰

見前鄉賢

徐宗仁

見前鄉賢

周瑩

事詳行狀見藝文據高洲周氏族譜增

明

陳修字伯昂從太祖平浙東授理官援引律令悉本寬厚盡

上饒縣志

人物名臣卷十九

十四

改元季弊政擢兵部郎中遷濟南知府時亂後比戶彫殘

且多衛將練兵屯田其間修撫治有方兵民相安流亡復

業帝嘉之洪武四年拜吏部尙書六部之設始自洪武元

年鎮江滕毅首長吏部佐省臺裁定銓除考課諸法畧具

至是修與侍郎李仁詳考舊典參以時宜按地衝僻爲設

官煩簡凡庶司黜陟及課功覈實之法皆精心籌畫銓法

秩然未幾卒官

明史

王讓字謙光天順進士授給事中屢觸忌諱不以禍怵一時

權貴深憚之里人懷忌相軋者因希風旨嗾言官誣劾賴



憲宗明聖反坐奏者讓出補濟南通判再擢楚雄知府恩威並給遠人懷服太傅黔國公以下重其素望咸咨以邊務焉讓英達夙成毅然有經遠志平生章疏最多燬不存方擬大用以入覲過家而卒

通志

婁謙

見前鄉賢

葉鏜字汝聲號少巖廣南守鵠子也父子俱聯捷成進士初選庶吉士館讀中祕旋補兵科給事中彈劾不避權貴有直諫聲世宗朝言事稱旨命總理六科事京中稱爲六科都諫先生時嚴分宜當國鄢懋卿以假子得幸奉勅督理

上饒縣志

人物名臣

三

卷十九

八省鹽課所至大燭威虐信歲食浙鹽故無嵯使巡歷懋鄉喉御史宿應參疏請得按信如浙直例鏜時總戶科卽手疏特糾之上嘉納爲寢前詔信至今賴焉他如陳國是六事罷遣修邊大臣劾遼東撫臣失律裁革閩浙添設巡撫以省隔屬供億糾司計大臣不職及嚴會計停加賦處運糧以資軍餉議漕儲以濟缺乏纒纒千萬言皆時政之大者疏上悉報可由是風裁益著累擢京兆尹南大理鄉少司寇晉秩尙書致仕歸終於家生平著述及奏稿甚富會子濟美以蔭仕卒京邸不能刊集行世弟鈞登癸卯舉



人官至廣西僉判至今人文蔚起世稱羊石葉云前志

王建中 見前鄉賢

楊時喬 見前鄉賢

鄭邦福 見前鄉賢

王夢暘 見前鄉賢

鄭以偉 見前鄉賢

余桂萼 見前鄉賢

鄭爾說字鼎殷崇禎進士知建寧縣考最擬補臺班以屏跡

權門得工部主政首輔某黨同伐異爾說特上章極論忤

上饒縣志 人物 名臣 三

旨削職騎驢出都門後輔政以罪歸用原官起補癸未請

告還里澹於進取假館於德興縣之南溪鄉為童子師者

積二十年一日返衡門塗逢禦人劫衣笈將去審知爾說

即慙謝請死其信孚強暴若此卒人稱遜齋先生有詩文

若干卷藏於家祀忠義祠 通志前府志



宦業

宋

徐珣字温甫高宗朝進士授辰州教官爲刪定編修轉池州判官有美政尋致仕所著有語孟解易解學者多宗其說

通志

余時言字知默徙居浮梁紹興進士授安豐軍教授歷仕內

外臺府有能聲贊上親征隆興初知漢州值蜀大歉所部

獨登出粟活流民二十餘萬終敷文閣待制

通志增

按時言前志遺載但通志謂爲上饒人自以登科錄爲

上饒縣志

人物 宦業

七

斷故爲補人

舊志

楊抗字抑之以才畧薦用嘗知盱眙紹興辛巳爲淮西運使

錫山尤袤爲著事實子恂字信伯登進士第文學推重於

時舊志

徐珏字叔寶寶祐間爲餘干令每決疑獄人頌神明

人物志

元

余岳字泗濱至元間爲瑞州教授學行修飭建仰高堂置官

書嚴課試重小學考喪服正從祀具器用學校一新

據通志增

祝堯字君澤博學能文所著有大易演義四書明辨策學提



綱古賦辨體延祐進士授南城丞改江山令陞萍鄉州同  
存心撫字獄清訟革吏畏民懷舊志

方思廣字可大至正三年知連州增學田立義塚勤撫字吏  
卒無敢恣者既去士民紀績學宮至今尙存通志

童文傑字庭川二都鶴巢人元至正甲午舉人令長樂以廉  
能著調仙居卒於官初令長樂時惠政下逮去之日民不  
忍捨繪真祀之仍別寫小炤題咏德意進之以示不忘至  
今子孫珍藏焉舊志

明

上饒縣志

人物 宦業 卷十九

三

許穆洪武初以明經薦任政和縣丞多惠政以廉能稱穆丞  
政和得磁石助廉事詳具嚴從簡周咨錄真臘傳中舊志

按磁石助廉語簡而晦凡劄內所謂非註不明者也識  
之以俟來者考訂前志

游志遜洪武間以廕授廣西興安丞入朝作應制詩擢御史  
舉劾不避權貴王稱忠直御史陞四川僉事祀忠義祠通志

王自牧洪武間以人材用歷官至兵部職方司郎中永樂三  
年從英國公出征交趾卒於軍祀忠義祠人物志

楊廣仁永樂間任虞城縣令百廢具興雨暘應禱嘗以累繫



獄百姓詣闕白其冤得釋仍詔還職尋擢河南僉事及卒  
老稚遮迎其喪泣送者千百人舊志

周伯敬字體仁號逸齋生明永樂丁亥歲天性渾厚才智軼  
倫由例監任衡州同知治甚廉明去官日士民祖道脫雙

鞵以旌敬有良馬能達書道過某都被燒尾至第舍而斃  
藁葬于槩埵其塚今尚存伯敬卒於成化庚寅年所遺石

鼓在宋周十公大竹園遺址後據周氏家譜增

鄭雅字仲平以監生調和鄉簿之官以一僕自隨每與令長  
部使者爭不便面頸時時發赤繼判安節奏蠲逋稅病革

上饒縣志 人物 宦業 无

戒僕飭後具無受賄歸裝一敝篋朝祭服外家訓十四條  
而已祀忠義祠孫毅舉進士累官御史以治行聞通志

李柰字景春舉進士歷官吏禮二曹淳博知大體擢廣西參  
政協贊兩廣軍務韓雍平徭之役柰與有功焉通志

蔣淡字子川由進士歷官兵曹出知福州府境內大治郡有  
靈濟宮例遣中官歲易時衣糜費供億以萬計淡奏請以

有司行禮罷中官通志

方崇字遜夫成化舉人未仕時授徒講學弟崙從弟壻壻鄭  
毅皆從受業一時及門登第者甚眾後任德安府通判以



弟崙忤逆瑞慨然掛冠歸

舊志

陳紳字廷章成化舉人宏治間任兗州府教授丁艱歸當道

咸致禮幣補任寧波提學趙寬嘉其教範諭兩浙師儒法

焉陞黔江知縣彝民塔水宋者為黔積患紳至以德化之

黔民遂安尋謝病歸

舊志

楊福字伯昌由監生拜藍山丞鄰邑安仁衡山民獠錯居告

訐視藍滋甚歷幾官不能平部使因奪其篆而以福署之

既至不數月績用茂著將遷秩移疾歸子麒舉進士累官

南工部尚書譽望推重於世

通志

上饒縣志

人物 宦業 卷十九

三

鄭毅字立之宏治進士累官至四川巡撫擢兩淮總漕所在

政聲赫奕為當時名宦著作甚富燬於火僅存巖山集

通志

李艾字子芳號靈巖嘗師事婁諒諒雅器之有讀殘蕭寺三

更月踏破青山萬里雲之句宏治乙丑成進士選庶吉士

授浙江道御史以斷獄見重中丞屠公遂令兼視閩楚滇

黔晉各道事會土官岑某以罪逮獄厚賂諸權貴賈免艾

兼得其情竟寘於法逆瑾怙勢艾率同列伏闕叩諫有旨

罰跪一日時盛暑率多僵僕艾獨挺然不撓繼按獄粵中

洗冤牘無算丁內艱歸人有言奉差例必持金為宦者壽



艾曰吾不獲爲朝廷剪除大憝反欲爲逆奄作居賄耶其  
大節類如此嘗結社於城西周公墩與士大夫賦詩其間  
孫仲顥字儒貞由恩貢歷官漢中知府先是顥任襄陽府  
丞官兵進勦山寇顥隨營給餉會師失利被執曉以大義  
賊皆感愧釋之進福州知府惠廉兼著士民有三山頌言

舊志

楊麒字仁甫正德進士歷官工部尙書積學能文隨事輒辦  
嘗建盧溝橋今往來者德之通志

桂榮字君用以舉人歷官至監察御史按部湖廣摘發如神

上饒縣志

人物 宦業

三

自旦至暮斷獄百宗立釋疑獄數十人一省以爲神善詩

歌古文辭有桂軒詩今佚府志

方之北字文斗號拱垣萬厯乙酉亞魁任望江教諭遷景寧  
知縣適歲旱禱於敬山宮甘霖立沛邑稱大有遷澧州知  
州致仕歸講學石山書院吉水鄒南臯嘗贈聯云雲中彩  
鳳翔千仞林下春風第一人舊志

徐士俊號六石萬厯甲午舉人舉任六合知縣以治徵授工  
部主事進刑部員外讞璫獄陟幽廢一時稱爲健吏陞鶴

慶知府未任歸築室林泉以壽終舊志



楊聞中號尊止侍郎時喬子以廕授工部都水司主事尋權  
荆門稅師先侍郎權武林關法一無所擾陞南寧知府解  
組歸以遊武彝山水會邁疾卒於崇安之天竺庵舊志

黃清起吏員清勤積官嘉興府同知加四品服俸築海塘有

功後以運司治高寶河堤積勞死於寶應之寧國寺至不  
能斂事聞贈卹有加祀忠義祠通志

方應瀚字養冲號北溟萬曆舉人初授崇仁教諭邑有黃金  
鼎者單寒分糈養之踰年脫穎去遷隰州牧值旱飛蝗蔽  
天乃教民以姚崇捕蝗法蝗遂息轉山東濮州先是妖賊

上饒縣志

人物 宦業  
卷十九

三

王好賢徐鴻儒倡白蓮教流孽山東濮州爲甚瀚至擇捕  
密授以計混賊中盡得其情兵乃潛撲之前後俘八百餘  
人黨遂平大府命籍其產令民得買以補透支餉費產值  
倍於餉瀚賤價以售民有皂旗夜指白蓮散萬金不染寒  
冰膽之謠在任二年謝政歸蔬食布袍怡然自得嘗作詩  
曰三月無鹽常食淡一家露肘屢啼寒庭前一望清如洗  
剩有南窗竹數竿兩與賓筵卒舊志

徐久德號裕元萬曆舉人歷官至四川敘馬瀘兵備副使值  
奢崇明倡亂變起倉卒久德百計綢繆練兵措餉設間招



降凡五閱月州縣俱平致政歸八十餘卒

通志

王廓字孟侯號偕五給諫讓之孫通守衮之子崇禎辛未進

士筮仕得文選為有力者所阻以刑部郎恤刑八閩全活

無算陞廣西督學轉金衢嚴紹大參一攝藩篆兩署臬司

功著兩浙晉太僕卿歸終南村之雲霧山生平勤慎雖位

列罔卿而傲裘羸馬猶同寒素終身不置妾婢五子七婿

諸孫林立皆擅文名

舊志

皇清

王燦字炳若順治舉人授南昌府教授康熙戊午聘校楚闈

上饒縣志

人物 宦業 卷十九

三

尋陞洪洞知縣洪俗尚奢侈燦力挽其風凡婚喪讌會之

禮酌定八十二則名曰思深格言俗為一變暮年丁艱歸

服闋不起徜徉山水十餘年卒年六十七著有吾廬藝草

菊洲詩文今佚

舊志

桂天申字重禧號愚山明御史桂榮之裔也穎異多識由歲

貢授定南訓導遷吳縣丞時大兵入閩道經於蘇天申經

理橋路以功陞雲南南寧知縣年老致仕歸與賓筵卒年

九十七著有四書經濟說史論雜記草蛩吟今皆佚

舊志

鄭天祉字錫茲號退齋歲貢生博涉羣籍見忠孝節義之事



必手自抄錄暮年猶能作蠅頭小書官萬年訓導教學有法時庶常聶位中尚爲諸生天祉閱其文謂厚重有後福良然春秋八十以壽終子緝字于素歲貢生文章有法度上王興三庠知名士多出其門

潘紳字一飛由拔貢任浙江三江場鹽大使竈田潮冲紳申詳題請准豁民德之信食浙鹽郡城商店俱就常山鹽埠價買而禁民肩挑故鹽價日昂紳詳請弛禁上憲准查議而紳卒於官議者惜其設施未竟焉

舊志

王勳字熙明辛未進士居家以孝友聞里黨無間言任始興

上饒縣志

人物 宦業 卷十九一

三

知縣絕干謁終日坐堂皇理案牘內外無輕出入者邑有險灘水駛疾石嶙峋如笋舟誤觸輒壞經之者久以爲患勳捐捧集工匠搥鑿石堅功不就令囊土塞其流煉以炭火乘火熾擲濕鞮覆之石脆得鑿去遂爲垣途邑人呼爲王公灘丁父憂歸服闋補保康署竹溪皆有善政念母老辭官歸養以族係衛籍倡置田二百餘畝以贍軍務及病擇族弟增生忻接管復增置至今公私兩賴焉子一躬正附貢生有傳

紀徵善字性存性孝友潛心程朱之學成進士教授袁州時



侍郎辛從益尙爲諸生初課閱其文深奇之置第一日與  
講論多所指授辛貴顯呈以句云絳帳懷風千里外青衫  
霑雨十年前郡士習家駮辛拱照陳廷珪貧而好學分俸  
飲助之細爲改評其文藝皆脫穎去其樂育人才培植寒  
畷類如此平居恭肅端方廉隅自飭袁守林其寡以安貧  
樂道卓薦尋丁繼母憂歸卒於家邑令梁承雲撰墓誌

汪安國字以仁由拔貢考取覺羅宗學教習造就多英才制  
軍長君麟亦出門下期滿選授湖北應城令以興利除害  
爲已任葺瀟陽書院以造士修養濟堂以卹老建貞女劉

上饒縣志

人物 宦業  
卷十九

三

小姑坊以勵節民風一變尤神於獄舊有田姓某溺斃  
族無賴子牽控多人久羈囹圄安國至一詢得其情釋無  
辜至二十餘人大吏知其才委決疑獄多平反會有廢峒  
藏水久而鹹上官聞欲就辦鹽劬力言不可狀事得寢其  
他徵石膏關稅辦勦匪軍需築荊州水堤均能使民無擾  
以罍誤去百姓謳思不置

方漢字右水由武舉任遼濠營千總通韜畧究心海防督撫  
會疏題陞鎮標守備署中軍遊擊乾隆五十二年以征林  
爽文調赴台灣駐城東竹篙厝臨陣七戰不避鋒鏑將軍



常青嘉其勇檄征北路屯兵鹽水港屢出殺賊會酷熱中  
喝卒於軍年僅二十六歲未究厥用制府孫以壯猷風繼  
扁額悼之

劉毓秀字蒼成性孝友善屬文以鄉舉歷任陝西藍田登城  
中部洛川等縣代理鄜州印務所至有廉能聲時教匪鴟  
張軍務絡繹秀悉心籌畫嚴禁苛派事立辦而民不擾僉  
稱爲好良心官奉檄防禦商藍隘口有李姓控湖廣客民  
爲匪黨憲飭查拏秀知爲讐誣白於上臺得釋者數百人  
又辦理軍臺者一解運糧餉者三嘗中途墜馬折臂力疾

上饒縣志

人物 宦業  
卷十九

三

而前其赴義急公不避其難如此五分校棘闈得士之多  
爲關中最後因公左遷江陰丞卒著有藜照堂文稿詩稿

四卷

以上  
前志

李孔均字學彬嘉慶戊午舉人知建安縣事精明強幹聽斷  
如神閩故多盜均設間偵捕桂苻以清民得安堵制軍汪  
聞其才每延至商畧大政輒條陳利弊如指掌又緝獲餘  
干朱毛俚夥黨及逃瑯會匪等犯大府疏薦擢直隸州知  
州旋以奉檄買解黑鉛赴京道卒年四十四歲論者惜未

展其驥足云

前志  
改



周之藩字蓋臣號介菴以順治乙未歲貢生選吉水縣訓導  
善于課士陞本學教諭委署吉水縣篆既受代盛具酒筵  
召諸生歡飲陳義勸輸租皆爭先完納視事二載邑中無  
逋賦 上憲奇其能薦陞徽州歙縣令未赴任而卒 據周氏家譜

譜以上  
增 新增

陳得高字廷泰號大軒宋理學克齋先輩裔也性剛毅嫻韜  
畧以嘉慶庚申武舉任河鎮把總兼理鉛營都司事先是  
河鎮客舟素爲伊地無賴所苦茫無泊岸高莅任洞悉前  
弊立革除舟子德之踰年任九江鎮標前營分府甲午考

上饒縣志

人物 宦業  
卷十九

三七

校列上取實授鉛邑都閫府會朱毛俚亂密帶隨營丁壯  
改裝微行晝伏夜出稽察奸宄供職不懈卒年七十有三  
周如蘭字佩芬號湘皋幼恬靜能體父志刻勵讀書未冠卽  
受知於翁覃溪先生嘗題廣信校士館有冰壺玉映兩清  
才之句蓋謂如蘭與玉山王生也嘉慶二十二年成進士  
入翰林散館改知縣初令湖北黃梅潔已愛民修築圩隄  
民享其利旋調蘄水清勤如昔因盜案擒大猾陳大元按  
律治之民情翕服乙酉冬大府以卓異薦

咸皇帝召見

養心殿

訓以操守第一要緊六事廉爲



本等語本

朝知縣

召見自此始蓋異數也道光七年游陞湖南辰州守益矢兢惕  
察奸胥杜弊竇奉檄提犯於沅邑姦民陳士涵聚眾拒捕  
時雖移會營兵獨能從容鎮定出示曉諭解散其黨卒獲  
士涵十一年調守長沙政務殷繁又值搖匪滋事奉檄總  
省局軍需羽書旁午目不交睫者十餘夜十五年護理岳  
常澧三州道篆踏勘安鄉華容水災據實稟報得沐

聖恩蠲賑民賴以蘇其愛民之出自誠心數十年如一日也嗣

上饒縣志

人物 宦業  
卷十九一

三

因母氏年邁陳情歸養自是杜門不出問寢視膳依依膝  
下如稚子弟如璋好揮霍家寢衰子天孫幼割腴產爲之  
贍養其孝友有如此子六長履和次履安三履信俱太學  
生四履健布理問五履方龍南學訓導改廣東鹽大使六  
履慎鄱陽學訓導孫十人曾孫十一人元孫三人蜚聲庠  
序書香正未艾云

王效虞字卿雲庠生惟孝長子進士勲曾姪孫也道光壬子  
登會榜籤分貴州初到黔制府羅公卽以幹員目之旋委  
署獨山州事修理書院培植士子諸生咸以得師相告慰



時粵西髮賊猖獗奉委辦防而苗匪乘機倡亂甫抵任次日司閩以賊將圍城告城中無一旅之師一兵之餉官與民又不相識卽馳叩紳士鄉廬商守禦策往返僅三日募壯勇六百名皆持十日糧率以守城賊知有備遂去上官誤聽人言劾之既而丁外艱卒以守禦有方著有勞績各大府以實心辦事團民悅服

奏請暫辦軍務免補知縣以知州陞用未幾卒年五十四歲  
論者惜之

鄭秉醕始名鈞字和甫道光庚子進士官禮部祠祭儀制司

上饒縣志

人物 宦業 卷十九

三

性嗜學善屬文與同邑張秋坪張翼伯盧午峰王丹銘諸人相友善辛丑盧捷南宮王不第秉醕悲其貧至爲之泣其至誠待人類如此在禮署絕迹權貴遇事求稱職道光  
中冊立

全皇后儀注多定其手然卒滯卽位

孝和皇后崩秉醕蒞陵事條事稱

旨着加五級以繁缺道府用

璽書褒美有練習章程詳明典故之制誠異數也年四十八卒於官家不樹產在官如寒素比喪貧無貲遺令薄殮至今人



稱廉介云子嵩生邑廩生

王文烈字梅村號丹銘道光丁酉舉於鄉大挑湖南知縣署桃源縣事遇水災發倉儲賑不給捐廉買麥屑以濟生活數萬人旂於外艱扶櫬歸服甫闋值寇警郡守史士良知文烈才幹畱辦信防甚得力上事於大府 奏加同知銜是時湖南方戒嚴他員幸回籍鮮不逡巡者文烈聞報徑赴省聽撫藩調度圍解後攝湘陰縣篆地慘賊氛幸烏獸散下車急思安集之并條陳團練諸方畧積勞成疾遂不起百姓無遠近皆太息若喪慈父母至焚香帛於靈輻哭

上饒縣志

人物 宦業

四

卷十九

蒼天數聲去文烈在湘陰有富紳某蟻於訟袖券金二萬乞削其案牘文烈拒不受撰聯署庭曰掌湘陰一顆印春溫秋肅要暮夜半文錢地滅天誅清白吏不是過也所得官俸悉購書死後檢宦囊經史數十籠而已子福田承父志能安貧孫品湘邑增生

鄭家蘭號香谷讀書應童子試不售援例入成均應順天鄉試復薦而不售遂棄舉子業官湖南典史平苗亂保薦卓異嗣因公旋里適修信江書院慨然捐腴田數畝以資膏火郡守銘公憲以急公好義額贈之姪孫裕中家貧出貲



爲之娶婦又攜姪秉瀚至任所課讀如巳子道光壬辰任  
臨湘典史遇旱澇捐俸賑濟咸豐辛亥護理臨湘縣事壬  
子陞永順府經歷束裝就道湘民祖餞涕泗交流上憲器  
之復委署永順縣事任滿引歸年六十九卒子十輩聲庠  
序者二餘皆能自樹立云

上饒縣志

人物

宦業

學



儒林

唐

王貞白 見前 鄉賢

宋

周伯輝字亮堂號渾齋讀書力行不求聞達惟怡情詩酒適

意林泉與陳克齋相友善往來唱和一時稱極盛焉著有

求志堂集四卷兵變散失 舊志

徐直方字立大元杰長子性淵靜嗜學尤邃於易度宗朝舉

明經授廣東經畧使後特授起居郎兼侍講 舊志

上饒縣志

人物 儒林 卷十九

四三

元

陳苑字立大資稟穎異深信陸子之書絕意仕進時許文正

諸公方崇朱子之學既設科取士非朱氏之說者不用苑

守所學不變閉戶潛修躬行實踐德益重望益充於是

有志之士爭來問學弟子李存祝蕃舒衍吳謙最著苑以靜

明名其書齋學者稱靜明先生其歿也蕃狀其行甚詳今

蕃集不傳惟存所為墓誌銘見俟菴集中

按府志載貴溪人今按李存所為墓誌銘乃云上饒人

至順庚午卒明年殯於邑東郭葬於瑜山皆上饒地故



補入李存墓誌銘見俟菴集原跋

游詹字起南少習吏事棄去刻苦讀書郡學舉為司計憲司  
試藝中程上之行省授徽州路學錄轉教諭太平當塗縣  
學國制以儒官出身必部使者覆試然後命於朝詹得書  
上考除撫州路儒學教授諸生聞詹至大喜以為得師詹  
敬老恤貧修廢舉墜輿論翁服時江淮兵起郡兵調守省  
會詹同郡縣吏守城年已七十氣節愈壯會全家逃樂安  
邑村歿於兵詹以訪舊卒於等坂莊所年七十有六  
魯撰

上饒縣志 人物 儒林

卷十九

三

明

游質字用文與弟義和同師鄉先輩徐伯宜仲達期以功名  
顯元季板蕩志弗遂含味道腴甘貧自守明洪武初邑令  
蔡仲昭以質經明行修聘為本邑訓導毅然以師道自任  
秩滿考績入覲上詢治道以正人心厚風俗嚴風憲擇守  
令對稱旨陞新昌教諭興修文廟教學有法義和字用和  
以太守賀推誠薦攝本邑教諭行部使者每至諮訪政教  
欲舉以大用會引疾卒

李默撰 以上  
行畧 前志

周文字煥章號復齋遊吳康齋門刻意理學不樂榮進以身



率物睦族敦讓歲饑常作粥以活鄉之貧乏終其身家無

異爨者舊志

周洵字季亮號太冲明崇禎丙子舉人性友愛博洽能文以

公車未第需次知縣是時四方苦擾攘洵目擊時艱見幾

而作定鼎以還齋居講學鼓舞振興儒風丕變康熙

間江機亂信近村提湖徐某者被賊擄洵往賊營諭釋之

賊重洵品叩頭去據周氏家譜增

皇清

方敦復字秉彝號惺齋和平渾樸有古儒士風嘗謂吾輩讀

上饒縣志

人物 儒林 卷十九

四

書當求身心性命之理勿徒以文字弋取科名同學由是

多迂復年近三十始補博士弟子員平居究易義一日玩

復卦怡然有得曰剝復消長天地之心吾其以此命名乎

又榜其居曰中以自考蓋取敦復無悔之旨焉入泮後不

出戶限三十年著作甚富燬于災最得心者惟來氏易註

其間箋疏縱橫別出京焦之外可謂明于進退存亡云同

邑優貢生姚景曦為立傳

以上新增



文苑

元

王士雲字虛白淮海書院山長與同邑王秋江白仁壽王子

東祝元美蔡九思王觀先後以能詩擅名

採江西詩徵增

謝寅字叔長枋得諸孫通三禮學試有司不利就會府辟掌

籍史

江西詩徵小傳增

熊進德字元修楊廉夫甚稱其詩

江西詩徵小傳增

以上前志

明

徐觀道洪武初以文學赴召試天地廟社山川鬼神諸論稱

上饒縣志

人物文苑卷十九

四

旨授翰林院檢討署吏部考功郎中乞骸陛辭上稱之曰

善人有遺文藏家今佚

舊志

趙學拙由鄉貢任句容教諭陞襄府教授深為親王禮重及

致政歸道範式俗鄉論優崇

舊志

陳綱字伯文費文憲宏從之遊嚴毅方正克盡師道宏大魁

天下至元輔以再請告家食先生猶在家塾相見懽甚嚴

肅如昔或諷之曰門人至貴不當少貶耶先生曰師生猶

父子也可以貴而加之乎人益賢之自宏以外若方伯張

公祐司訓費寧冬官費完庶子費案太史費懋中鄉進士



懋和懋樂皆伯文弟子

費文憲前撰墓誌志

方崱字靜夫號石山宏治進士授桐城知縣擢刑部主事自

題其署曰九重丹闕懸心切四海蒼生入夢頻以釋冤獄

忤璫瑾意解官歸築書院於城西授徒講學肅宗朝命復

職會卒勅贈員外郎奉直大夫著有石山集子洋號湘源

為王陽明高弟以貢監授鎮東衛經歷辭不受著有講學

語錄及湘源詩集今佚

舊志

楊德彪字小虎改字內潛庠生十歲能詩文古今書史一覽

輒記倡文社於邑刻信風集行世詞人墨客就質滿座遂

上饒縣志

人物文苑

異

於易有看過十七年之語尤善隸篆草書體法遒勁人多

珍之著有竹關集刻嚙語刻

舊志

徐自定字慧後進士應雷子家世藏書與其弟自寧考訂古

今反覆辨難一時名秀多宗之定以癸酉副榜貢寧丁卯

闡幾得復失兄弟漫遊四方歸隱桃花灘以詩歌自娛寧

尤善翰墨為賞鑒家所寶

舊志

鄭大璟字笈尹文恪猶子弱冠補弟子員閉戶攻苦雖族中

罕識其面者文恪每謂子閉戶攻苦若不怡情山水借資

朋友終老學究耳何用乃遊涉四方受知於馬君常倪鴻



寶何象岡黃石齋及鄉李孟白姜燕及楊機部巳卯鄉試後遂絕意仕進撫文恪公遺事鐫曰退鐫備注較刻夏文愍文集時當事有開禁山之議上十不可事乃寢甲申養疴永豐雨石山尋卒所著有編夜堂冲妍堂漏月園念一廬鴈外樓諸集兵燹散失爲可惜云

舊志

鄭時用字龍臺選貢生少穎異淹貫百家擅詩古文辭授東鄉訓導以母老歸養克敦孝道授徒講學杜門著述時稱爲龍臺先生湖東道陸萬鐘知府俞嘉言皆表薦焉

舊志

王嗣經字日常故姓璩貌魁梧多言笑面圓而紫色人戲呼

上饒縣志

人物 文苑

七

爲蠲臍王笑而應之博學多撰述吟詩不輟有詩入金陵

社集其秋吟入章尤膾炙一時

採列朝詩及江前西詩徵小傳增志

皇清

鄭兆湘字楚水邑廩生博淹羣籍治春秋尤得要領每訓子弟曰讀書非徒科第惟窮理致知明省身克己之要審待人處事之宜方切實用歲饑變產周恤無德色著有秀雅集弟兆泮邑庠亦明敏過人

舊志

鄭國光字用賓學優行潔知府郭維筦修墨高銳俱延王義學以歲貢授南昌訓導以學行爲士林楷模告休歸諸生



立碑學宮御史朱鳳英爲之記子顯宗字嵩年邑廩生博文強記孫世仁字澤綿有孝行以選貢 廷試 武英殿

行走辛卯領鄉薦舊志

蘇春字倫五其先世自閩來徙幼工詩兼通書法十一歲能

作擘窠字閩寇之亂隨父走吳越黔楚歷齊魯至燕趙遊

王阮亭之門所業益進嘗賦猴子詩阮亭歎爲仙才一時

趙玉峰彭駿孫諸公以唐崔鴛鴦鄭鷓鴣例名曰蘇猴子

所交盡知名士如孔東塘陳其年吳天章其最著者試京

兆不遇飄然而歸徜徉山水以諸生終著饑鳳集十六卷

上饒縣志

人物 文苑 卷十九

吳

西河毛大可序以行世採饑鳳集增

余肅字允恭歲貢生讀書漸爲有用之學持正式俗樂善不

倦立文會以教鄉閭子弟飲食教誨不間寒暑學者宗之

里有被邪崇者術士爲埋符牌覆以缺嚼供奉勿懈肅見

而碎其缺拔符牌棄之怪立絕人服其剛正舊志 以上前志

鄭天眷字西侯號鵝峯年十七入泮兄某業農與田鄰爭水

草歐斃天眷奔控語戇直觸縣令怒逼詳褫革及縣試天

眷易名冠軍復黜之學使傅王雪聞之復其衣衿乾隆辛

酉科舉於鄉益自歛抑與人言恂恂似不能出邑令汪聘



修邑志從遊者成就甚眾

楊必芳字懋師增貢生鄉飲正賓早歲喪親遭家彫敝昆弟  
同濟艱難弱冠從兄肄業德興古墻雨圯獲藏八十餘金  
悉歸兄以完逋賦晚年營建家祠構書屋於錦灘之西凡  
數十百楹族黨子弟來學者皆賴之額曰錦灘書屋他善  
蹟不勝枚舉子紹焯乾若捐職州同事繼母如生母克體  
親心行善不倦性喜交遊於人士之賢者尤加愛慕云

汪煒字彤有邑庠生家素封持躬謙讓造次必循禮法弟沒  
撫姪有恩姪沒復撫其孤族黨姻戚貧困者煒能探其意

上饒縣志

人物 文苑

四

卷十九

而緩急之好讀有用書嘉賓客郡人士賢者多從之遊數  
奇僅以貢成均終

余化鱗潛心經史力學不倦以貢生授教諭將及抵任而歿  
弟之瓏邑諸生有學行先化鱗卒藝林皆爲惋惜

以上  
舊志

劉球字上玉邑廩生試輒冠軍刻苦勤學貫穿經史文必宗  
先正家居授徒成就甚眾性嚴毅不苟隨俗縣令程光鄂  
重其文行暇卽延訪義不及私鄉里重之口碑勿替

前志  
增

毛汝亮字九功歲貢性超邁嗜學作文喜馳驟而準繩自立  
素靜重諳諳以敦骨月化鄉鄰爲事臨終惟以讀書積善



勉其後云

張廷鉉字青來幼慧常依祖父聽議論能解悟出語問難多  
中窾會讀書誠懇弱冠遊庠序儕輩咸以偉器期之廷鉉  
益自憤發以攻苦成疾年四十一卒士林惜之以上舊志

周毓瑛字建五副貢生善屬文爲諸生屢試高等學使金檜  
門按郡擢周與鉛山蔣太史士銓皆第一喜得兩才士並  
邀遊幕中令詩文互相印可後蔣入詞垣周不遇以明經  
終然蔣未嘗不心折周也一日舟過高溪迂道訪之周已  
歿索其詩集爲所序而行前志

上饒縣志

人物 文苑

五

卷十九

徐炳煥字仲寅號澹齋邑庠生幼苦家貧隨父力耕而性嗜  
學值農隙輒手一編朗吟不置見古人嘉言善行手錄成  
集身體力行佩服不忘并勗示諸弟垂爲家範年踰壯家  
漸充裕周恤貧乏樂善不倦而一經裕後殷殷教育以故  
子爲培食餼於庠克承家學培復善繼父志特構數椽爲  
家塾庭除樹丹桂二本顏以植桂園中起邃閣環以方塘  
閣上建樓名曰味書博購羣籍歷延名師課子三禮三愼  
三望三賓讀俾得先後爲諸生時有四玉四絲譽而三愼  
復以恩貢生歷任長寧訓導瑞金崇義教諭稱職得沐



恩旨賜封一代三望以增廣生例貢成均三賓與諸兄應秦觀察  
觀風均獲高擢而秦尤心器三賓檄取赴署就學乃踰年  
遽以疾歸而卒惜哉先是三禮率諸弟肄業鵝湖以爲文  
能根柢經術行誼屢掇高等深爲主講名進士董薊溪醕  
鄉宦少宗伯程海蒼巖二前輩擊賞名重一時亦藝苑中  
之傑出者也迄今子姓林立世守經畝蘭芳桂馥方興未  
艾焉

鄭潛字景陶 恩貢生宿學歲貢絹伯子也性穎悟年未冠  
入郡庠第一旋食餼試輒冠軍文名噪一時從遊之士甚

上饒縣志

人物 文苑

五

卷十九

衆多所成就生平好義舉建祠修譜率以身倡近里多虎  
患潛作文額有司勦捕詞旨愷惻邑令李覽之歎爲仁人  
之言其利溥所著有南村稿孫文耀邑廩纂有窺間錄曾

孫惟壇邑庠

前志  
增

徐學江字硯濤好學不倦十七歲以詩賦受知於學使謝人  
邑庠旋食廩餼有聲黌序間年三十餘忽喪明猶日令子  
弟誦古今文字於側而耳受心識無所遺忘有以詩進質  
者亦令誦之卽爲竄易咸如其意而去生平吟咏甚多貧  
不能付梓僅有分韻試帖二卷木棉傳一篇傳於鄉



紀學字懋中天資英俊十三齡卽工書法詩文喜做六朝  
試屢冠軍食廩餼與樂平汪守和友善汪每閱其所爲文  
亦心折之乾隆己酉考取優貢第五名會學使瓜代以結  
狀郵送遲延未及咨部被佚同學咸爲扼腕後以歲貢終  
焉

余嵐邑優生魚山其別字也性孝友處兄弟終身無間言解  
試屢薦不售嘗纂正叔方叔遺書學使李鈞簡爲序弁其  
首尤工吟咏一時知名士若陳用光饒向榮恆與之唱和  
初受業於豐溪劉梓劉歿歲贍其家友人江允奠老而貧

上饒縣志

人物 文苑

五

卷十九

倦於進取力勸之行鄉會資斧皆獨任之江得 恩賜翰  
林院檢討還卒於桐廬復解囊歸其柩焉善文而誼篤師  
友人以爲有趙章泉風子二錫麟錫馨俱邑庠

盧贈梅字饋芬歲貢生質敏而性直弱冠以能文稱補諸生  
食餼歲科試例保結審慎不苟同列有徇私者力爭之面  
輒發赤或嘗以利益怒徑唾其面素嗜飲酒酣耳熱時縱  
談今古奇氣難平聞非義常折人於廣座人以其中無他  
亦自媿服其爲文色正芒寒不可逼視論者謂如其爲人

楊立達字冀亨少穎悟七歲能詩就傳之年從豐溪孝廉劉



薦以魁竟置副車旋悒鬱病卒士論惜之著有錦灘課藝若干卷藏於家

潘世份廩貢生品端學粹與同邑紀耀昌友善以文行相砥礪學使金賞其文送豫章書院肄業咸以大器目之數奇終不遇乃歸而教其子孫焉孫兆元附貢生葺宗祠倡義渡平糶濟荒人謂克承祖訓云

劉毓祺字啓繁乾隆己酉舉人官彭澤訓導少穎異有至性事兄如父仲兄督課極嚴終日敬受無忤色讀書刻苦博涉貫串期有心得爲詩文矯矯自許與人談論不作尋常

上饒縣志

人物 文苑

五三

卷十九一

語也司訓日培植士氣勤於訓課諸生欣服其教罷官歸授徒講學筆瓢衍如道光三年冬邑令陶延修縣志事未竣而卒所著有語錄髓春秋三傳合纂約箋考定攷工記子華柯邑庠生華棣郡廩生

廖大鵬字搏九生而穎異博覽羣書皆能得其大意爲文如游龍驚鴻天矯不羣督學汪瑟菴稱之曰奇才遂以優行貢於雍平居尙氣節重然諾視戚友事如已事有以非禮干者輒面斥不少借其歿也年未四十士論惜之

蔡興仁字培元幼穎異家貧力學年十八應童試郡守裴玉



麟取冠一軍以冠履衣服書籍贈之由 恩貢登賢書會稽梁文定相國器其學行延居西席生平博極羣書經史子集多經手錄性至孝父應科早世能體母心友愛其弟尤篤友誼與邑廩劉雲漢善劉少年賣志未展所學仁爲立碑表墓王講信江靈山懷玉葛溪諸書院所指授多知名士歷與賓筵卒年八十三著保赤賦老農說等集梁文定暨蔣太史士銓爲鑒定刊行

余基字式恢乾隆己酉 恩科舉人和厚廉介績學工古今文自童試至爲諸生試每冠軍主司趙佑精衡鑒刊其闡

上饒縣志

人物 文苑

卷十九

五

墨有神解獨超之譽性至孝親老不忍遠離遂絕意仕進行善於鄉閭里化之授徒講學從遊約數百人郡邑知名士多出其門學者稱爲愚齋先生愚齋其自號云當事重其誼延主靈山書院講席十載絕干謁師範端嚴太守王賡言復敦請進署訓其子姪以不便生徒問字辭弗就晚年築日省軒於所居之旁奉曾子誠身之學爲學行誼益粹四列鄉飲正賓道光三年邑令陶堯臣纂修縣志聘主修老不果往命次子聯第應聘與修多所指授六年春季壽七十九歲端坐而逝邑令陶輓以琴悵高山額所著有



愚齋古今文稿日省軒詩草

徐三慎字近崗一字耿亭性醇孝讀書尚志節少與鵝湖程  
燮同學切劘道義業師董進士醇深器之以 恩貢署瑞  
金教諭長寧訓導授崇義教諭贛南雷觀察輪贈以品端  
學優扁鄒學使曉屏按郡知其宿學命於明倫堂講解經  
義反覆辨論自朝至晡敷陳不倦論者謂剴切精詳不亞  
陸子講義利章先是崇邑科名不振蒞任數載有楊生良  
木聯捷去時以爲三慎勸課之效俸滿以母許氏年老乞  
終養甫俶裝而訃音至其孝感如此以居喪過哀卒年六

上饒縣志

人物 文苑

五五

卷十九

十六生平吟稿甚富未付梓

方錦堂字振紳性恬豫績學工文有聲庠序間中歲試省闈  
不售絕意進取構書齊面靈山顏曰挹靈時花種竹嘯咏  
其中壽至八十餘以歲貢終

汪鏐字冲漢乾隆己酉 恩科舉人穎悟工爲文弱冠見賞

於康郡尊朱別駕課試屢拔第一父邑增德遠嚴課督令  
遊撫郡進士黃鏗豐邑孝廉劉梓門所學益進登賢書後  
參戎慕其名延訓其子皆成材晚好岐黃術偕堂弟邑庠  
鈔以醫濟人得其祖邑庠光眞傳所著文稿家貧未付梓



曾倡建宗祠工未竣而卒鈇踵成之至今一族利賴焉

夏朝鈞字衡標幼聰慧絕倫爲文不起藁援筆立成目能下  
數行書博聞強識師友以大器目之年十九補諸生爲闈  
郡冠乾隆己酉 恩科登賢書乙卯揀選知縣居家敦孝  
友立心醇厚制行端方設教授徒於文藝外諳諳以端品  
相勸勉出其門者多方正之十年四十五而卒士論惜之  
汪壽遠字錢酬郡優生家產素豐兄早歿與諸弟白首同爨  
錢穀出入悉委於弟不一問終身以讀書爲樂好聚書籍  
及古今法帖名畫所交如魯厚畚鴻吳白庵照饒綺峯向

上饒縣志

人物 文苑

五

卷十九

榮諸君皆一時名士爲文古淡厭時趨鄉試二十一次不  
售恬然弗以介意性喜施濟里人呼爲菩薩云

鄭森惠字和風邑庠生生有異姿於詩書外兼通度曲彈琴  
諸藝性愛山水名區勝境無不遊歷事繼母色養弗衰里  
中有爭競一言卽解羣服其和氣炙人焉

以上  
前志

王猷字廷選邑東名士也品學兼優長於制藝文場鏖戰動  
輒冠軍乾隆辛卯歲督學使者汪以筆硯扇聯贈頗器重  
焉家窶授徒殫心講課一時英俊負笈爭從孝廉蔡興仁  
徐紹澗明經鄭孝杰輩皆出其門事之如父以恩貢候選



教諭終有詩文剩稿待梓生子一

鄭孝杰歲貢生以文名善點竄課門徒無疾言厲色侍講席者弗忍欺生姿卽遲鈍經提撕率蒸蒸日上身列黌宮約數百

廖大珍號璞齋歲貢生性聰敏讀書數千卷爲詩古文詞下筆率源源滾滾畧不停毫又工帖括與堂兄弟大鵬大琳等嘗競爽制藝刻入試牘中

廖大琳號琢園歲貢生選宜黃訓導少失怙孝事孀母弱冠博覽羣書試輒冠軍與弟大鵬同遊庠食餼學使汪瑟庵

上饒縣志

人物 文苑

五七

卷十九

以大器目之詩文刻入江西試牘中生平與豐溪徐白舫太史善徐每稱之曰琢園純粹君子也晚年講於家四方來學者甚眾著有惜陰軒詩集邑候莫堯莫爲之序子寅邑優廩生有父風

葉作梅字子鶴號友竹童試四冠軍見賞於王太守簣山賴明府銘齋入庠後屢列高等而久困秋闈其行文貫穿經史取法天崇浙閩制軍汪以績學聘主講席凡數載門下士有入詞林者解館回梓設教鉛山負笈從遊率多顯達其爲人亦謹言慎行不愧人師壽六十五終著有卧白集



文藁雪梅軒詩鈔未錄被燹子炳麟邑廩生

余錫奇字斗輝號劍津嘉慶癸酉舉人附貢生余崗子也性磊落具文武才慨然欲有所建樹於世博覽載籍至老不倦下筆千言洋洋灑灑尤仗義疎財凡倡學田廟孀節施丸散賑饑貧止鬻婦焚借書諸義舉至今猶嘖嘖人口生平多著述其註釋吳穀人有正味齋全集未刻燬於兵現存自著信芳齋詩古文詞各數卷待梓生三子長十洲布政司理問次楨太學生三杰郡廩生

余聯第字性常號夢華十七遊庠弱冠食餼中式嘉慶癸酉

上饒縣志

人物 文苑

五

卷十九

副舉人就教諭職孝事父母待兄弟友恭道光五年邑侯陶聘修縣志聯第工古文嘗設教一時名下士如主事鄭君秉醕孝廉陳公其恕李公毓鍾廩貢鄭公惟瀾王公惟秬等無不出其門最心契者盧方伯定勲定勲親炙講筵十餘載受培植獨多又素諳練邑中修

聖廟建

文昌宮悉身與其事且慷慨好施提攜親戚見義必爲毫無吝色年八十七無疾端坐逝子三嘉植邑增生嘉樹附貢生嘉焜邑庠生孫六長培元博士弟子員



吳孫魁字元階號鼇山文章英偉品行端方由廩膳生中式嘉慶庚午科舉人丁丑大挑知縣道光乙酉籤掣光祿寺署正孫魁世科第累葉清華門多名下士著有安雅堂詩文集傳世壽八十有七終

紀德鑿號銜山心性聰明氣度間雅作詩古文詞求工而不喜敏字斟句酌玉節金和尤長於駢體文不減六朝風味既獲雋於拔萃科復以副舉貢成均而門多高足尤足稱道光三年邑令延修邑志蓋重其學也

王維秬號寶岡歲貢生幼穎悟絕倫長復嗜學工詩古文詞

上饒縣志

人物 文苑

五九

而尤長於制藝每脫稿人爭傳誦試則冠軍文宗汪瑟庵協揆尤器重之數奇困於棘闈齋志以沒論者惜焉文稿甚富惜未付梓

劉華彬字含章號竹虛邑增生性孝友隨侍父靜軒公宦陝西洛川令定省外他事概不與聞舉止剛方雙眸炯炯如巖下電鬚髯似戟望而知爲正人生平肆力於詩古文詞嘗和徽人程夕嵐詩云高堂久悵鶴西歸祿養深慙宿願違長此春暉何處報羨君戲綵娛萱幃孺慕之思至老不衰友於兄弟讓產而受瘠田尤喜表揚節孝玉山朱貞女



奔喪守節爲賦長篇可歌可泣有畱餘軒詩稿待梓壽古  
稀長子昌綸舉於鄉次昌紱邑庠生三昌績邑廩生五昌  
紹與孫世燧俱補博士弟子員

毛福臣字秉一號虛水邑庠生邑北十二都羅谿人性孝友  
天姿竒特童年卽淹貫經史落筆驚人弱冠後旁涉書畫  
醫地音樂卜筮諸雜技悉皆精妙絕倫乃年未三十遽歿  
而所著詩文各稿又多散軼未經付梓士林咸歎惜之

劉華棟小字慶德邑南上塲人幼具夙慧恪遵大父研谿公  
彝訓讀書務求明理身體力行不屑屑飾文辭獵科第兼

上饒縣志

人物 文苑

六

卷十九

嫺音律館課偶暇卽輪玉軫運金徽一彈再鼓以自適興  
至握管語必見道多發前人所未發曾著有惠迪邇言一  
編梓藏於家

王惟賢字啓岡號秀峯嘉慶癸酉拔貢祖勲進士官廣東湖  
北知縣父躬正附貢生前志有傳賢家故邑中望族科第  
蟬聯至賢乃以古文鳴一時邑人郭光啟以能詩名著畱  
有餘齋詩集黃侍郎爵滋作敘鄧觀察仁堃爲梓行集中  
所尤仰慕者惟賢及弟惟秬暨弋陽陳唐甫而已賢生有  
至性事母孝家貧所得館金盡以供甘旨妻孥食粗糲衣



敢絮意豁如也為人坦率胸無城府王定九相國嘗目爲  
大器賢以鄉先賢宋王時敏公尹和靖先生門人爲朱子  
之友曾編和靖師說一卷特重梓行世以著家學於同里  
中尤服鄭君兆藺有實行不爲大言欺人遂相約爲婚媾  
世居東鄉離城三十五里族中有逆子某某二人橫行不  
法族中人咸遭噬剝忽於歲畢乘賢具饌祭祖先二人突  
肆兇橫賢閉戶戒家人勿與較連年爲惡不悛賢乃避居  
郡城西北隅二人又毀其故居賢不忍鳴官究治人皆稱  
其量道光三年縣令陶公堯臣聘賢及郭君光啟同修縣

上饒縣志

人物 文苑

卷十九

空

志凡志中附論諸篇多出賢手有古文稿若干卷賢無子  
以仲弟子效祥爲後效祥字芝雲郡優附生咸豐八年合  
臨江撫州建昌之賊約二十餘萬共擾信郡效祥攜其父  
古文稿避亂南鄉遇賊不屈死古文稿遂失

郭光啓號閬仙道光乙酉拔貢生性情溫厚器識宏深訓子  
以義方誨生徒植品勤學工詩古文詞凡遇忠孝節義事  
諳諳稱道且作詩歌爲之表揚平日著述甚多已刻畱有  
餘齋詩集行世長子守訓舉於鄉次子守謙邑廩生帶勇  
殉難另有傳



楊日煌字華五號照樓道光丁酉拔貢官瑞昌縣教諭父士  
樛嘗拾遺金候其人還之里中稱爲長者煌幼貧廣文鄭  
兆蘭奇其才爲言於學師蕭君蕭故鄱陽才子大器之周  
觀察湘皋又器之並延以課子盧封翁贈梅亦器之又與  
故四川廉訪張君思鏗交最善張卽入祀鄉賢者所謂君  
子之氣類也石郡丞家紹江西循吏也尤器重煌官南昌  
令延煌及浙江沈蘋濱毓蓀佐理筆墨事嘗誇於同官謂  
幕中二友可以橫絕一世張司馬維屏歎爲知人石公著  
三禮輯註得二人之助益居多煌工小楷書學使許滇生

上饒縣志

人物 文苑

卷十九

三

尚書稱爲神品出都後書名益噪求書者絡繹不絕戶限  
爲穿郭君光啟作詩規之見畱有餘齋集中瑞州府銅鼓  
營題名碑乃煌所書可復按也煌於時文講求義法新建  
夏太史廷桀延課子弟時南昌吳君笏有文名人謂煌實  
勝之葉司馬濟英馬大令九功交延課子廣信郡守袁公  
重其學行擬舉煌孝廉方正會粵匪竄江境不果行晚得  
瑞昌教諭道梗以疾終於家其門人鄭志昫曰先生恂恂  
儒者無仕宦習氣無幕友習氣無名士習氣無鄉紳習氣  
惜世以書名掩其人品長子濬培邑優生次善培湖南城



步縣尉

鄭惟瀾恩貢生工制義院試冠軍食廩餼文宗汪瑟庵先生  
鑄江西試牘錄其文人爭誦之至今仍紙貴惟瀾務筆耕  
能循循善誘多士得坐春風中率蜚聲而去其最著者邑  
孝廉李毓鍾尤淵源無負晚年過目頗留心經史詞章外  
凡仕版邱抄閱之未嘗忘一字時輩咸稱爲雜博子二長  
忠謨邑庠生罵賊死幼忠訓道光己酉登賢書

李毓鍾字聲遠號雲崖十五取茂才旋食餼登道光乙酉拔  
萃科文宗王省崖李芝齡郡伯劉梅坪邑侯陶菊坪石瑤

上饒縣志

人物 文苑

三

卷十九

辰悉器之辛卯歲同張秋坪舉於鄉大尹銘禹民以是年  
置書院顏之曰雙桂志喜也兩上計偕前後司靖安廣昌  
鐸解官歸無宦意每日雜經史爲下酒物醉則呼兒輩席  
端口講指畫素厭城市羞干謁大令程莘農倡義舉敦請  
才一出見輒曰君非公不至者太守鄧厚甫爲明經同年  
欲晤終不獲年五十三秋社夕夢巨人排闥入挾泛西湖  
覺視臂有指痕液旬始漫滅復夢題壁而今名利都拋卻  
蓋詩中讖云尋負病卒時漏未盡大風雪鵲聲數百流屋  
去子樹滋業儒早故樹藩邑庠生中書科中書樹梁從九



品樹浴附貢生

廖際楠字伯昭增廣生佐父力田朝耕夜讀成名後輒喜吟  
哦耽山水每春秋佳日率攜一囊着雙屐遨遊名勝間有  
得則乘興拈毫託諸歌詠而川原之形勢縱橫亦無不了  
然于心目生平著有世綵堂詩集地理贊元若干卷

陳其恕字達行號勿軒宋理學克齋先生裔也道光壬辰膺  
鄉薦遠近知名家貧無儋石而志在聖賢不求溫飽生平  
亦矩步規行毫無越分合邑稱爲真孝廉以公車回籍遽  
召修文夙願未酬士林惋惜

上饒縣志

人物 文苑

卷十九

畜

鄭惟海恩貢生少聰穎過目成誦郡院試俱弁冕多士遂列  
膠庠食廩餼家貧課門徒寒暑不輟講其用功務使從根  
柢近時花樣頗厭之性豪飲無客弗沾唇嘉賓至命羣弟  
子侑壺觴醉爲述往事或論今人倦則置身羲皇上年六  
十餘猶設教經史至老無遺忘

孫龍章字河瑞邑廩生幼聰慧長嗜學五經傳註爛熟胸中  
工帖括每拈一題振筆疾書無不精妙歲科試輒冠軍而  
卒困於場屋存稿未梓子二明馥歲貢生明郁邑庠生

蘇夢熊字贊侯歲貢生安貧勵志其兄力耕以供讀友恭交



篤工詩文尤精帖括力追先正年六旬嘗日課一藝然數  
奇屢困棘闈弗獲售文稿甚富待梓

姚景曦號海嶠道光戊子優貢生充武英殿校錄性穎異  
工詩古文詞而制義尤倚馬可待在京日有粵東會試者  
干禁爲門吏所扼索數千金同行上饒武孝廉趣曦往曦  
至吏乃舊識笑曰請分金之半與君曦曰予爲解紛來非  
爲分金來吏慙而事得解曦掉頭去粵之官京師者聞之  
咸詫歎曰豪士也阮芸臺相國外任時囑識曦者修書延  
聘曦曰吾以筆墨自給籬下寄非所願也堅辭之在京前

上饒縣志

人物 文苑  
卷十九

五

後十一載知交之貧者無不竭力資助故戶外履常滿爭  
以得交曦爲幸後選新城訓導崇獎孝弟表揚節義無日  
不以詩文與諸生相切劘也旋丁母憂授徒里中受其教  
者多以氣節相尚云子嗣崇拔貢生嗣樞邑庠生

徐莘田字蒔旃號有廬由郡庠入太學邑北鄭家坊人性剛  
正風裁峻峭肅若秋霜而娛親愛弟意懇情真和藹之氣  
溢於眉宇念自高曾以來一經相傳已綿六世繼起不可  
無人督課諸嗣甚嚴無片刻曠以故子鴻恩服恩振興迪  
恩殿恩祿恩孫曷輝德誠皆先後成名鴻恩歲貢生品端



學粹久爲儒林師範不惟諸弟藉其陶成四方門徒賴琢磨成偉器者比比也服恩邑增生天資高朗年甫垂髫卽以默識十三經受知督學汪瑟庵先生嗣是歲科高擢弱冠復以經解詩古文辭爲顧學憲特獎拔冠全軍時鴻恩亦列高等顧贊以經史淹博家學淵源秋闈膺薦堂備不幸早歿士林惜之迪恩邑廩生究心正學佩服程朱咸豐戊午以義憤罵賊殉難得沐

恩卹振興殿恩祿恩曷輝德誠均聲蜚庠序

徐玉麟歲貢生讀書以立品爲先棱棱多傲骨不受人憐遇

上饒縣志

人物 文苑

卷十九

事務光明磊落不可干以私而性好臨池心正筆正講誦之餘輒施腕力遠近競求墨寶者戶限爲之穿玉麟則言芳行潔非第仗一管傳也後以明經舉鄉飲正賓

潘德嘉字鳳儀邑庠生與弟德升俱遊周太史毓麟門太史重其行誼深加贊賞文章力追先正郡伯銘禹民邑侯石瑤辰咸大器目之生平篤嗜朱子近思錄嘗舉以示兒曹曰此吾儒必讀之書也棘闈屢程薦不售以諸生終子翊臺邑庠生翊暄翊彬翊樑翊鍾俱國學

劉華彩增貢生少負奇氣嚮往朱子之學讀書於懷玉豫章



白鹿諸書院尋道學淵源南北鄉試呈薦不售年未四十  
遂絕意進取居恆靜默寡言恂恂若愚見者知所養甚深  
也道光辛丑七旬舉賓筵

劉昌綸號薇垣氣質和平素行儉樸衣食粗糲而奉養繼母  
甘旨必具文品清卓爲銘禹民太守所賞識勇於急公賓  
興義舉跋涉勸捐不辭辛苦己亥登賢書三上公車不售  
因賊擾信城遂志切同仇奉文辦團練籌餉防勦備竭焦  
勞八年沈幼丹中丞以團練出力入告授南昌府義甯州  
學正以詩文就正者絡繹不絕抵任一年卒于官子一孫

上饒縣志

人物 文苑

六七

卷十九

一曾孫一

徐鴻恩字東齋號漸山歲貢生邑北鄭家坊人敦品篤學爲  
玉邑蔡孝廉世鉞高弟遊泮後授徒四方歷數十稔循循  
善誘誨人不倦出其門者多成雋材知名當世而其胞弟  
邑廩生迪恩佩服程朱罵賊殉節皆其教督者素也子昺  
輝克承家學踵列膠庠

鄭文炳字國光號旭齋邑庠生靈北人性敏善悟工詩能文  
每一落筆妙義環生令人頤解而襟度寬和見人輒撚髭  
微笑迎以善氣雅謔清談滔滔不竭饒有東方曼倩風焉



廖寅字畏庭邑廩生前宜黃訓導大琳子也博覽經史目嘗  
數行弱冠應童試邑侯陶菊坪奇其才拔置案首令入署  
讀書郡伯銘禹民尤器重之善事繼母能先意承志生平  
與儀部鄭秉醕瑞昌學博楊日煌湘南大令王文烈爲莫  
逆交以德行文相砥礪秋闈屢呈薦道光己亥已命中  
以一字見遺義命自安毫無介意其立教先器識而後文  
藝邑中從遊者率成名著有岷山書屋文稿燬於兵卒年  
五十八

吳孫珪字碧桐恩貢生幼赤貧潛心經史達旦不眠行文浩

上饒縣志

人物 文苑  
卷十九

奕

落屈盤空所依傍海甯沈蘋濱先生主講靈山書院評其  
文有合熊劉爲一手之語從學多知名士惜數奇以明經  
終

婁鈿金字英臨號品三邑增生幼穎異書讀五車爲文下筆  
如湧泉棘圍屢呈薦爲信江齋長郡伯陳源充史致諤有  
文壇老將筆掃千軍之譽後病篤口占云自慘平生命不  
猶年年別感度春秋而今元鶴歸蓬島拋卻人間萬古愁  
蓋深恨其未獲科名也子三長恆朗次恆照三恆炳

熊運炳號奎垣字離齋童年默寫十三經受知於王省崖學



使郡伯黃安濤劉體重銘息均器之王太守賡言尤推獎  
稱曰是能讀三墳五典八索九邱者屢列高等以冠軍食  
餽棘圍呈薦凡四科素不修邊幅士林目爲本質人炳待  
兄篤窶分居認債項金百餘兩亦重交情盧君蘊華斃於  
省集貲扶櫬歸宛如同產村有溺嬰風務勸止並立會救  
之又輯登節孝請建總坊暨考棚書院賓興軍餉諸義舉  
無不矢慎矢公勛勳盡力輿論咸孚家無累積卒年七十  
餘生子四長天穀附貢生四天街業儒

郭守訓號莘耕與弟守謙以文噪生平務質樸言貌恂恂一

上饒縣志

人物 文苑

六九

望卽知爲儒者其立言適肖其爲人不矜才不使氣視若  
尋常而手和心細爐火純青麤豪家無從夢見也咸豐己  
未捷秋賦道梗難計偕設教於家門多英俊雖當戎馬倉  
皇而坐擁皋比製詩古文詞以課士年四十餘不幸卒著  
有半生心血文稿若干篇待梓

以上  
新增

應時鳴字鳳山邑增生品格端嚴讀書得間生平善誘人媿  
媿不倦門下士多一時英俊其嗜學幾忘遲暮雖當髮雪  
眉霜而駿鬣雙懸丹鉛不輟著有纂輯學庸解待梓卒壽



陳德普字濟蒼郡增生錫齡子也稟承家訓究心經史其爲文渾厚沈雄追蹤先正十六受知于學使孫文定公取入邑庠肄業信江靈山兩書院郡伯史士良邑侯楊鳳山咸深相器重同治甲子科鄉試以額滿落副車不數年而卒黃明源字定江號鑑如幼家貧就傅四年日誦千餘字苦無貲棄書爲人牧過村塾輒倚門聽講講畢驅犢去館師竊心異爲言諸儕輩由是能文士多樂與切磋明源亦克自奮勉遂掇泮芹食廩餼其行文不假思索洋洋灑灑伸紙下筆十餘藝鵝湖信江靈山諸書院恆壓卷尤工詩賦文

上饒縣志

人物 文苑

卅

卷十九

宗試古學所投無不利七邑論者目爲小才子在郡設丹鉛凡從遊率循循善誘成桃李材居常務質樸性溫厚和平圭璋選也未售而卒惜之

劉懋鏜字錫孫號小橋幼穎異讀書數行下舞勺時文選子史悉成誦十五以默寫十三經受知於學使張文毅公補郡弟子員逾年食餼文名噪甚同治二年以優行貢成均前張文毅公奉

命督辦皖江團練事知鏜有經世才招之往而鏜以待重闡不忍去六年丁卯玉山縣令王聘鏜入幕閱試卷深契之時



有暮夜投金藉通關節者鏗嚴拒不受終弗言其人鏗迭  
喪偶續聘同邑增廣生余純澧女爲再繼室婚有日矣鏗  
病岌遞訃至女一慟幾絕遽脫簪珥髮髻臨其喪不復去  
水漿不入口者七日因自經媼救之死而蘇蘇而死者數  
數焉太守鍾仲甫方伯挽以聯云三代貢成均桂府將登  
召赴玉樓何太早一枝傷悴折柏舟遽賦來歸總帳世所  
稀同年生比部張庭杰爲作遺像紀畧府學師蔡公集元  
亦爲撰像贊云

上饒縣志

人物 文苑

卷十九

七





上饒縣志卷之十九

忠義

唐

龔順贈通議大夫賜進士兵部員外郎乾符二年黃巢起應  
 王仙芝於山東己亥春節度使劉巨容大破之巢收餘眾  
 渡江轉掠饒信是冬順率義兵八千追賊黨至峽口戰弗  
 克拔劍自刎猶持首馬上里許乃殞馬奔入潭因名白馬  
 潭有司以聞詔贈饒信忠義大夫鄉人祀於潭北旱禱必  
 應

據玉山縣志龔順  
 忠義亭碑增

上饒縣志

忠義  
 卷十九

按選舉志唐進士無龔順玉山縣志於龔順忠義亭載  
 順裔孫明嘉靖乙巳立碑署唐贈通議大夫賜進士兵  
 部員外郎龔順並有按語云上饒人似非無據舊志選  
 舉想係失載耳今為採入忠義其選舉中仍闕以俟稽  
 考

以上  
 新增

元

陳受事母至孝至正初伯顏不花的斤守信知受有勇力募  
 為義兵累以戰功擢千長會陳友諒來攻伯顏不花的斤  
 自盡受尋戰敗被擒痛罵不屈賊焚殺之

元  
 史





明

寇夢虬邑庠生聞闖賊陷京師自縊其妻子同日赴井死  
程兆科其先廣豐人祖父徙上饒因籍焉登崇禎進士以中  
書家居聞闖賊變遂吞金卒

鄭祚遠字一士世居沙溪二世祖以靖難兵起挂冠潛遁後  
遂不大顯祚遠家貲素饒仗忠義喜讀書遭時孔棘息意  
於功名處族黨濟急扶困無分毫顧惜而於宗譜尤兢兢  
黃道周由閩至信過沙溪得祚遠喜甚祚遠傾貲佐道周  
道周被執祚遠死之

上饒縣志

忠義  
卷十九 二

附黃道周鄭氏宗譜序余膺命由閩至信時鄭生祚遠  
仗策來謁忠義之氣凜然令人起敬偶憩生齋見書卷  
狼籍檢舊笥得鄭氏家譜一冊閱其世系祖籍濠上繼  
隸徽祁舊有分合二譜其所載人物類與國史符合逮  
遷信饒沙溪著有支譜其一世出元勳二世仕建文朝  
緣靖難兵起遁跡潛名至三世守父遺志不求聞達此  
又國史所不及傳而幸於其家譜覩焉未窺全豹已見  
一斑流連久之不忍去值生適至見余閱其家譜因乞  
序焉嗟乎當此國事孔急之秋遠以一介書生非有高



爵厚祿而仁孝精誠直可貫金石而泣鬼神以是知其有自來矣語云忠義之士必出忠義之門今閱其前之高風亮節若彼而生之仗俠赴義若此古語不信然乎余與生行將抵江南成敗利鈍未可逆料畱片語於譜俾百世下知其忠義代有傳人詩曰夙夜匪解無忝爾所生余願鄭氏子若孫引之勿替自當繼世於無窮也云爾

按家譜入志必以其族之有學行者所作乃可徵信沙溪鄭譜有黃石齋序雖未載入本集然石齋至婺源旋

上饒縣志

忠義

卷十九二

三

被執其文自無從編次簡樸有體非時人能贗爲之者石齋寸縑尺牘固足寶貴而祚遠死事得此愈足傳信故附錄序文於左

以上舊志

辜奇鵬字賢程先世居閩明季隨祖父遷邑北樓村生有至性家貧未學而力耕有膂力善技擊遇者謂其武人及見公事親孝居喪哀毀疑其嘗學甲申聞變慟哭自盡

據辜氏族

譜新  
增增

皇清

周元字孟祥任雲南騰越副將吳逆叛署元偽總兵不就退



居永昌大兵至蜀元與永昌偽將軍田進學偽總兵李鍾秀同謀反正鍾秀舉兵北勝元與進學舉兵永昌恢復順寧府雲龍州賊兵壓境眾寡不敵元被執不屈遇害通志孫宏品素以勇力聞康熙乙卯歲江機等肆掠突至其鄉焚廬舍殆盡縛宏品歸賊巢有聞其勇者逼令入黨不從挫辱之亦不屈一日無雲而雷羣賊驚駭宏品曰天心厭亂若輩不改行將就誅殛矣賊大怒以刀割其頰罵聲不絕而死邑進士紀徵善爲作烈士傳

李文彪由行伍官九江後營千總精鳥槍法立標貳百步發

上饒縣志

忠義  
卷十九二

四

無不中待士卒有恩咸樂爲之用嘉慶元年六月調征邪匪與賊戰於鍾祥屢勝之將軍明記其功九月復戰賊大至其左右曰賊眾我寡盍姑退彪叱之奮勇先進所向披靡卒以眾寡不敵被創死事 聞詔入昭忠祠子孫世襲

雲騎尉

以上前志

鄭柳居邑南世業農康熙甲寅寇襲郡城分兵四擾柳攜三子遁至塗次伯仲二子均遭戮復執柳苛勒金帛柳大罵曰無論吾苦窶素乏貲卽稍有儲蓄亦不資盜糧賊怒牽至大窟頭裹以敗絮繫以徽纆沃以沸湯柳瞑目緘口不



作哀號乞憐態賊疑已斃棄之去賊退柳妻歸聞覺救甦  
奈遍體迸裂醫治弗痊踰旬而歿

鄭淑麟邑南源塘俠士也性穎嗜學髫齡游庠尋食餽鄉闈  
歷經呈薦而氣骨嶙峋夙負重望康熙乙卯僞都司白某  
糾眾倡亂流毒四方麟挺身出禦白素耳麟名欲倚爲謀  
主多方弋獲優禮相加麟忿拒大罵脅以刃罵益烈遂死  
賊營子二均諸生聞訃慟哭各自裁隨父地下精忠至孝  
畢萃一門嘻盛矣

方臺號蘭階溫文爾雅心氣和平而忠勇性成不避艱險由

上饒縣志

忠義

卷十九二

五

道光甲午武舉中式丙申進士

殿試一甲二名授二等待衛期滿以遊擊用二十二年任直隸  
提標左營遊擊咸豐元年陞陝西宜君營參將時粵匪猖  
獗臺聞警髮指誓欲滅賊以報

朝廷尋因湖北告急奉調赴援奮勇防守武昌賓陽門屢獲勝  
仗二年十二月初四日城陷力戰陣亡蒙

恩從優照副將例議卹

特旨予諡果肅給卹銀六百兩致祭銀二十兩全葬銀四百兩  
碑價銀三百兩并飭詞臣擬撰祭文碑文遣員 諭祭加



贈副將銜入祀 京師暨陣亡地方與本籍各郡城昭忠  
祠行查籍貫事蹟造冊交史館立傳給雲騎尉子慶中襲  
職襲次完時給 恩騎尉世襲罔替現居城隅太安坊

李煌字日章號鳳樓儀容拔俗膂力超羣幼讀典墳兼諳韜  
畧年甫十八報捐武監道光癸卯捷於鄉甲辰成進士尋  
復援例銜加遊府分發閩浙督標試用期滿題補連江營  
遊擊咸豐元年委署督標右營參將是年四月閩逆林俊  
等倡亂環攻延平煌奉委赴援危城獲保賊計窘遣謀改  
裝混入我軍并設伏藏機希圖狡逞煌忽偵得會同胡觀

上饒縣志

忠義  
卷十九

六

察密報大營預防遂於是夜督兵夾擊賊敗竄入沙縣煌  
卽乘勝尾追賊莫能當被煌殲斃八百餘人生擒二十八  
人奪獲軍裝器械無算而沙縣永安大田尤谿四城先後  
一齊克復賊竄回永境魚潭巖洞負嵎自固四年正月初  
六夜煌復率兵縋幽緣險火其巢穴賊驚墜崖斃者纍纍  
而林俊等始駢首就戮閩界肅清當經列憲迭次保奏由  
提標中軍參將陞浙江杭協副將惜因積勞邁疾弗克赴  
任遽於五月十三日歿於永安營次咸豐二年疊荷

恩綸榮封三代茲復奉



旨賜文 諭祭優給卹銀并給煌子八品監生遇缺拔補把總  
楊錦斌性忠勇精技擊初任建昌守備嗣以考驗居最超陞  
饒州參將抵任後逆氛忽逼殫心防剿漸次肅清尋復督  
率衛民軍援建重圍立解賊竄新豐獨領孤軍窮追被賊  
夾擊遂致失利義子飛維死焉未幾又隨席道冒雨進軍  
搗巢剔穴備歷艱辛積勞成疾忽患嘔血醫治弗痊日漸  
增劇遽於同治癸亥夏五月二十九日歿於會城旅次事  
上得

旨照遊擊軍營立功後積勞身故例從優議卹

上饒縣志

忠義

卷十九二

七

楊錦鳳性勇敢精騎射魁梧奇偉膂力絕倫由武舉報捐把  
總自隨營常以忠義自矢咸豐四年中丞陳委署廣信營  
千總兼理守備事五年三月逆匪撲城鳳督率兵勇冒鋒  
衝突奮不顧身遂於二十三日陣亡當蒙

恩卹暫給鳳子霑恩雲騎尉職俟襲次畢改以 恩騎尉世襲  
罔替霑恩承襲在營復以軍務出力保舉都司

劉慶餘由郡營委弁擢補廣昌把總於咸豐四年奉委統領  
章武軍救援饒郡樂邑等城歷著戰功嗣因都昌告警川  
北趙鎮軍飭令督率原帶勇丁暨妾弟周錦如馳往助剿



血戰陣亡給雲騎尉世職子國樑承襲俟襲次畢改給  
恩騎尉世襲罔替側室周氏籍隸宜黃年甫二十聞訃悲  
號自經以殉

楊錦春郡營行伍也嗣以浙標六品軍功赴南昌營投効督  
帶練勇咸豐癸丑後因保衛省垣湖口義甯三城疊著勞  
績晉秩花翎遊擊補實千總諭歲乙卯以義甯  
城陷力戰殉難事上得沐

優卹給予雲騎尉世職子達仁承襲

劉步瀛由武生入營投効拔補興安外委旋復調署弋汎在

上饒縣志

忠義  
卷十九二

八

防七年屢立戰功同治三年四月三日探得粵逆由德界  
擁眾來犯而邑令葉琳適先期赴鄉拒堵城大兵單慮難  
兼顧預將鈐篆密交隨丁護繳營主誓以死殉初四日賊  
至迅即轟擊斃賊數十賊莫能當潛詣城西梯入夾攻瀛  
奮力巷戰手刃悍賊十餘人奈因子立四面受敵遂身被  
重創致斷一臂而歿於陣賊退屍積瀛妻李氏往跡莫辨  
哀號欲絕幸瀛常繫絲帶係李手織因得識別裹歸以葬  
當沐

恩旨給雲騎尉世職子錦雲承襲俟襲次已畢改給 恩騎尉



世襲罔替現經附祀本郡羅饒二公祠

徐迪恩號敬軒邑廩生兄弟六人俱擅譽膠庠而迪恩尤恪  
遵伯兄歲貢生鴻恩師訓究心理學於四書傳註玩索至  
四十八次猶手不釋卷講學以程朱爲主而以諸儒之說  
緯之痛斥佛老力闢新會姚江嘗曰學者讀書不先辨明  
邪正終無由得窺孔子孟堂奧也生平喜質直惡緣飾氣骨  
嶙峋於人無少阿比咸豐八年七月二十四日正在集團  
激以大義而粵匪忽自玉邑來竄當卽袖書出罵曰

國家何負於汝而鼠輩竟忘 恩至此甘蹈謀逆重辟不日定

上饒縣志

忠義

卷十九二

九

遭寸磔吾恨不能啖汝之肉賊怒加刃於其頸不少沮罵  
益烈遂被殺時有同室者潛伏僻處備經目擊因得聞其  
詳云

徐鍾昊邑廩生成豐十年十月粵匪蜂屯河鎮分竄太平橋  
倉隴等村昊身爲團正方謀集團拒戰而賊乘間突至遂  
被執昊髯張髮指罵不絕聲賊怒殺之子行邑庠生

郭守謙號小仙邑廩生拔貢生光啟次子積學能文工詞賦  
生平奮志勲名慷慨自許作爲詩歌發揚蹈厲咸豐五年  
三月賊陷信城羅忠毅公領兵克復謙思羅以一介儒生



建如許功業心竊慕之因集同邑會守誠楊敬資諸秀才  
招募廣義軍一千餘人竭力殫心朝夕訓練防堵貴溪六  
年四月學使廉侍郎兆綸調廣義軍剿撫州賊守謙等整  
兵出郡城城堞西北隅崩坍十餘丈謙母以爲不祥阻其  
行謙白母曰有兄在家內顧無憂兒仗義殺賊天必佑遂  
慨然行後在防所兄復致書召之歸謙復書曰弟讀父書  
守忠義之訓此行勝則滅賊立功敗則捐軀報國庶可上  
不負君下不負親也遂由貴溪進兵克復金谿城招集流  
亡五月移軍改建昌府賊兵少城堅猝未能下旋奉檄回

上饒縣志

忠義  
卷十九

十

防貴溪八月大股賊由瀘溪犯廣信守謙因左右楊曾二  
軍各趨杜阪防堵自領一軍獨當賊衝初二日黎明賊偵  
知左右軍駐於杜阪遂乘間撲縣城守謙以孤軍迎擊於  
張家橋身冒鋒鏑指揮沖突賊騎如牆而進力戰死之謙  
負富麗之才抱忠義之志雖未獲大展其驥足然致命遂  
志雖死如生矣七邑紳士稟懇

奏請從祀忠義祠子二長正乾襲職雲騎尉幼某業儒

徐師銘字良球號冰壺邑廩生讀書負才畧不屑屑科名道

光二十一年報捐從九咸豐元年選授廣西南甯府宣化縣



潭落墟巡檢赴任後值逆氛熾奉札督練勇數千堵剿武  
緣縣大股賊冒刃衝鋒連獲勝仗殲匪二百餘擒渠魁九  
奪其大纛賊怯而颺三年逆首袁謝等蜂屯萬計攻府垣  
師銘奉調派查城梭巡經月圍始解是時寇燹民飢嗷嗷  
待哺師銘彖分司捐薪水買山薯以濟全活甚多七年差  
赴廉州靈山縣遇賊不屈被戕大府上死事

諭旨例給雲騎尉世職襲次完時給予恩騎尉世襲罔替方師  
銘之抵西粵也逾年賊圍省二月初四日值五十生辰賊  
正撲牆闖師銘持扑巡城口占以自壽謂同寅曰此身不

上饒縣志

忠義

卷十九二

十一

爲吾有此命付之於天果能建功立業爲國出力亦臣子  
分當効命吾又何懼其慷慨自任如此子一長升翰承襲  
病故次鎰邑庠生孫鶴齡接襲雲騎尉

鄭志暄字旺東號午峯南康司訓兆蘭之第六子也幼聰明  
多精力九經皆能背誦詩文書法清秀不俗應童試不售  
棄而習武遂入學爲武生成豐四年粵匪竄入江境學師  
吳公庭英講經濟之學聚諸生爲禦賊計志暄與胞兄志  
昫及郭守謙尤爲學師器重五年正月縣令蔡公中和召  
募練勇吳學師舉志暄爲管帶先是城中倉米庫銀儲積



頗裕議練鄉勇千名以資守禦嗣因院批未到廩尊不敢  
專擅縣令必取具志的守謙領狀始發庫銀吳學師以紳  
士動支錢糧正款恐他日受累又懼餉需無所出遂充濊  
練勇之數時知府袁公在貴溪召募因弋陽告嚴檄貴溪  
洪縣丞先領練勇數百赴守郡城仍續召募以備援弋陽  
而上饒蔡令又自捐廉募練勇數百名守郡城三月中旬  
羅忠毅公澤南奉檄督師弋陽知府畱駐羅營於是信都  
守城之軍守西門城者志暄練勇及廣信營兵也以西門  
最當賊衝故也守南門城者貴溪練勇也守東北二門城

上饒縣志

忠義  
卷十九

十三

者上饒蔡令之縣勇也三月二十三日卯刻賊卽圍西門  
城志暄率練勇並約會營兵開槍礮擊之自卯至申力戰  
不少休城下賊被礮擊斃者莫知其數近西門民房有高  
樓賊目數人踞其上窺城中虛實指麾左右甚厲志暄自  
引擡礮擊之並約會營兵用大將軍礮轟擊之樓傾賊目  
皆受礮死日已交申尙未得食兵皆餓極縣令自署送飯  
數十甌上城既無椀箸兵勇手搏飯而食食且戰復不得  
飽賊忽從北門梯城蜂擁而上各兵勇力不能支城遂陷  
蔡令死之志暄亦死之吳學師先於二十一日往羅營請



援及羅軍克復信城學師上志暄死事明年沈幼丹中丞  
爲廣信府知府又上其事得

予建坊旌表入祀昭忠祠妻章氏避亂在鄉聞志暄死誓以身  
殉志暄母數涕泣止之乃不言死事姑尤孝無一言一事  
忤姑意與姑同卧起雖痛其夫死而不敢哭恐傷姑心但  
焚香祝天默自祈死而已果以瘵疾卒夫殉城妻殉夫時  
人謂之雙節

邱文烈邑東劉陽儒士也性敏嗜學數奇未遇咸豐辛酉秋  
八月因邑境寇氛未靖侍奉祖母避居江山縣界不料旅

上饒縣志

忠義

卷十九

十三

棲甫定而賊突至執烈令降烈大聲怒拒遂與祖母同斃  
於賊

徐順慶邑東黃獅嶺人咸豐辛酉賊至被執堅不肯降挺身  
怒罵賊立刺之洞腹而歿

邱洪渭邑東蓬上人咸豐戊午因賊犯境奮勇迎擊戰敗被  
戮

徐升鬢邑東黃獅嶺人咸豐乙卯因赴貴邑鱗鮓灣堵賊歿  
於重圍

侯貴孫邑東新昌人咸豐辛酉秋八月因賊擾村隻身酣鬥



力竭殞命

徐月孫邑東黃獅嶺人咸豐戊午被賊裹脅誓不肯降放聲大罵賊立屠之

邱洪海邑東蓬上人咸豐戊午春二月賊忽入村擒海勒降堅不肯屈昂首唾罵遂致慘死

徐老湧邑東新昌人咸豐戊午春二月途次遇賊勒令歸降厲聲痛斥抵死不從遂被害

徐啟榮邑南黃市頭武生也咸豐戊午春二月因賊竄擾鄰都偕族啓俸廣垣廣達督率丁壯赴隘堵禦連斃數賊賊

上饒縣志

忠義  
卷十九

十四

稍卻當即乘勝窮追被賊夾擊榮等遂中叢矛而歿

辜瑞蔡邑北樓村人家貧食力子處山阿咸豐戊午秋七月賊忽擾及蓬廬蔡持挺猛擊賊負創遁嗣因他賊踵至協攻洞胸而斃

王正國城北天津橋人於咸豐庚申春三月隨營王劉馳赴貴溪堵賊力戰歿

潘德明邑南皂頭國子生也咸豐戊午春二月因寇氛將逼激勵村眾奮勇截擊不幸失利被賊擒至黃柏墩村莊咸脅令降明怒斥曰吾係 皇朝貴紳豈屑隨爾謀逆賊徒



耶賊叢刃之罵不絕聲而歿

黃景榮邑南陳團阪紹墩諸生也咸豐戊午春二月因逆賊  
竄逼里門偕兄景顏率弟景經景童景官景西景仲姪運  
裕運懷運杰運俊運雕運攀運洛運晚及闔村丁壯出禦  
賊弗克勝遂出不意繞道躡擊村眾驚潰榮等一十五人  
駢歿於陣

余體輝邑南上瀘九十八齡壽民也咸豐戊午春二月於近  
村湖山見賊眾大至連聲怒斥被賊倒懸而歿

陳爾輝邑南灣底團首也耄齡既度壯志猶存咸豐戊午春

上饒縣志

忠義  
卷十九

十五

二月賊將入境家眾慮其齒衰艱步勸令預避輝毅然曰  
吾若先行何以率人堅不去迨初四日賊至身膺叢刃而  
斃

汪錦號秀文自幼嗜學數奇未遇壯歲肆力於醫見疾苦立  
救療不憚勞不索謝人皆德之而稟性剛直嫉惡甚嚴咸  
豐乙卯賊竄邑西大路口錦與服姪汝漢同被執脅令降  
不從齊聲罵賊怒駢刃之

翁會文邑南四十七都諸生也性剛正明大義咸豐丁巳秋  
九月偕村人張步金盛少有徐甸芳周德瀛周勝顯等僉



奉憲諭集團禦賊戊午春二月賊忽擾境文等徧令各家  
婦女職炊幼童行饑遂於十七日黎明督率丁壯馳赴大  
橋口截擊殲斃三賊賊稍卻踰時賊眾大至四面環攻寡  
不敵眾遂致潰敗民人盛祿荷張步良翁立安翁文波盛  
位章盛位邦葉元翁堅憲胡壽喜等均歿於陣賊乘勝入  
村肆行蹂躪而民人黃長有余春憲黃昌天夏元秀黃方  
成徐廷憲余文璜龔茂興葉廷章盛年春盛文邦盛興盛  
盛位鳳盛楊松盛慶壽盛位海盛楊順盛有高盛冬喜盛  
齊益盛洪恩徐富行陳良裕魏文高胡春喜胡恆魁王榮

上饒縣志

忠義

卷十九二

十六

孫龔金瑞翁良連程福孫儒士翁良發等暨老婦七口同  
遭屠縱七里橫五里室廬悉被焚燬計二十二所文與少  
有及翁祥生翁三思翁有瑞翁象益翁秋盛翁象山翁榮  
盛盛位仁張步熊盛田有張步堂龔佳孫張步廉龔有廷  
張必貴葉廣進黃運顯黃運文陳有添陳有南盛祿維盛  
祿魁盛祿華盛祿星盛加福盛祿慶盛方貴盛名高盛名  
榜盛名雙盛祿壽盛位富盛有基盛有成盛光瑞等皆被  
擒去存亡未卜旬芳繫畱賊營一宿翼曉牽出刃之中腦  
後血流昏仆賊疑其死遂拔營去少頃漸甦人昇歸醫



治兩月餘而痊

葉元祥邑南五十五都儒生也敦品篤學夙明大義咸豐戊午蒿日時艱捐貲集團鼓勵鄉農葉天申葉老茂周探天鄧登高等矢心痛剿連日鏖戰斃賊數百嗣因賊眾大至祥慮兵單赴郡請援葉天申等四人均以追賊陷重圍歿葉天申邑南儒童質敏嗜學力敦本行咸豐戊午賊將入境翼父藏匿深林旋與團眾擊賊戰敗被戕歿於本村鄧登高僑居邑南陽村咸豐戊午髮逆擾境督團先登被賊環攻慘遭支解遺骸徧跡無蹤惟剩一首裹歸以葬

上饒縣志

忠義

卷十九二

十七

黃秉順楊以義邑南五十七都團首也咸豐戊午春二月初七日賊由廣邑洋口散擾都之鼓樓尖山岡來蘇思陽橋禱山黃宅橋後鄭鳴鐵家坂里江烏門樓一帶村莊順等率眾出禦連戰五晝夜悉獲勝仗生擒賊魁三十餘陣斬賊黨一百餘團丁劉乾元張宗祐余士科盧貞興張宗信封有貴楊振妙張詩確廖老四張詩珍楊先忠毛加四楊先良楊先孝朱白頭楊先安楊先分何敏成何連發何朝品何泰三何嘉惠何必惠何永吉何象修何福俚何賢鏐何賢章楊聰敏楊田崽楊順崽李鳳俚李應德高細九王



慶孫王景榮等三十餘人均以力戰陣歿至十七日因賊  
傾巢壓境力難制勝紛紛潰散賊遂乘虛直入恣行荼毒  
焚殺淫掠罹禍甚慘當經本都局紳呈報列憲沐給卹銀  
三百兩以資葬祭白軍興來鄉團出力惟此爲最

陳斗質邑南陳團坂人性果毅負膂力咸豐戊午春二月間  
賊犯鄰村急隨團眾馳赴儒隄口截擊戰敗陣歿

鄭雲堅性厚重善技擊世業農居邑東咸豐戊午賊已入境  
尙力作田間賊見刺以長矛雲奪矛還刺賊顛臥隴畔眾  
賊覺紛至環刺雲遂負重創歿

上饒縣志

忠義

卷十九二

六

鄭祖大陳孟福邑東細民性溫厚咸豐戊午寇氛已逼凝然  
不動獨居一室賊至搜及勒索財物不遂施以酷刑不稍  
懾齊聲大罵曰無論吾素寒儉本乏貲財卽令多金豈助  
賊餉賊怒刃之

周慶溶邑西洋獅田儒士也績學能文童試屢列前茅稟性  
剛正咸豐辛酉秋八月賊氛將逼闔室驚遁勸令同行溶  
堅不聽端坐以俟少頃賊至溶鬚髯怒張大聲辱罵賊叢  
刺之身膺多傷而斃

陳長喜邑西富民也性仁慈好施予值歲歉輒倡設義米平



價以售鄉鄰賴以全活而嫉惡素嚴不少阿比咸豐辛酉  
逆賊入境繫喜令降堅不肯從怒罵以拒遂被害

張詩福邑西農民也素仗義有俠氣咸豐辛酉秋八月髮逆  
散擾本村詩率團丁持械協擊賊詭竄火其廬詩立撲滅  
如是者三而賊大隊忽至狡肆環攻詩徧體受傷而歿

周老重邑南長洲人夙負豪氣兼精火械百不爽一咸豐戊  
午春二月賊竄湖山挺身出擊被賊圍攻陣歿於鐵家阪  
遺骸慘遭分裂

周探天僑居邑南儒隲咸豐戊午隨眾禦賊以衝陣過猛被

上饒縣志

忠義  
卷十九二

十九

賊支解歿於本村

葉嘉謀邑南儒隲人性果敢不避艱險咸豐戊午春二月賊  
至村挺身出禦戰敗被殺

黃雅崑廣豐洋口人邑團禮字軍勇丁也咸豐辛酉春正月  
奉派馳赴松關嶺堵賊力戰陣歿

高鳴翔邑南居民也咸豐戊午秋八月被賊裹脅義不肯降  
乘間赴水死

鄢以崑邑西儒士也性敏嗜學工詩能文郡邑試屢列前茅  
科試復取份生咸豐辛酉避亂洋川猝與賊遇被執不屈



放聲大罵賊怒刺以長矛登時畢命

鄭端泮邑南儒士也性溫厚善解紛好施予咸豐辛酉秋八月二十三日因髮逆竄擾童孫被執連聲辱罵遂斃賊刃黃雲開號午橋邑西佳士也幼穎悟負才畧髫齡遊庠鄉闈愿經呈薦工鳥跡隸篆詩歌詞賦遺稿猶存咸豐庚申賊踞河鎮奉諭集團無何賊侵邑界雲聞警偕弟監生黃河帶督率團丁急截初獲小勝斃賊數人尋復潰敗賊遂由河鎮繞道南竄直逼郡城音耗兩隔人遂誤傳雲兄弟被擒遭戮經同局紳董赴府呈報并乞轉詳請獎給五品銜

上饒縣志

忠義  
卷十九

三

迨雲兄弟生旋躬請註銷嗣因咸豐辛酉夏五月賊竄湖坊逼近河鎮復奉憲諭督丁防堵沿河列營詎意八月十一日賊傾巢環攻雲營適當其衝力難兼顧遂與次子金印監生黃學源黃銃民人黃元斌黃發中黃瑞祥黃禎祥黃矢祥黃思勤黃興德黃懷德黃勸發黃仁春徐賤倪汪公貴等均歿於陣惟河帶以微服幸免長子慶椿當被衝散徧跡無蹤三子慶榎亦被裹脅踰年逸出投赴李制憲軍營始得歸里以延宗祏云

陳毓奇邑南屯上人咸豐戊午賊擾郡境挈眷避亂祝鵬嗣



聞賊氛將逼里居逃集丁壯協擊爲賊所敗而歿於陣列  
憲詳請優卹

徐光雙邑東六十八都農民也素忠直爲鄉里推重咸豐庚  
申冬十一月被賊裹脅義不肯降力與抗辨迨入玉界復  
放聲大罵遂罹害

周學金邑東六十八都人家貧業農咸豐庚申冬十一月賊  
至被執勒令前導厲聲罵曰爾輩作賊已走入無間地獄  
矣將焉往賊殺之

蘇友勝程祥儀鄭慶元邑南農民也膂力過人兼精技擊咸

上饒縣志

忠義

卷十九

三

豐戊午春髮逆由建郡竄廣邑道經石溪散擾包家廠勝  
等率眾猛擊賊負創遁尋復傾巢來力不敵均被害

楊有魁邑南四十九都儒士也性果敢有膂力咸豐戊午髮  
賊擾境率眾出禦賊詭以溫語遣去眾有退志魁毅然持  
不可激以大義直前迎擊奈彼眾我寡力難制勝遂與程  
松祥林春旺詹冬喜詹廷玉等均歿於陣

游福基邑西儒士也咸豐間因採辦屈道軍糧遇賊殉難事  
上得沐優卹給千總銜

汪福祿字慎餘祖籍徽縣現居邑西太平橋性敏善學以貧



故棄簡編營貨殖漸致素封教子成名而嫉惡素嚴氣甚  
激烈咸豐辛酉秋八月遇賊被執脅令降不從厲聲罵加  
以刃罵益烈遂罹害子三長淪泉邑庠生餘俱克守家範  
云

尹炳忠六品軍功馬兵也軀偉力强爲前饒州營參將楊錦  
斌特獎收爲義子令從楊姓易名飛維嗣因建郡告急隨  
斌赴援力戰陣亡時同治癸丑春二月十六日也事上得  
旨優卹給雲騎尉職奏明歸宗襲職以總麻服姪尹紹先繼嗣  
承襲

上饒縣志

忠義  
卷十九二

三

葉毓澣葉印孫邑南羊石里人素安本業躬耕隴畝而稟性  
狷守不爲非義奪咸豐戊午春二月逆賊擾村繫脅澣等  
導詣各富室搜括金錢澣等峻拒不從齊聲大罵曰爾輩  
歷年行劫惡貫已盈不久定膺顯誅吾係良民豈屑爲寇  
盜助虐耶賊怒甚駢戮之

鄭鉅鑑邑南周武賈人性耿直咸豐戊午春二月因賊竄擾  
避匿附近羊石里深谷未幾賊搜山執鑑問有豔婦否鑑  
痛罵斥爲無恥脅令降堅不從罵愈厲賊怒叢刃之洞胸  
斷脰罹禍甚慘



董尙愈邑南三十九都人年老力强咸豐丙辰秋八月因寇氛將逼攜次子達勝避匿本都松關嶺踰時賊搜及令同降愈厲聲怒斥曰吾儕係良家子豈屑與狐羣狗黨伍耶奮掣賊肘脫達令遁比達去而他賊適至愈遂被屠

高祖學祖坡同懷昆季也世居邑南陸村磨石山因質魯受給室廬爲里豪所奪棲止無所僑寄附近高泉禪院咸豐戊午賊竄郡境散擾鄰村兄弟持械迎擊被圍駢歿

高祖堅高祖均楊金涵均六十二都水南人堅均充邑團練勇金涵充郡營守兵咸豐乙卯春三月二十三日城陷遭

上饒縣志

忠義

卷十九二

三

屠同罹害

何錦標邑南五十四都人充廣義軍中營哨長咸豐丙辰秋八月初二日隨營主駐防貴溪血戰陣歿

王清發邑西農家子也性耿介能自守咸豐丁巳春三月逆賊擾境入室搜捕挺身抗辯繼以怒罵遂被殺

何永元邑南船坑人性勇敢善技擊咸豐戊午春二月十七日粵匪擾境元率眾迎擊連日均獲勝仗十九日復與賊戰賊佯北元追至鐵家阪被圍殞命

曾道榮邑南橫石源人咸豐戊午春二月間粵逆擾及近村



高山隄與弟道貴急率鄉團堵截戰敗均歿於陣

孫思壙邑南雙溪人同治甲子春正月賊入境被執脅令降不從厲聲罵賊怒刃之

孫升居邑南黃坑橋人咸豐戊午春二月因隨鄉團赴近村田墩擊賊歿於雙谿橋畔死後猶手握兵仗未釋也

程世寶邑南瑤上人幼貧而孤比長母老動止維艱昕夕依依服勞罔懈咸豐戊午髮賊入境寶與胞兄世唐持械協擊戰敗陣歿死後猶手長矛腰利刃凜凜有烈氣事聞得沐優卹

上饒縣志

忠義  
卷十九 二

二齒

程世旺邑南瑤上人素仗義咸豐戊午春二月髮賊入境旺捐米炊供團丁二百餘督令出擊立斃數賊賊稍卻尋復蜂擁來攻眾潰旺負重創怒罵而歿室廬遭燬殆盡事上得沐優卹

翁新發邑南田墩義民也咸豐戊午春二月逆賊擾境猝不及避被擒入營威脅三日堅不肯降連聲怒罵粒食不進至黃宅橋遂被殺

彭元裕邑南義民也性果敢負膂力咸豐戊午春二月賊竄邑南擾及井隄眾皆匿避裕獨持械迎擊連傷數賊嗣因



他隊賊黨遙見來助遂被圍殺

潘德邦邑南農民也素明大義咸豐戊午春賊竄都之上青湖當集團丁奮力協擊奈寡難敵眾連被重創邦弟德旭見兄危急率子永齡赴援同死於難嗣經由學彙詳請卹沈紹周邑南流源坑義民也咸豐戊午春二月因赴瑤峯擊賊失利被迫且戰且退漸抵里居周母周氏見子孑立無援攘臂往助斃死賊刃

沈紹多邑南流源坑人稟性激烈嫉惡如仇咸豐戊午春二月因賊逼瑤峯馳往截擊戰敗遭屠遺骸被滅徧跡無蹤

上饒縣志

忠義  
卷十九二

三

王元遠陳仕彩邑南農家子也素好義有俠氣咸豐辛酉秋八月因逆賊擾境分道堵禦遠赴火心阪迎敵彩赴東田阪截擊不幸戰敗均歿於陣

鄭臻字上理號允極邑南下巖諸生也生平志潔行芳鄉里推爲端士咸豐辛酉秋賊忽壓境臻以齒衰艱步不及遠避遂爲賊得脅令降不從挺身罵斷其右臂罵益厲復叢刺之罵不絕聲而歿

邑南監生余序仁文童余乃球武童陳晉明素相契洽均明大義咸豐戊午春二月賊至湖山仁等急集丁壯數百馳



赴堵禦嚴守三日賊不得逞嗣忽分隊環攻力難兼顧因而潰敗民人余錫華陳晉豪余永顯陳殿求余觀壽陳賢俚余慶元余德洲余純流余廷翰余仕勇余廷詔余漢川余漢琴余漢球等百餘人均歿於陣三人當被生擒不爲威懾挺身怒罵踵斃賊刃

何毓海邑南五十九都勇士也夙精技擊膽畧過人咸豐戊午春二月十七日髮逆散擾岑坑海率丁壯赴隘堵禦擒斬數賊賊駭遁去至十九日復來肆擾又經擊退不料二十日黎明賊忽大隊擁至繞道四進海慮勢孤莫敵適值

上饒縣志

忠義

卷十九二

三六

族人永剛等領眾二百餘前來遂與併力協攻柰腹背受敵力難兼顧遂致潰敗海與剛及本族永祈永智永桂永生永富永成永勇永稿永順毓蘭毓貴毓喜毓安毓儀賢德賢怡賢恤等悉殉於軍村中室廬被燬計十餘所婦女遭屠者數亦踰十焉

李正榮邑南諸生也性剛直慷慨激昂高自期許每與朋儕晤輒揮麈掀髯縱談古今忠孝軼事殷殷景慕咸豐辛酉春賊竄邑南立欲齊圍出禦奈眾寡相懸慮難制勝遂繞道赴城乞師行至河濱猝與賊遇被擒入舟勒令降不從



厲聲罵加刃於頸不少沮罵如故賊怒投諸烈燄罹禍甚  
慘子廷燮邑庠生

葉春貴邑西農民也性倔強有俠氣咸豐辛酉遇賊被執義  
不肯降厲聲辱罵賊怒刃之

熊開榮字秉鈞邑西儒士也性聰慧自幼勤學無外慕髫齡  
出應童試被別不餒益肆力於古師友目爲大器而孝念  
純篤咸豐辛酉秋八月髮逆竄境闔室遠避祖母徐年踰  
耆艱步履榮不忍去翼令前抵白水梗小澗深廣數尺徐  
莫能越超過卸裝還負徐遷延踰時而賊突至遂被執勒

上饒縣志

忠義

卷十九二

三七

令降不從放聲罵徐屢呵不聽罵益厲日無父無君是禽  
獸也吾豈肯效若輩所爲哉矧祖母垂暮臨險阻微吾疇  
護繫榮賊有憐色而他賊傍睨良久怒榮不屈立刃之時  
年甫弱冠云

龔肇洪邑南安坑人稟性恂謹素明大義自軍興來奉諭集  
團備歷艱辛咸豐戊午賊犯郡境擾及安坑脅洪令降誓  
不從賊挺身辱罵遂死賊刃

張連元字錦山從九銜初田郡營行伍代理高洲額外旋調  
江潯外委繼任貴溪把總道光壬寅甯波擾以哨長隨營



駐防餘姚凱撤後因母老力辭出營隱於市咸豐間寇氛  
逼郡疊奉憲諭協理本坊團務八年春警報日急奉親避  
居邑南茅店無何撫建賊傾巢竄浙蔓延各村幾無生路  
忽聞黃柏墩地廣人稠四方雲集正議齊團力拒遂毅然  
往比至賊蹤將近踰時被圍急與村眾各持兵仗聲言殺  
賊賊稍卻俄村眾燃火器斃數賊賊怒號抵死入遂被執  
時二月十八日也越數日有近村老民自賊中出謂元被  
執時賊偉之欲迫之降繫至肇墩元堅不屈沿途辱罵并  
飛足傷賊因罹害子子庚邑廩生

上饒縣志

忠義

卷十九

三

余德峻邑南上瀘諸生也稟性端方素明大義咸豐戊午春  
二月逆賊入境執峻令降峻不從放聲罵賊怒賊其耳罵  
益烈遂被殺

陳辛酉字思賢邑南四十五都人性剛毅咸豐戊午賊眾壓  
境辛率弟思德思敬姪文濂隨鄉團禦賊戰敗均歿於陣  
陳懋魁邑南國子生履泰季子也性果敢嫻武畧每聞粵逆  
猖獗輒怒髮衝冠拔劍起舞饒有古烈士風咸豐戊午春  
二月賊竄邑境擾及本村魁率眾出擊賊敗遁嗣賊狡乘  
更闌人散銜枚突至遂被賊



葉嵩高邑南四十八都農民也子居田畔素無家累而心雄  
膽壯膂力絕倫咸豐戊午春二月賊黨散擾鄱陽阪高見  
髮指隻身持械猛擊賊負創遁移時賊眾紛來四面環攻  
高力竭陣歿

楊克仁邑南三十九都人性剛直生平解釋忿爭倡建橋梁  
不惜貲年踰耄以齒德兼優舉飲賓咸豐辛酉秋八月因  
聞寇警避匿應家口村莊無何賊至被執脅令前導覓豔  
妝搜金帛仁痛斥曰逆天害理如此吾豈肯爲爾導先路  
乎賊怒立斃之子先春附貢生

上饒縣志

忠義  
卷十九二

三五

張華玉邑西農民咸豐辛酉因髮逆入境偕族人慶孫華遇  
茂發鄰人周新旺周榮旺何茂榜何連喜李春邦等督率  
各村丁壯協擊不幸戰敗駢首陣歿

方建仁世居邑南素以義俠聞咸豐戊午春二月賊由鉛邑  
十三都竄擾本邑葉村被民人陳夢仇潛燃火器斃其一  
賊遂蜂擁壓境仁見賊隊大至急糾村眾迎擊賊初佯北  
俟仁乘勝窮追伏發環攻仁與邵學香邵學閏邵仕三張  
九義吳書宰等均陷重圍而斃

顏茂欽邑南四十五都人膽壯心雄不避艱險咸豐戊午春



二月賊擾松嶺欽率弟茂智及鄰張會龍糾集丁壯數百  
赴隘堵禦相持半日賊不得逞嗣賊忽分隊繞趨仄徑潛  
入四面夾擊村眾洵懼潰散三人鏖戰重圍俱殉於軍  
顏榮敬邑南四十五都人性耿介能自守人難干以非禮咸  
豐戊午春二月賊竄西坑繫榮令降堅不從威以刃放聲  
大罵延頸受戮而歿

張慶患邑南四十九都農民也素勇悍咸豐戊午春二月賊  
改裝肩負充作鄉民溷入梅樹嶺慶忽偵知持械急追他  
賊聞覺齊聲大呼蜂擁而至遂被殺

上饒縣志

忠義  
卷十九二

二十

吳九孫邑南四十九都人夙精技擊負膂力咸豐辛酉秋八  
月賊隊散擾小船坑孫途遇持棒迎敵賊稍卻嗣因賊眾  
紛至獨力難支遂歿於陣

余大茂邑南上瀘人性剛直負豪氣稀齡旣度壯志猶存咸  
豐戊午春二月猝於通濟渡口遇賊羣向苛勒餅金茂厲  
聲怒拒責以大義躍入深淵而歿

金於斯邑南四十五都人素負俠氣咸豐戊午春二月聞賊  
氛將逼方謀集眾堵禦不料夜漏三下賊忽蜂擁而至獨  
力難支遂膏賊刃



陳細蘭邑南上瀘賈人也質幹軒昂風裁峻峭咸豐戊午春  
二月髮逆擾境脅蘭令降堅不從厲聲罵曰吾係清白人  
家子豈屑與亂賊伍耶賊怒斃以火裂其屍

方元章號玉峯由太學生援四省捐例加銜奉直大夫世居  
邑南松嶺性剛直雙瞳如炬精光四射每遇不平輒義形  
於色咸豐戊午春二月粵逆竄境擒章脅降矢志不從放  
聲大罵遂罹害子長發報捐同知銜

李熙和建昌南城人曩在郡市開設萬和藥局咸豐乙卯寇  
氛日逼奉前令蔡公委協同候差從九沈岳齡監造水馬

上饒縣志

忠義  
卷十九二

三

比賊圍城與沈隨蔡率勇登陴竭力防守三月二十三日  
城陷殉難事聞經列憲詳請議卹并製神牌附祀蔡公祠  
陳大通邑西三十四都人咸豐庚申冬十月因賊犯境集團  
截擊鏖戰一日賊來愈眾狡肆夾攻遂與族人大時式鍾  
學文大華大宇式萬旺祖等殉於軍

祝瑞福郡城營書耳頗知大義咸豐乙卯春三月城陷被執  
自念素飽軍糈合圖報効誓不降過告

吳福山邑北裏十都農民也素明大義咸豐戊午粵匪竄境  
被執不屈怒罵以殉斷脰剖腹罹禍最慘沈道憲義而哀



之詳請優卹

邱上達國子生祖籍廣昌今隸上饒咸豐乙卯春三月於城南水尾遇賊被執堅不肯降怒罵捐軀事聞經前陞憲楊詳請優卹

徐春齡號漆圃靈北雙谿人幼具夙慧穎悟絕倫肄業信江爲銘禹民郡伯鑒賞目爲雋材道光己亥膺鄉薦尋復援例晉秩內部副郎性度恢廓每值義舉樂爲倡辛丑後雙谿橋圯往來病涉春獨力修復下基以石上跨以木俾垂永久又沿谿南岸一帶五百餘丈荒冢壘壘坍塌於水者幾

上饒縣志

忠義

卷十九二

三十一

半春會商闔村醵金修砌完固并樹雜木禦狂瀾餘冢獲保行旅稱便素懷壯志雅喜談兵聞亂集團備歷艱辛咸豐乙卯城陷羅忠毅公率師來援奏凱後將赴饒郡春爲籌備軍糧躬親督運羅深嘉獎賞給功牌嗣因逆賊連踞邑東沙溪南岸壘經督團防堵殲斃多賊踰年復增募丁壯赴浙助剿不幸失利折傷甚眾歸後因念逆氛未靖素願莫償賚恨以歿

德懷德陞均邑南十里老民也姓張氏咸豐辛酉秋八月賊突入境懷等以齒衰艱步弗克遠遁同被執露刃脅降堅



不從齊聲罵賊怒駢戮之裂懷遺骸投諸火截陞脣舌擲諸溷

鄭忠謨邑諸生世居五里淤慧根夙具克承家學而品峻行芳著稱鄉里咸豐庚申冬十月逆賊犯境執謨令降厲聲怒拒責以大義賊立斃之

鄭宗堯邑東五里淤太學生自幼勤學童試屢列前茅而稟性剛烈嫉惡素嚴咸豐庚申冬十月賊至堯激勵團丁出禦戰敗被執義不肯降大聲痛罵遂斃賊鋒

鄭學林邑南村民咸豐戊午春二月因聞寇警挈眷避匿附

上饒縣志

忠義  
卷十九二

三

近深谷踰時賊登山搜及林袖石猛擊中賊顛賊顛巖斃無何眾賊至肆屠戮闔家五口俱慘死

邱雙鳳邑北九都人年衰志壯咸豐辛酉秋八月髮逆散竄都之黃泥嶺鳳見髮指隻身出禦初獲小勝嗣因他賊踵至夾擊遂負重創斃

賴新和邑北塘底人軀雄力勁咸豐戊午秋七月因髮逆竄犯玉境將逼蘇村奮隨團眾赴隘堵禦力戰陣歿當經道

憲沈轉詳請卹

鄭光斗邑東五里淤諸生也素剛直風格嶙峋見非義立斥



不貸自軍興來奉諭集團星霜幾歷咸豐庚申冬十月寇氛突逼斗聞警皆裂督丁痛剿賊稍卻嗣因賊眾大至戰敗被擒露刃脅降毫不畏懾挺身怒詈曰吾脰可斷吾身不屈請速斃我俾得首邱伸頸受刃而歿

卜彭壽邑南劉家鵠人素嫻武畧膂力絕倫咸豐辛酉秋八月因賊擾新昌偕眾協擊被圍陣歿

童秋發邑北西山農民也性剛烈素具血忱咸豐戊午秋七月因髮逆竄犯玉境奮隨團眾馳赴蘇村關隘堵禦援枹而鼓壯人銳氣未幾賊眾入關毫不畏懾抱鼓拒戰力竭

上饒縣志

忠義  
卷十九 二

三

陣歿當經團局紳董呈報列憲轉詳請卹

辜采燮邑北樓村人膂力超羣咸豐戊午秋七月因賊犯玉境偕眾馳赴蘇村關隘防堵力戰陣歿事上得沐優卹

徐榮貴徐召南徐長松靈北雙溪農民也形並魁梧力皆勁健咸豐間隨邑紳徐春齡赴浙剿賊奮勇鏖戰先後陣歿

鄭廷橋鄭紹春劉志道邑東青金山農民素具血忱風概凜凜咸豐戊午春二月賊忽擾境闔村驚遁橋等獨畱因被執勒令前導堅不去脅以刃不少沮齊聲罵曰吾儕雖力作田間亦嘗側聞君父大義豈肯爲賊前驅耶伸頸受刃



而斃

施袁喜邑東青金山人年甫踰冠膽壯力強咸豐戊午春二月因寇氛將逼出村偵探猝與賊遇被擒入營苛勒金幣給以赴家領取賊遣三人尾其後比至喜乘間奪賊矛還刺賊惜不中卒爲賊殺

張志高邑西布衣也素明大義咸豐辛酉秋八月髮逆竄境率團急禦戰敗眾潰隻身酣鬥力竭陣亡死後猶持矛不釋凜凜然有生氣

張盛榮張秋壽邑西農民也咸豐間賊入境均被執挺身抗

上饒縣志

忠義  
卷十九二

三五

辯義不肯降遂駢死

江成德世業農咸豐戊午髮賊擾境率眾協擊戰敗歿於陣  
辜采旺邑北婁村人軀強力勁咸豐戊午秋七月因賊氛將逼奮隨各團馳赴蘇村隘口堵截不料賊眾大至蜂擁入關旺衝鋒鏖戰致陷重圍而歿當經列憲詳請優卹

余玉堵邑南上瀘儒士也篤學能文咸豐戊午春二月遇賊被執義不肯降厲聲怒拒遂遭支解而歿遺骸徧跡無存  
鄭祖義邑東青金山人性強毅負勇力咸豐辛酉隨邑紳徐春齡赴浙剿賊力戰陣歿



王文光廣信營馬兵以疊次防守郡城出力於咸豐五年賞給六品銜八年保舉儘先外委九年八月署理廣豐汛事十月管帶豫勝軍左營後哨十年三月督率本哨勇丁馳赴貴溪防剿於十五日與賊戰於邑南之官莊力竭陣亡當沐

恩旨加贈外委銜優給卹銀附祀馬王廟昭忠祠

周發孫城居細民也素明大義咸豐乙卯春三月賊陷弋邑闔郡聞警悉出避而發獨留於二十三日隨官軍登陣守禦投石奮擊自辰迄申不少懈北城陷遭屠死於寶澤樓

上饒縣志

忠義

卷十九二

三六

畔

蘇龍彪邑南黃柏墩人夙精技擊膂力絕倫咸豐戊午春二月十九日黎明偵得逆賊蜂擁壓境急督團丁三百餘人馳赴鄰界坳口截擊自辰迄午鏖戰多時奈眾寡相懸力難久支遂與蘇龍桂蘇章梧蘇章旌蘇章雷蘇章廩蘇章富蘇章理蘇章吉蘇章采蘇章右蘇章穩蘇鳳清蘇龍連余國球等均歿於陣當經呈報請卹

陳瑞和邑東村民也稟性正直勇於赴義咸豐戊午逆賊入境偕弟瑞金率眾協擊連斃數賊乘勝追至附近山岡賊



忽大隊擁至均被圍殺

翁興寶世業農現居邑東田裏性耿介守正不阿咸豐戊午春二月因粵逆擾村督率二子祥義祥吉暨族人金林集團出禦連斃多賊賊稍卻尋因賊眾紛至環攻遂大敗長子被屠裂屍次子洞腹號泣二日而絕寶與金林亦相繼遇害

鄭廷溫邑東樸誠良民也咸豐戊午賊至被執勒令引導堅不肯前賊怒殺之

鄭紹元邑東謹厚小民也咸豐戊午賊忽入境繫元苛勒金

上饒縣志

忠義  
卷十九

三七

錢元厲聲罵曰吾縱多藏豈屑資賊賊怒以香熏其鼻終不屈遂被殺

陳晶俚邑西榜石嶺九十八齡壽民也咸豐辛酉秋八月賊竄踞晶廬晶見怒斥賊以齒耄不加刃曝諸庭日遣人供以簞食晶污之不朶頤絕粒數日斃

李祥毓邑東眉鵬人夙嫻武畧咸豐戊午春二月聞賊踞附近青石橋村莊急率丁壯馳赴本村險隘堵截踰時賊大至祥衝鋒先登族登元登祿鄰吳滿憲劉衰金等踵後接應敗於賊慘遭屠裂而歿祥隻身倖免陟峻嶺遁賊遣八



人持矛追及環刺祥而矛悉爲祥奪弗克中嗣因他賊潛荷巨刃從背後刺其顛遂立斃

葉善良大嶺底人咸豐戊午春二月初八日賊踞青石橋村莊擾及伊地良偕族人善清祥興祥富永旺永賢永東鄰人徐順忠李學榮暨鍛工老益率眾出禦相持五日賊弗獲逞村中眷屬得以乘間逸出避匿他所不料十二日當午賊眾大至四面夾擊良等一十八人均陷重圍一時慘斃

楊月丹邑南白沙人咸豐戊午秋八月聞賊擾及墩家蓬村

上饒縣志

忠義

卷十九

三

莊奮持長矛隻身出禦戰敗遭戮

官新壽邑南六十三都人咸豐戊午秋八月因賊犯境隻身出擊戰敗被擒不爲威屈厲聲痛斥遂及於難

李國富邑東下源人昔投軍營充當義勇咸豐乙卯因隨營主林馳赴貴邑上清剿賊戰敗殞命

邱熺財邑南鄭村人咸豐戊午秋八月因賊散擾及村奮荷巨刃隻身禦賊戰敗被戕

徐聖玉邑東坳裏人與子慶球均精技擊咸豐戊午春二月玉因逆賊竄逼近村與球激勵丁壯赴隘防堵相持半日



賊不得逞嗣因賊黨四至眾悉奔潰父子二人鏖戰重圍力竭駢歿

榮懃位良均邑東塘裏人姓徐氏素精火械咸豐庚申因賊竄本村率眾出擊立斃一賊嗣因他賊踵至環攻眾潰二人酣戰重圍身被多傷而歿

鄭新德邑東山後人咸豐庚申因賊將逼境督率丁壯赴西嶺堵禦未幾賊環攻眾奔竄新隻身酣戰陣歿於下山塘周大光與子高生均嫺武畧世居邑東院前咸豐戊午春二月賊突入村同被裹脅隨行數里高乘間掣賊佩刀猛揮

上饒縣志

忠義卷十九

三

立斷賊脰他賊駭矚蜂擁來援父子一時慘斃

翁與旺陳六指均邑東田裏村民也咸豐辛酉秋八月逆賊入村搜捕同被執勒令降堅不屈齊聲罵遂駢歿

婁國棟邑東婁村鋪人咸豐戊午賊犯邑境途遇被執脅降不從放聲怒斥慘罹賊刃

詹光宇邑東詹村鴨人咸豐戊午春二月初五日因賊竄廣邑逼近里居偕族永發清靈清品鄰謝細老等督率丁壯數百馳赴詹昌嶺防堵五閱晝夜連次接戰斃賊三至初九日正午賊眾大至環擊光等皆北遁入本村賊乘勝追



及均斃之并火室廬七所

朱立達邑東下朱陽人咸豐戊午逆賊肆擾執達令降挺身怒拒賊刺以刃拒愈峻遂膺重創斃

黃慶瑞邑東後村人咸豐戊午春正月逆賊入村繫慶勒降不從痛加鞭撻終不屈連聲罵賊怒刺之洞喉而歿

徐新圍邑東二都人咸豐辛酉賊忽東竄擒新入營勒令歸降新義形於色痛斥不從賊立斃之

鄭瑞通邑東麥山底人咸豐辛酉逆賊突至入山搜捕獲通欲牽入營堅不肯前放聲辱罵賊怒屠之裂腹而歿

上饒縣志

忠義

卷十九二

四

宋振鴻邑東七十都人性溫厚見文人輒傾慕敬禮有加遇忿爭立解釋不使終訟而待宵小素嚴峻不少貸咸豐辛酉秋八月賊東竄肆擾入室搜括執鴻脅降義不肯從大聲怒斥遂斃於賊

陳如金邑東陳家坂人力壯膽豪咸豐辛酉秋八月賊逼里門隻身截擊賊踏顛裂嗣因他賊聞覺蜂擁來援叢刃之身負鱗傷歿

方履孫鄭新高邑東靈谿人夙充邑防散丁咸豐乙卯圍急因隨前令蔡公登陣固守不幸城陷同時遭屠



楊懷元邑南三十九都儒士也咸豐戊午春二月因賊逼近襁負晬齡嬰孩避匿五十五都黃柏墩村莊未幾賊至被執脅令隨行不肯前怫然作色曰情甘速死不願從賊賊忿甚戕其子以示威元又不肯前遂踵斃賊手

葉錦屏字繩祖邑南羊石里人宅心寬厚植品端方壽躋六表以齒德兼優舉鄉耆而襟懷鎮定履險如夷咸豐辛酉秋八月賊氛逼近里居恬處一室毫不驚避賊至見屏餽以甘言細詢金帛匿何所不答威以刃亦不懼厲聲斥曰吾縱多藏詎肯資寇助亂耶賊刺其臂徑去屏負重創醫

上饒縣志

忠義  
卷十九二

四

治弗痊浹旬而卒時年已踰耄云

徐田嶷邑東青金山人膽氣素豪勇於赴義咸豐戊午春二月賊踞鄰村擾及伊地田急持械率眾出禦賊稍卻嗣因他賊紛至眾悉驚遁田以隻身鏖戰歿於重圍

徐慶禮字經三邑東王家橋諸生也自幼嗜學比爲人師督課甚勤四方爭附門牆貧兒從遊體恤倍至殫心教育不計修儀壽踰八袞目擊四代而風裁峻峭壁立千仞咸豐辛酉秋八月髮逆入境執慶令降慶厲聲怒拒曰吾讀聖賢書豈屑與亂賊爲侶耶賊立刺之中喉斃



陳位燦邑東陳家源人性嗜武負勇力咸豐辛酉秋八月因賊逼里居率眾猛擊連斃數賊賊駭遁尋復糾合他賊蜂擁回攻眾莫能當紛紛奔竄燦以隻身酣鬥力竭被屠維時燦妻徐年甫二十三雖經懷孕而男女未卜人皆慮其乏嗣乃踰月而子希珞誕焉一綫宗祧藉以得延徐念夫歿子幼情甘孀守不他適

大倪衰倪同懷昆季姓梁氏邑東梁家村民順發子也夙充廣義軍中營散丁咸豐丙辰因營主郭守謙駐防貴邑鯨鮪灣爲賊所敗協力救護義不私遁與郭同陷重圍而歿

上饒縣志

忠義  
卷十九

三

順發一脈遂致中斬

紀德錕號安邦世居城內福星觀稟性正直不爲物撓咸豐戊午因寇氛日逼挈眷出城避匿邑南游鳴不料二月二十日賊忽分擾入村搜捕執錕脅降錕峻拒不從連聲大罵賊怒刺以長矛洞喉而斃比賊退驗收遺骸凜凜然有生氣焉

劉正高劉昌賢劉達芝均城南劉家塢人夙充廣義軍勇丁咸豐丙辰同隨營主郭守謙馳赴貴邑鯨鮪灣剿賊戰敗

駢亡



劉昌雲城南劉家隄人咸豐辛酉春正月聞賊至附近土家  
塢隻身持械出擊爲賊所敗而歿

劉天福蔣太喜邑南六十二都人咸豐辛酉秋八月因賊竄  
擾灘頭持械協擊惜爲賊敗駢首就戮

鮑春桂城南水尾人咸豐乙卯因逆賊散隊入村滋擾奮力  
擊退乘勝躡追迨至半途突遇他賊來援歿於重圍遺骸  
被裂越三年戊午賊復犯境桂子大秀痛父遭戮手挈雙  
刃衝鋒酣戰連斃數賊嗣因中礮遂殉於軍

周善應邑東周家隄人咸豐戊午春二月初六日因賊將逼

上饒縣志

忠義  
卷十九

三

里門偕族貴福繼連率眾堵禦相持旬餘賊不得人不料  
十七日賊眾大至善等駢陷重圍而斃

鄭德輝邑東征隄人咸豐戊午春二月賊入輝家苛勒金幣  
輝厲聲峻拒義不資賊遂遭戮

林德峯邑南北岸人咸豐戊午夏四月因賊犯鄰村將逼里  
門急集丁壯赴隘堵截奈彼眾我寡力難久支遂致潰敗  
身中叢刃而斃

章金溶邑防勇丁也咸豐乙卯春三月二十三日城陷與賊  
巷戰力竭被屠



程侯富邑南志士田農民也咸豐戊午春二月間鄰都聚眾擊賊奮勇往助自十五迄十七三日與賊戰於島山十八日與賊戰於黃宅橋十九日薄暮賊忽潛至縱火尋即逸去未經對壘二十日與賊戰於本村初獲小勝嗣因被圍陣歿於井坵田畔

潘宗嫌邑南倉墩人咸豐戊午春二月間逆賊擾境忿甚立糾丁壯伏隘截擊相持數時賊弗獲逞嗣因賊眾紛至四面受敵遂被重創而歿於陣當經由學詳請優卹

吳季鴻邑南諸生也於咸豐辛酉秋八月督率丁壯馳赴廣

上饒縣志

忠義

卷十九

四

邑二十四都東坑嶺剿賊力戰陣歿事上得沐優卹

吳正揚吳達才吳道亨吳維良均邑南義民也咸豐辛酉秋八月逆賊犯境被脅不降齊聲怒斥駢罹賊刃

蔡瑩城西諸生也僑寄六十五都田裏咸豐戊午秋八月賊擾村繫瑩勒降義不肯屈厲聲峻拒慘斃賊手

廖林嶺城北廟背人夙充邑防散丁咸豐乙卯春三月城陷奮勇巷戰力竭被屠

葉良浩城南六十二都人咸豐辛酉秋八月因賊氛將逼避居附近楓鳴村莊踰日被賊搜及威脅令降誓不肯從嚼



齒怒冒身被重創而歿

徐至魯城南六十二都人咸豐戊午秋八月突被賊執不爲  
威屈整襟危坐責以大義賊怒連刃之裂體而亡

葉正邦水南人夙充豫勝軍水師營戰勇咸豐戊午春正月  
隨營主饒馳赴河鎮九獅港剿賊中礮陣歿饒憫之優給  
卹銀以慰忠魂焉

程伯連邑南志士田人咸豐戊午春二月因賊逼境偕鄰人  
王居禹王居連等協力奮擊被賊環攻先後陣歿

張源遠邑東路底人咸豐戊午春二月賊遣黨散擾突入源

上饒縣志

忠義  
卷十九

四十五

村源隻身出擊戰敗陣歿遺骸慘遭分裂

鄭漢陽郡城北隅人性曠達膽氣素豪年踰壯因姊壻方臺  
陞任陝西宜君營參將治裝趨謁淹留數載咸豐壬子冬  
湖北告急臺奉調赴援陽與俱行及抵武昌臺見賊燄方  
熾促陽速歸陽志切同仇義不退避甘與入城踰時城陷  
整肅衣冠延頸受刃而歿時十二月初四日也

方道中城西太安坊武監生也於咸豐壬子冬十二月率表  
姪童渭水隨陝西宜君營參將方臺防守武昌力戰駢歿  
王煥庭邑南白沙人候選廬州二幫領運千總於咸豐庚申



奉委辦理本幫折變漕艘事務不料四月十三日賊陷蘇城庭隨我兵督勇禦賊奈寡難敵眾遂殉於軍當經蘇省彙奏奉

旨旌卹分別建坊入祠

張志芳邑西三十七都人夙充府書咸豐丙辰奉耿郡伯命辦理廣義軍中營文案嗣因戰敗逆寇稽誅拔劍起舞恨恨不已己未復應聘赴豫勝軍贊襄戎務尋卽隨營防堵貴溪不幸失利被擒誓不從賊怒罵以殉

方城從九銜城西太安坊人稟性溫和持躬謹飭咸豐戊午

上饒縣志

忠義

卷十九二

四

春二月因寇氛漸逼避居邑南石灰坳嗣聞鄰村烏門樓一帶集團堵賊城率子第璋持械往助鏖戰數日父子同歿於陣

潘德明邑南六十一都國子生也咸豐戊午春因賊竄鄰近黃柏墩村莊急集團丁齊赴堵截力竭陣歿當奉列憲彙報請卹

周昌平邑南五十四都老民也咸豐戊午賊忽擾境與子祖崇同被執義不肯降齊聲怒拒遞死於賊

蔡初孫世居城內夙充縣書咸豐乙卯春三月因賊逼城急



率仲子長榮奮隨我軍登陣協守未幾城陷父子慘遭支解而歿

王培槐城內儒士性敏嗜學懷才未遇咸豐乙卯春三月髮逆犯城槐隨各軍守禦城陷被戕

羅景高楚軍前茅花翎都司於同治間隨左帥赴陝甘剿賊六七八九等年疊經出戰嗣以衝鋒過銳陣歿事上得沐

恩卹

黃得勝楚軍中權花翎守備於同治六年冬十二月在陝擊賊效力戎行者歲餘詎料八年二月不幸失利遽殉於軍

上饒縣志

忠義卷十九

七

當經左帥奏請

賜卹

各祠專祀附祀死難諸銜名列後

羅饒二公祠

專祀

羅忠毅公澤南 有傳見武事

饒鎮軍廷選 有傳見武事

附祀

畢定邦 福建補用副將武顯將軍 卹贈 胡定國 副將將軍 卹贈武顯



穆隆阿

福建補用參將

列授

賴高翔

福建補用遊擊 例授 武翼都尉 有傳見武事

屈蟠

布政使銜候選道 誥授通奉大夫有傳見武事

江長元

候補都司 昭武都尉 例授

胡德璜

江西陸用同知候補知縣 誥加道銜 誥授中憲大夫

危廷貴

翼都尉 卹贈武

江雲龍

弋陽武舉前候選守備 卹贈武德騎尉 例

郭守謙

本邑廩生前廣義軍中營統帶 卹贈 文林郎

劉步瀛

前任弋城把總 卹贈 武畧騎尉

何錦標

廣義軍中營百長 龔元標

陳福高

蘇榮標 以上均廣義軍中營什長

吳財喜

蘇德勝

周行順

楊得勝

方可榮

胡四宰

郭明發

陳錦高

劉連喜

林殿西

官文光

陳金照

上饒縣志

忠義 卷十九 二

哭

陳錦堂

以上均廣義軍中營散卒咸豐丙辰八月與營主及百什長陣歿於貴溪張家橋

楊敬如

楊麟魁 以上均廣義軍左右營百長

周仲甫

章步高

楊景高

楊新良 夏壯亮 以上均廣義軍左右營哨長

楊順才

王吉

劉順發 彭林山 張廷邦 以上均廣義軍左右營什長

楊善餘

廣義軍左右營親兵咸豐丙辰八月與百長楊敬如等陣歿於鉛山雙港

鍾守瑢

鍾守瑛

鍾爾輔

鍾爾賓

鍾爾凝

鍾守詢

鍾春廷

鍾守璣

鍾積恆

鍾世維

鍾爾濤

鍾爾璜

鍾一佗

鍾世藻

夏世發

夏南雄

夏瀛洲

彭得勝

剪萬勝

熊連陞

易得鳳



唐禮會 蕭四喜 謝老四 金大鵬 唐九如

侯老三 鄭順三 金國興 劉一新 何政昌

鄧思招 宋長春 周飛虎 鄧得勝 劉湘成

王少五 劉召雄 王得勝 王老順 鄧勝盛

蕭政友 宋學明 李玉美 夏新年 蕭得龍

卿桂龍 吳老才 夏玉春 易逢春 毛天貴

陸積平 剪福喜 彭仇寶 彭得勝 彭高明

熊貴高 趙新發 李得勝 杜如春 以上皆郡防弁丁咸豐間  
歷年守城先後陣歿

楊敬發 禮字軍散丁同治丙寅  
追剿齋匪陣歿

蔡公祠

專祀

邑侯蔡公中和 有傳見  
名宦

附祀

雷封 郡學教授 例授文  
林郎 有傳見名宦

姚益謙 郡經歷奉 旨加贈鑾儀衛經歷銜議給雲騎  
尉世職襲次完時給予 恩騎尉世襲罔替

趙震 郡幕加贈鹽運司知事銜議給雲騎尉世職  
襲次完時給予 恩騎尉世襲罔替

洪立成 貴溪縣丞奉 旨加贈鑾儀衛經歷銜議給雲  
騎尉世職襲次完時給予 恩騎尉世襲罔替

江錫綸 本邑典史奉 旨加贈主簿銜議給雲騎尉世  
職襲次完時給予 恩騎尉世襲罔替

上饒縣志 忠義 卷十九二

四



范焜

邑幕加贈鹽運司知事銜議給雲騎尉世職

黃依先

候選從九加贈鹽運司知事銜議給雲騎尉世職

沈岳齡

候補從九加贈鹽運司知事銜議給雲騎尉世職

楊錦鳳

郡營千總 例授武德佐騎尉 例授武

周得鳳

鉛山營把總 例授武 雷鳴發 郡學教授雷公第

鄭志暄

武生義勇管帶 王文列 軍功六品 劉慶餘 廣昌營把總

楊敬清

武童保舉軍功 李熙和 建昌南 余兆桂 南城人義

姚菊如

山陰人義勇管帶 張國書 郡學門斗 陳福 吳泰 向喜

符元

李靜 袁貴 胡升 韓靖 盧升 劉斌

上饒縣志

忠義 卷十九 二

卒

張福

以上皆各員弁家丁

柏清 羅勝 謝貴 劉福 楊有發

封高

吳金魁 傅桂 丁有元 徐錦標 傅錦魁

夏文標

鄭祥品 全福招 張桂殿 郭正榮

王長標

張金標 王金龍 楊勝發 張松元

周順德

蔣初林 童國安 陶德魁 萬廷標

王元標

高元彪 魏炳華 周全標 曹飛龍

趙勝魁

徐茂發 謝榮 謝德勝 以上皆郡防勇丁 盧鳳山

黃福高

唐得正 羅彪 鄭德明 邱振興 程上元

封德標

傅得魁 蔡吉升 蔣勝 葉炳麒 徐錦宗



徐得勝 張得標 林廷魁 吳志魁 程金鴻 徐高

張得勝 胡玉豐 胡三孫 翁得勝 高元龍

徐松梅 高新仁 劉德 胡元標 徐長貴 周錦發

支伯里 饒德福 柳元標 陳學高 方柯榮 王均

李金標 曾飛 鮑錦春 王定海 胡文 楊德勝

張增達 周連元 章有松 林正邦 趙春貴

黃德高 楊錦標 林廷棟 支木林 徐春發

余善彪 支啓賢 陳步高 熊開元 顏洪貴

林廷魁 張履和

上饒縣志

忠義 卷十九 二

至

以上皆邑防勇丁咸豐乙卯春三月二十三日城陷與  
蔡公以下諸人同時殉難

王吉三 林景聲 劉老忠 徐金發 陳冬德

趙天元 陳添福 張元彪 吳發祥 陳榮發

謝得高 謝潤才 李學祥 周彩庭 王善修

葉慶祥 楊祖高 祝學存  
以上皆邑防義勇咸豐  
間歷年守城先後陣歿

忠義祠

統祀

甘得勝 卜錦元 季宏進 徐廷高 鄭金魁

周仕喜 方勝德 楊得勝 楊先月 余勝標



施廷高 鄭立勳 繆發興 毛月標 周錦彪

王發孫 鄭金良 熊天祥

以上皆豫勝軍親兵營義勇均以咸豐戊午春三月二十三日陣歿於邑東沙溪對岸趙家內甘得勝暨熊天祥等十八人并統祀  
府城隍廟昭忠祠

府城隍廟昭忠祠

統祀

夏朝元 郡營陣亡馬兵 吳廷光 余大勝 祝勝彪 程顯高

劉元慶 熊得高 范得勝 李得雄 項得貴

劉元發 蔡勝榮 姜廷龍

上饒縣志 忠義 卷十九 二

五

以上皆郡營陣亡步兵其豫勝軍親兵營陣亡義勇甘得勝暨熊天祥等十八人名已列祀忠義祠不贅錄

馬王廟昭忠祠

統祀

何世美 江金亮 盧金麟 林金彪 黃定彪

游振彪 余紹雲 蘇金標 鄧有福 饒松勝

周汝霖 吳慶陽 劉得勝 張顯明 詹得勝

魏殿魁 傅長豐 劉振彪 余得勝 夏炳發

林慶芳 楊殿鰲 楊元德 黃東麟 陳勝瑞

廖飛熊 楊洪斌 洪慶陽 楊步高 崔貴麟



王日鴻 鄭志暄有傳 徐得勝 楊志高 繆壽春

劉定國 花燦雲 黃明照 趙得彪 黃步陞

鄭雲龍 黃必發 楊長發 李添喜 謝天和

鄭國賓 蔡鎮邦 童得彪 白廷貴 王文光有傳

徐振彪 饒炳榮 傅應元 林廷陞 何保發

鄒順發 游年喜 劉得明 鄭元彪 董茂揚

曾廣華 張維名 程得高 張金亮 劉金標

張錦福 楊殿華 周得彪 王正標 廖錦榮

高煥章 王殿魁 崔慶龍 魏賢茂 周炳煜

上饒縣志 忠義 卷十九 二

張雲林 高雲龍 甘應龍 楊福龍 楊錦榮

張金福 舒榮 楊敬鰲 葛連魁 焦得明

楊得彪 楊錦峯 楊春發 楊慶發 張得標

許連興 方奎 徐得彪 楊洪彪 楊敬發

李發貴 邵金亮 鄒得彪 高文彪 吳顯榮

李冬林 張步雲 楊元彪 鄧啟龍 楊立行

黃必高 周金餘 王日高 黃日華 何廷彪

童顯彪 徐錦鍾 劉應彪 徐顯颺

以上皆郡營兵丁均以咸豐乙卯春三月二十二日城陷巷戰陣歿



歷年擊賊罵賊殉難諸姓氏列業經立傳及散見他條者不贅

鄭慶連 鄭慶朋 鄭應德 鄭旺德 鄭來德

鄭忠德 鄭壽崽 鄭福廷 鄭昌金 鄭春發

張孝元 黃旺德 朱恭良 朱恭院 朱恭旺

朱進德 朱桃崽 朱國福 朱勝祥 萬窗崽

萬世堂 梁冬孫 朱應茂 鄢以岩 陳一枝

游佑裏 游三崽 游殿邦 郭大佳 鄭盛喜

陳茂興 夏懷德 高煥壁 徐慶壽 支新孫

支芳臺 童元壽 徐春茂 尤拐子 羅勝

上饒縣志 忠義 卷十九 二 五十四

謝貴 劉福 李福 周升 陳貴

蘇升 蘇太 徐吉 蔡莖 江玉麟武生

周維邦武生 翁振彪武生 祝正鰲武生 楊敵青武童 鄒肇魁

張步勝 傅得魁 全福 高陞 林可榮

李可喜 童義發 董長生 高發元 徐振彪

吳廷贅 張步雲 劉得貴 程守英 紀池鳳

邱順福 范鴻樂 徐鴻陞 姚發興 毛朝劉

徐應台 周殿交 周得忠 楊德勝 汪發開

江子茂 彭金標 汪勝泉 江興龍 陳友貴



涂添來 汪鎮標 張慶發 林得勝 江德風

王交旺 鄭連發 洪發祖 李才元 李旺廷

毛金龍 黃祿保 江水固 曾得勝 周元山

張定國 張元喜 陳福來 朱壽高 朱定國

潘得標 趙炳政 汪得勝 阮洪順 夏金龍

陳書禮 徐開興 胡榮山 黃錦標 龔見標

李勝標 朱陽春 朱發春 徐佛祥 徐保祥

江新福 夏金標 陳有亮 鄭福才 邵德明

鄭壽喜 周兆勝 方慶貴 邱有得 方遠喜

上饒縣志 忠義 卷十九 二

邱得順 劉天慶 趙天才 劉壽生 趙仁壽

汪風介 張華林 方天才 江國元 邵伯壽

余長壽 余保生 江壽星 江勝遠 陳百壽

張壽永 張萬才 廖貴 余得旺 何馬俚

何老崽 何立崽 何貴福 何貴彪 何東喜

何踐汝 何四能 何接宗 周官春 周玉林

黃景發 黃運發 黃運壽 何毓成 何賢俊

何象乾 李應德 劉邦榮 劉邦華 劉長俚

劉忠良 劉桂林 周連榜 周貴元 周壽才



周新貴 胡連宗 胡學源 胡光賓 胡志忠

胡得彪 林春旺 蘇元文 蘇元講 蘇小甫

張紹孫 汪懷仁 鄧種種 鄧正忠 張金龍

張日慶 鄭學泗 彭志深 江元明 黃金行

徐長俚 陳溫愬 陳加秀 呂滿愬 李春英

鄧萬三 朱自亮 金老五 周三元 陳天恩

鄭學騰 鄭邦杰 陳春泰 余純錦 郭發漣

鄭瑞鴻 鄭惟芳 楊壽喜 葉細奴 陳萬興

陳春興 鄧德喜 蔡興愬 周庭期 翁見愬

上饒縣志 忠義 卷十九 二

五

盛高倪 程繼祥 詹冬喜 詹勝愬 詹廷芳

李達三 李貽高 姚茂祿 賴至光 鄭殿桂

鄭殿梓 鄭連元 陳惟彪 陳思賢 陳惟金

余榮材 余德和 余漢川 余漢田 龔毓權

羅必慶 楊朝鈞 童樑倪 周維邦 李順

周升揚 鴻紀福 徐良 陳發

蔡榮 劉貴 蘇銓 方彩 馮吉

劉恩 游春 楊芬 何慶 童壽

鄒華 高升 余和 周連 周福



陳相王福饒福張發紀貴  
汪升余吉廖富李忠余邦  
郭正陳松余福陳英陳金  
劉元尹標鄭發劉富傅春  
周勝徐勝樂春李勝徐福  
邱貴胡發諸勲王春邱桂  
鄭文黃明張標徐忠周發  
胡興謝榮尹豐廖洪馮貴  
鄧賢廖福林坤郭元徐邦

上饒縣志

忠義  
卷十九

至

陳洪邱林王順王高陳任  
夏桂曾榮周盛李發尤發  
余華饒發余清李桂何元  
甯魁諸慶陳仁吳興蔣洪  
余青劉春高慶夏福鄭松  
鄧顯王華鄭發俞光徐幅  
周元吳坤丁松徐正繆升  
周榮馮元林慶周標馮發  
徐鳳章洪侯太陳林徐元



周鴻 陳葵 徐富

以上諸人均以咸豐乙卯春三月死於賊

錢貴仁 錢財財 錢畫畫 江承良 江承積

江先冬 林仕俗 林仕結 余新德 余懷德

余學忠 鄆奴倪 鄆狗崽 鄆老品 鄆初俚

鄆德盛 鄆眉崽 郭癡子 鄆六崽 李啓榮

李振川 江元吉 鄭乃相 黎蘭孫 楊立福

蘇佑旺 蘇佑發 全成雙 余遇福 余遇清

楊仁週 楊義週 楊聰敏 高細蒜 高把俚

上饒縣志 忠義 卷十九

五

何東陽 歐仁孫 陳駝子 饒矮子 何長孫

熊尙富 黃明全 張德福 蘇碩恭 鄧邦達

饒孔仁 陳貴華 林侯崽 張孝孫 邵喜盛

章和尙 熊尙忠 黃求寶 楊振政 楊茂楷

張光宗 楊立詔 游景鵬 劉毓珏 劉華壽

余應鳴 郭矮子 何安俚 鄭昌邦 鄭昌歧

鄭思美 鄭光輝 張培 何初福 何新元

何永貴 何毓申 何富孫 何桂子 何潤元

何福元 何學元 何松元 何永剛 何安息



龔立檀 余廷華 郭必仁 郭華春 郭必耀

郭茂林 郭成林 郭泰林 余元芳 余寶安

余瑞堅 余連堅 余廷釗 余廷鈺 余廷鎮

呂朝謙 陳鶴齡 柯良炳 柯念山 柯義料

柯義諳 姜冠德 蔡以坤 許義早 傅惟蘭

陳邦多 陳邦侯 陳欽亨 陳步觀 李長榮

楊妙俚 高世蒜 朱細崽 林貫崽 楊先學

封貴崽 余細儀 毛書崽 翁騰芳 余勝福

余漢琴 余漢忠 汪志杰 鄒文浩 余應多

余文光 鄭浪崽 鄭瑞汀 李恆魁 洪良崽

翁良德 徐景元 方冬崽 余良興 余祖增

嚴春樑 程連喜 周惟崽 李福基 顏坤崽

余純渠 余純潮 彭旺遠 余新發 郭松福

潘懋景 潘懋林 潘淑恭 陳廷朝 傅文揚

傅國熙 許仁楷 郭忠發 柯新喜 柯良耦

柯義徙 雷義柱 姚順興 姚輝崽 徐雙龍

徐鳳初 徐春孫 黃寒孫 何長孫 蕭振懷

蕭振玉 鄭瑞洪 鄭德有 張書鼎 劉志珠

上饒縣志 忠義 卷十九 二 五



鄭老魁 蔡周侯 姚長信 洪響愚 余慶良

邱老七 陳國安 程和尚 李玉麟 邱黃耆

余純德 余錫雲 余金達 周學餘 姜兆雲

姜宗興 姜宗旺 姜文益 姜文舒 姜桂邦

姜洪緒 徐文忠 徐春松 徐連松 徐松齡

邱壽萼 邱槐萼 邱桂萼 邱培萼 吳仁先

李宗財 李堅光 徐良松 楊連吉 高松巨上廬人

以上諸人均以咸豐戊午死於賊

詹承恩 鄒宗訓 黃棻桂 黃豆桂 黃迎春

上饒縣志 忠義 卷十九二

汪新貴 夏初爾 黃秉發 黃炎興 敖廷順

王毛崽 黃發貴 張詩昆 吳其林 鄭長林

張和尚 謝端才 吳倪崽 吳老先 張老添

張端崽 李侯子 梁穀崽 陳福林 傅連壽

林啞子 林水孫 傅檢才 傅榮貴 黃定博

黃福貴 傅良耳 陳龍崽 黃亨連 黃爾提

樂蘭曲 樂梅崽 樂桂接 黃廷聚 黃亨寶

黃亨發 李長情 黃爾和 黃忠川 黃宗邦

黃信足 王有清 樂桂榮 樂桂清 王成孫



林祖仲 林武規 張光明 胡揆宗 楊新德

高樹梧 汪瑞崙 蔡學泰 邱寶崙 徐啓聖

呂建錦 呂佳楷 陳登胡 林華臻 黃景明

張懷宗 祝克勤 葉子祖 陳金倪 徐遠俚

李毓階 葉發俚 陳喜老 詹云賓 祝能榮

祝能標 周新成 曾久 鄭汝良 陳廷元

鄭孝崽 戈紹梅 楊矢水 楊廷開 趙挺秀

鄭雙桂 鄭廷欽 鄭必盛 鄭桂順 黃朝順

詹初德 詹榮賓 詹老田 詹必義 鄭開瑞

上饒縣志 忠義 卷十九 二

詹造芳 詹老五 詹化崽 詹雪香 楊慶和

鄭老四 祝新孫 祝秀孫 鄭可觀 鄭位立

鄭昌武 鄭邦 鄭奴倪 鄭忠五 鄭成方

楊振道 楊振完 黃三吉 鄭愛德 鄭奎元

鄭成貴 鄭腮元 鄭正希 陳啓光 劉元問

鄭連元 鄭日傑 徐端溪 徐學訓 徐新六

鄭錫金 鄭老鼠 鄭徐勳 鄭日隆 鄭在梅

徐學信 鄭時聲 鄭北孩 劉順德 劉桂孫

劉希盛 婁腮崽 婁朝光 鄭五頭 鄭慶貴



鄭老五 徐裕鈞 徐景福 徐殿生 葉接茂  
徐和尚 周榮崽 周老十 鄭丹桂 鄭辛酉  
鄭腮喜 蕭振青

以上諸人均以咸豐庚申冬十一月死於賊

潘有積 夏開祿 謝道季 謝學勤 謝傳富  
黃天壽 李象春 黃月桂 楊關喜 熊滿崽  
詹盛貴 李興裕 鄭瑞崽 鄭冬貴 王天福  
王祥孫 王發孫 楊雅子 陳有良 朱秋崽  
游應揚 連興芳 何崇德 徐清湖 連繼仁

上饒縣志

忠義 卷十九 九二

空

周之棠 徐步鑾 徐鍾靈 李侯子 李阮俚  
鄧坤宰 鄭兩行 曾子慶 詹鳳有 詹遠蘭  
游璣珩 游殿邦 游東發 游長林 游瑞林  
周二保 羅福孫 周五林 周福林 王大昌  
祝狗崽 楊敬福 劉告化 夏運明 柯念洽  
姜應元 張永成 潘積有 葉村人  
以上諸人均以咸豐辛酉死於賊

陳佳堦 余積奇 陳廣瑞 余祖垣 陳烏皮  
余錫其 陳老分 吳貴壽 孫早高 陳己酉



余錫魁	余玉興	王天良	朱茂元	朱新貴
詹高倪	詹黃狗	郭富孫	徐廣堯	徐大智
徐大帆	徐麻崽	蔡永和	蔡德熙	蔡德裕
蔡德安	蔡德修	蔡德益	蔡德章	蔡良相
蔡萬邦	蔡金邦	蔡風順	鄧允枋	何家興
陳夏崽	饒學新	楊成美	潘明德	

以上諸人均以同治甲子春正月死於賊以上新增

上饒縣志 忠義  
卷十九 二



上饒縣志卷之十九三

處士

宋

陳邦獻字叔舉文蔚父也賦性坦直不識人世謀譎尤體物情雖廝役之賤處之有未盡介然於懷少親師訓肄舉子業中年謝場屋專課子孫讀書居後植竹數千箇自號竹亭居士婆娑邱園無世間念年九十四而終克齋墓碣增附黃直卿經竹林題壁詩陰陰席上雲初斂月映窗前綠影餘未向鵝湖分道脈此間舊是竹林居

上饒縣志

處士 卷十九三

游元英字俊卿別號西軒居士遊鄉校錚錚有聲自謂取科第當如拾芥大比試輒不利累應詔但為國子待補生因歎曰命矣夫浩然賦歸耕居士警悟機敏勁挺不阿狗才實有用自坎墮於時無以自見姑即其家而經理之居無何荒者治湮者通缺者備觸事皆有端緒於是自適其適蒔花植竹飲酒賦詩遇佳天氣勝時日與賓友相羊園林中無復身世之憂瀕卒獨惓惓於八十四歲老母語不及他年六十有二卒

克齋文集

元



楊亮字叔明元高士也與錢惟善為友子觀至順二年進士

為翰林院檢閱亮卒錢惟善輓詩有身入波濤親在念恩

沾雨露子登科之句載江月松風集揭文 以上

安集 前志

明

汪文彪隱居讀書有士行每論古今人事得失必折以理不  
事詭隨學者多宗之

周曰庠字倩六十三補郡庠工音律書畫尤精天官家言論  
雨晴休咎無毫髮爽聞懷廟崩嚙血作書與友人訣別誓  
不手刃李賊不復生還竟飄然出門去莫知所終

上饒縣志

處士 卷十九三

二

鄭惠字吉甫幼聰穎十五入泮十六食餼試每冠軍 國初

隱太平山著述甚夥甲寅盡罹兵火以上 舊志

按此傳府志邑前志皆作鄭忠而府前志則作鄭惠今

查惠後裔現聚族本邑十三都僉稱其祖隱太平山者

名惠不名忠雖明世選舉志有賓貢鄭忠其人然係景

泰朝人又為寺丞與傳中僅錄入泮食餼及 國初隱

太平山等語不合則忠字為惠字傳寫之誤無疑茲從

府前志更正前志

按鄭惠明季諸生 國初隱員山菴絕粒殉節周伯虎



序可證也其謂隱於太平者蓋俗傳之訛耳

新

皇清

祝雷聲字震默順治丁酉舉人端方古樸不妄交與以著述

自娛十三年閩變遷跡不出康熙二十三年知府孫世昌

延修郡志壽九十三無疾而終

通志

余清字青子號梅菴賦質穎異讀書過目不忘登壬子賢書

時值閩變遂絕意仕進授徒講貫崇尚理學從遊者率皆

知名士事親至孝友愛真切恥干謁然義所當言則毅然

不退讓會信初平民多困苦董大中丞奉

上饒縣志

處士

卷十九三

三

旨賑濟清力陳民不堪狀乞免地徵遂允其請合郡賴之壽七

十有四著作俱散見羣弟子記錄

周志字孔求邑廩生家貧力學知縣李世珩延主義學數年

不輕投一刺督學沈舉優行

徐達字子上有學行不求進著有靈岫集貧未刊行

余淳字應川貢生性恬退喜讀書學優文富著有存疑集為

當事所推重然雅不樂榮利自築古柏軒廣植花卉與二

三知己恬然吟咏以終

以上舊志

鄭士謨字則文性孝友少穎異博淹羣籍擅詩古文辭杜門



著述終日吟哦新城魯司馬鴻見所作慕而訪之把臂定  
交尤好搜羅古人法帖名畫金石圖書悉置明窗間品題  
甲乙賦詩志賞善書畫草書墨蠲最工晚自號沙潭散人  
所著有春秋直說指要山房榮木草詩稿前志

能配璋字完璞號崑山晚號陸仙性淡泊寡言笑篤學能文  
不宗時尚以故應童試至三十餘猶抱屈一日讀孟氏書  
至趙孟能貴趙孟能賤語慨然謂從弟煦曰吾今而知生  
人之所以必讀書者正自有在遂束制藝於高閣究心諸  
經史子集生平慕林和靖先生之為人凡吟咏未嘗一存

上饒縣志 處士  
卷十九三

四

稟眼則種樹蒔花徜徉竟日距家半里許有馬鞍山為

國初曾祖英所購山勢寬平松篁掩映向築數楹於空谷顏  
曰陸仙窩相傳鄉先正象眉周公所題贈蓋絕妙藏修處  
也璋自艾齡後嘗棲止其中觀魚聽鳥煮茗焚香幾不知  
有人間世咸豐戊午春粵匪竄南鄉多不免見璋輒化暴  
為馴不忍加害論者謂善氣所感云年六十餘歲卒

辜瑞標字建龍號鏡舫邑北樓村人氣宇軒昂襟懷豁達遁  
迹林泉不求仕進幼失怙事孀慈以孝聞昆季五兄三早  
逝惟一弟標痛雁翼遞折友愛季甚篤不藏怒不宿怨迨



析箸分產券成議定因弟得瘠已得腴互易焉以厚弟又  
有人以田求售券約已立欲翻異轉售伊弟而不敢言標  
偵得立召至託以乏貲還其券俾田得歸弟異居後因家  
窘而貨殖及稍裕輒輟業不過求非分時年已踰壯尙未  
弄璋日者謂當乏嗣與妻周謀益力於善無何連舉丈夫  
子人咸稱異目爲善報自是矢志顯揚購羣書延名宿課  
伯子澹讀勸其追蹤先哲以古作者自期澹稟訓勤學不  
少曠踰年遊庠爲學使翁特獎冠全軍澹感知遇益自勵  
直窺盲左腐遷堂奧以古文名道光己亥舉於鄉尋令荆

上饒縣志

處士  
卷十九三

五

楚厯攝安鄉沅陵等縣篆時標適迎養在署聞拷扑聲輒  
愀然色變每慮囚必戒澹詳慎毋枉濫聞澹平反一寃獄  
活一死囚卽喜溢面顏值小旱澇鬻蹙曰歲得毋歉乎民  
得毋飢乎比秋大有而心始快其仁愛爲何如也素廉潔  
不妄取鄰村有負逋者賣金來償掣券後誤遺他金而去  
標拾得稔知其父難明告乃假他故促其子至悉畀還而  
度量汪洋常以忠厚待人或給之不察察卽負之亦不悻  
悻橫逆來歡受弗校焉嘗題燕居楹語有守拙人何等自  
在吃虧處卽是便宜句噫亦可想見其爲人矣見忿爭立



爲解至戚某忤時宦將興大獄要遮至家密勸得寢而某猶未之知也性好客能豪飲每屆花晨月夕輒譙集賓朋縱談今古家居偶暇日以遊釣自娛且遣丹青特寫弄孫采芝圖以寄興昔歲甲辰滄攜至都門當代名流爭爲題詠而今郡學教授蔡公集元適亦同赴禮闈嘗贈以神仙那有子孫福采藥山行一身獨及鏡舫先生學道姿芝田種到謝家玉等句蓋紀其實也其天性高曠於此足見一斑矣子二季於滄者汙業儒早卒孫五長象珩邑庠生餘俱勵志青編克承家學

上饒縣志

處士  
卷十九三

六

宣德三號醉白性曠達善詼諧家貧喜讀書志不在科目工於詩與郭閬仙相友善酬倡甚多著有效顰集待梓惜遺編散軼未克窺其全豹云

應清號敦龐農家子也年十七有志讀書亟請於父弗許乃白於母私就村塾如是者屢父莫能禁遂任之越數年學將成從邑南宿學丁復遊丁見清力學不倦且樸質無緣飾雅器重之遊庠後家徒四壁糞殮不繼惟知以課徒爲業餐糲食藿恬然無憂年逾六十行愈高每攜簞食遊與野叟山僧嘯傲泉石許魯齋云家無擔石儲心有天地春



清之謂也壽至八十有一終

徐啓璣字器之太學生邑北鄭家坊人植品峻潔不屑屑苟且就功名逍遙林下日以典籍自娛弱冠後究心岐黃手不釋卷者數十餘年而於靈素金匱難經等書一一得其秘奧每診危病應手立霍見者詫爲神技纂輯醫經積成卷軸因家貧無力付梓今已散軼無存矣

張景厚字畏三天姿卓越穎悟過人芥視科名不屑時藝而潛心於先儒性理諸書兼究心歷代史鑑爲觀物省身之要慕金華四先生求其書而不得適友人赴蘇路過金華

上饒縣志

處士  
卷十九三

七

購書歸厚已溘然逝矣嘗與曾道誠諸人爲心性道義之交講求正學互相勉勵所爲詩文不少佳篇其李勣論尤今人嘆服卒年僅二十有八弟景銘字訂渠高明不及厚而沈潛過之與兄同講求克治身心之學嘗有句云去私宜法夫爻五改過須如復卦初自合審幾欽茂叔要當求豫效橫渠卽此足以識其梗概惜年二十七與兄相繼歿同學深悼歎焉

曾道誠字存一幼穎悟長嗜學所坐具數十寒暑不移其處性恬靜寡營不求聞達孝親愛弟門庭之內雍雍如也讀



書必究精蘊一切天文算術均能得要領日規月表隨意  
創造莫名其妙尤究心周程張邵朱子之學而皇極經世  
一書洞若觀火爲人幽雅溫和平易質直絕無世俗僞君  
子舉止所著有大學明辨錄未成因勞致疾卒年四十師  
友皆哭之慟云以上  
新增

上饒縣志 處士  
卷十九三





孝友

宋

徐中行字元立政和進士唱名日自陳其父年八十九願以所應得官回授上曰此可厚薄俗詔其父別以官命之祀

忠義祠

通志

按唐書孝友傳序有上饒鮑嘉福虞鎔真皆以事親居喪盡禮詔旌門閭賜粟米前志採信乘續葑謂上饒舊志有鮑嘉祐祐字疑福字之誤又有鄭鎔虞鎔而無虞

上饒縣志

人物 孝友 卷之十九 四

鎔真亦恐一人誤作二人或別有據云云夫考誤必存其本文今舊志已無可徵則後來奚所據以核實且嘉

福鎔真通志亦遺載

舊志

按通志廣信府唐人物傳後載唐書孝友傳尙有上饒鮑嘉福虞鎔真舊志不載附志於此前志

謂通志前遺載誤志

游覺民字必先宣和間領鄉薦大觀初朝廷設立孝友睦婣任恤中和八行大科搜羅遺逸詔諸路監司守臣各舉二人覺民應選赴廷試上舍釋褐登第狀元賈安宅榜由將仕郎新淦縣主簿歷官朝奉郎通判溫州以父母俱不逮





養宦情雲薄乞致仕卒年八十有八弟安民有至性初母  
令人金氏喪未得吉壤覺民忽夢人言傳家塘南峯山可  
葬安後世蕃惟次房不利既覺與諸弟言之安民喟然嘆  
曰母停柩數年煢煢在疚倘獲吉壤死且甘心何不利之  
云誓必葬之後四世果無傳舊志

徐安國字衡仲號西窗紹興壬子進士榜姓龔幼育於龔爲  
龔後爭龔氏父母養生送死克供子職年逾五十爲岳州  
學官迺連山令有感於正本明宗之義言於朝願歸徐姓  
詔可遂別爲龔氏立後而身歸於徐時徐氏之父母俱存

上饒縣志

人物 孝友 卷之十九四

二

兄安仁安蹈弟安通皆無故相與孝養二老名所居之堂  
曰一樂張南軒爲之記以爲義正而恩得焉寶祐間厄於

火謝豐山釀貲重建有疏

據徐氏家乘張南軒前記及謝豐山疏增志

鄭夔字景南建昌南城學判優於學行居鄉孝友賑貧周急  
鄉鄰德之淳祐二年春旦忽大雷電有金龍凌空而下入  
其家化爲銀錢悉進於朝授廸功郎賜本都官莊坂田若  
干石至今子孫蕃衍世名鄭家坊

明

汪仲庸名誠道文學該博事母以孝聞永樂間爲金華教授



入朝上詩乞移就養調本縣訓導

以上舊志

按通志載有王庭槐以孝義稱舊志失載附識於此

方旺山字起元其父應觀豐於財天啓間干戈蜂起鄰近不逞之徒隨在劫掠一夕突入其家搜括財物僮僕皆逃避旺山趨父所父驚極已不能移履乃負之走匿山中賊踪跡至執應觀將鬻割而逼問所藏旺山以身障之曰殺我父盍殺我賊殺之其妻王氏奔至曰夫死矣吾亦甘血是刃賊又殺之賊黨有憐之者曰子孝婦烈多殺不祥遂舍應觀而去至今土殷草碧父老猶能指其被殺處云

上饒縣志

人物 孝友 卷之十九 四

三

鄭仲夔字胄師崇禎貢生幼失怙兄孟孺撫以成立師事王夢暘子遐仲博學工詩母歿賦哀此篇新誠楊思本爲序有云行行苦淚蟬蠹食而不甘字字啼聲枯魚過而加泣及兄卒夔哭以句曰有淚皆成血無言不痛心其孝友性成如此與鉛山費雲仍玉山董思王號南屏三子遊大江南北馬君常歸子慕輩爭與締交晚歲不售以著述自娛有清言若干卷質草若干卷耳新八卷冷賞八卷行世採新冷賞 以上集增 前志

徐勝卿明崇禎時人性至孝無間言父廷相卧病三年醫藥



罔效卿情極因割左股和劑進病乃除無何母又病勢危  
炭復割右股以啖母母亦愈郡伯曹邑侯馬聞之獎以孝

奉雙親扁

據徐氏家譜採入

新

皇清

王德潘字爲瀾邑庠生早失怙家貧事母至孝每食必候母  
先會母病焚香祝天割股以療數罹兵燹雖重蠶十舍必  
負母以行居常乏食采薺蕨充膳終身如一日順治十年  
知縣沈獅上其事前後巡撫按皆給銀絹旌額

按明太祖命禮部定議自今卧冰割股不在旌表之例

上饒縣志

人物 孝友

四

卷之十九四

而有宋大儒真西山崇尚風教有黃章割股救母吳祥  
取肝救父皆行支賞雖或爲名高亦足以風世云耳茲  
仍前志不沒其實其他無事蹟可紀者類志之

周毓華字光仲父結如由國學官司城遭戊子亂客死德興  
黃柏塘藁葬馬墩洲時毓華方幼扶母歸越一十七載往  
收父骨封樹莫辨禱之神有徐老人指示獲骸以歸知府  
曹鼎望司馬侯七乘司李黎士宏皆以詩表其孝感毓華  
亦著風木吟以自傷

鄭世禮字周備邑庠生事父先意承志甲寅父爲賊拘勒餉



幾半載禮不避艱險脫父於難禮逝婦潘能承夫志孝養舅姑如禮子惟鈞及諸孫多遊泮

鄭從華字德英爲人卓犖自好康熙甲寅閩寇至掠其姪九穎去尋訪載餘重金贖歸鄰有富室藏金於從華塘水道中掘溝見之不取偵知爲鄰物告使取之厥後孫天眷舉於鄉人以爲行義之報云

鄭一麟字若麒清潔自好甲寅寇脅之不屈寇平勤理家產妻俞氏紡紝佐之兩弟迭喪撫姪成立給以已業子國光任南昌府訓導

上饒縣志

人物 孝友

五

卷之十九 四

鄭紹淳字重姿性穎敏博學仗義式俗雍正乙卯科選拔廷試畢奉文在監肄業候選聞父患瘋疾遄歸侍藥調食四載不假僕婢形容消瘦人爲危慄淳不自覺也父卒母及弟疊喪遂不復志功名倡立文會捐資置產教鄉子弟始終不倦文風爲之一振值歲饑傾倉平糶知縣汪給扁旌賞里有葬父者侵其地或以告曰人各有父助之可也里黨咸稱焉

鄭再興貧甚父遺洲地兩片可獲粟數石母年六十得癱疾四肢不舉且必爲櫛髮纏足便溺必候時扶抱問飲食而



敬進之衣裙廁牕必謹濯之凡抑搔沐盥溫席扇枕刻不懈如是者十五年田作外有事他往致延緩半日者決不往也乾隆甲午觸熱浴水猝死距母終五載

鄭行健名學乾中書祚遠曾孫也生一歲而孤家產素豐遺命屬從父某經理有女兄長十齡前母祝出也生母紀性嚴毅行健四五歲時姊或受笞督卽纏母裾號泣母亦往往哀止年十八從父始畀以家政旁人交構謂有侵漁行健終以代理爲勞德叔父不置乾隆十六七年旱饑薦至行健傾困以賑減價平糶存活甚衆人謂克承祖德焉

上饒縣志

人物 孝友

六

卷之十九 四

汪甯遠字靜夫貢生少孤力學弱冠赴鄉試聞母病篤星夜馳歸舟過鄱湖阻風滴血告天禱畢風息抵家晨夕調護母竟無恙生平義方訓子樂道人善嘗獨力營建家祠族人興於禮讓其他破堤津梁諸善舉識者謂皆緒餘云

周鎬字武遷母程氏守節撫孤鎬孝行著聞甲寅閩變爲賊江機所擄將加害詰以姓名賊感其孝而釋之郡伯某公扁旌之曰母節子孝子浩字裔昌邑庠生以孝友承家樂爲善里中有吳姓者貧將鬻妻力止之且備恤其家吳氏子孫猶能道之



游城字盛民善心許服賈力養兄弟分爨已數十年臨終出  
藏金七千有奇分給諸弟歲饑出粟六千石賑濟里人德  
之

紀耀昌字又昌號靜齋恩貢生生平力學老而猶勤事繼母  
竭力承歡事兄長推宅讓產導引子姪及鄉後進以文行  
相砥礪邑有公務當事委重焉兩舉優行列鄉飲正賓長  
子徵善庚子進士次應善貢生俱能承父志急公恐後人  
以爲積善之報

鄭志廷字懷赤幼讀書戊子己丑兵荒棄帖括徜徉邱壑日

上饒縣志

人物 孝友

七

卷之十九

以娛親爲事子正宰字公輔母病篤步禱九華與父並以  
孝行傳孫養濬字濟川附監生居心誠樸鄉鄰推爲長者  
鄭森恕字肩仁邑庠生性恬澹嗜學少多病恪守父命寡嗜  
慾謹身飭行年不中壽固非所召致者業師董醅以金玉  
稱之

蔡振宜歲貢生有學行子應科字首掄邑庠生幼失怙恃赤  
貧如洗矢志先業潔清自好不入城市鄉黨重其高節

舊志

劉必達字顯臣天性孝友弱冠喪母善事繼母母前夫子至  
知母有私惠謹避之母語及則請益以贈之族曾孫從子



無依者代爲撫養婚配成家乃聽其去同邑舉人鄭天眷  
學行素優必達高其誼相契甚厚病危以身後事委之卒  
年七十有五

鄭允培字永鄉少失怙兄亦弱齡事孀母盡孝比長以父事  
兄歲臘母命索店租兄故與租店者有隙謂曰不如數無  
歸永鄉僅收其半遇兄於市告以故兄以短收撲之凡三  
次跪而受見者垂涕兄怒亦爲之解歡聚五十餘載分爨  
之日唯兄所命至今里黨猶能言之

以上  
舊志

劉鳳起字功銘一字珣鳴未冠遊庠冠軍試屢高等呈薦與

上饒縣志

人物 孝友  
卷之十九 四

八

父同赴鄉試臨場以父始衰時密進參苓性豪邁不屑屑  
遇合受遺命葬三世先塋殫精青烏家言不爲時術所惑  
事母菽水承歡遐齡含飴樂融融焉兄弟友愛雖析爨分  
多潤寡以爲常散友誼衣服可共克已爲義遇緩急必極  
力矧恤雖不及必曲爲籌畫臨事意思深長解紛息爭選  
選出於不覺其才裕也理父業覃思經術理蘊常夜分不  
寢課子尤篤業必親授次子五子先後領鄉書筮仕孫曾  
玉樹森列膠庠者十餘人

徐應秋字次夏歲貢生家貧力學事親最孝親病篤籲天請



代割股和藥以進得無恙耿逆警告挈家逃避中塗被寇劫泣曰行囊予不靳乞還先人遺像寇感其孝併還之後司訓崇仁以孝弟教士適崇仁令歿攝其篆政簡刑清守欲薦膺民社秋力辭而止卒年八十有三

譚自榮字克和原籍南豐雍正三年攜眷屬遷居上饒克敵孝友勤儉持家置產業分給兄弟後兄弟貧而鬻產自榮代贖還之友愛益篤族鄰感動者甚眾

余紹祖字君成太學生性仁厚尤篤於孝友讀書明大義爲父所器適族漕運被累及父父憂之請於父曰諸弟當讀

上饒縣志

人物 孝友

九

卷之十九四

書繼先業男願移孝作忠遂慨然往公私兩賴晚年復被累罄膳產濟公亦無怨色事九十三歲老母朝夕調護雖老忘疲友愛諸弟敢行義讓教子孫常誦諸惡莫作眾善奉行二語他如保祖祀厚宗誼減價平糶憐貧濟急種種善行不可枚舉邑令王惟一獎以山峙玉潤扁額夫婦皆年近八十以壽終子基乾隆己酉舉人孫聯亨邑增聯第嘉慶癸酉副榜聯錦邑庠聯璧邑廩學博彭鼇爲撰墓誌

銘

丁復字七來歲貢生績學敢行爲文力追古大冢教授生徒



以先正理法裁成之四鄉延聘如不及父歿哀慕終身母  
盲高齡色養無間戊子鄉試以弟某歿不獲視含窆慨念  
此身遠出倘高堂有不測憂抱終天之憾遂歷科不赴棘  
闈其至性如此所著作多散佚僅存信西橋焦石義渡諸  
記子大昕大勳俱邑庠生

劉仁傑字永富太學生誠慤有至性事父母孝兄弟五白首  
同爨一門食指數百計仁傑獨操家政辭逸就勞辭羸就  
縮歷久無間言乾隆十六年饑傾困賑貸濟人急積券至  
寸許不取償久則一炬棄之或袖而納之信江長清浮橋

上饒縣志

人物 孝友  
卷之十九四

十

壞出資助脩復捐田租以贍修葺其善行至今人樂道之  
方欽字帝恭有至性孝事父母承歡如不及父素嚴毅稍不  
當意輒索杖撻無算欽伺其威霽仍依依左右無怨也父  
歿不入中御不飲酒食肉母懼其過毀私取肉食置飯中  
終不忍食母喪亦如之其他善行不勝枚舉後次子溪以  
文受知於邑令王惟一因悉其爲人旌之以額曰 盛世  
純儒

楊祖仁字理全廩貢生弱冠失怙卽操家政克承先志樂善  
好施事母以孝聞事繼祖母委曲承順得其懽心待寡嫂



如母待庶弟如同母弟教孤姪及從孫先後以文學明經  
著名終其身不忍析產寸絲斗粟必公之自祖而下同爨  
者蓋六世云從孫立達爲撰墓誌

童士仁孝友性成齟齬失恃事繼母委曲承順篤愛其兄出  
於至誠伯兄病晝夜侍側病劇涕泣禱於神願以身代未  
愈遂焚香祝天割股肉和藥以進兄疾頓瘳家人不知其  
故也後見其創痕而知之論者謂較黃章救母吳祥救父  
爲尤難云

郭紹字繼遠郡增生方介有至性兄弟六人怡然白首親病

上饒縣志

人物 孝友  
卷之十九四

十一

侍湯藥唯謹及歿守墓一月雷雨不避歲時上塚往返四  
十餘里必躬親年七十二因省母墓得疾歸五日而卒初  
因親病究心岐黃術活人甚多不受謝嘉慶七年饑首倡  
平糶鄰近德之子光雯光霽光霏孫明藻明峻兆爲俱邑  
庠

余紹祐字成蒼太學生弱冠失怙有兄弟五勸以力學已獨  
任家事勤儉植產致豐裕兄弟得祐力均列膠庠以食口  
眾析爨祐各爲之構新宇而已取屋舊之待葺者母喜語  
人曰此子事我謹久勞苦又克散友讓我老年頗以此忘



憂也鄉里聞之無問言

徐從龍字際雲職授州司馬父母多病侍湯藥遲遲衣不解帶與兄同居田荆姜被白首不忍異爨於先人祠屋祭產加意扶植其他建橋亭設義渡施棺助殯不靳費皆孝友所推也子孫多列膠庠妻鄭氏建有耄慶亭媳丁氏守節旌表建坊里鄙稱其化洽一家焉

汪安圖貢生天性肫摯事祖母盡禮事父及繼母婉容愉色得其懽心兄弟八人怡怡相對終身無睚眦隙常慟三齡失恃所生色笑都不記憶有謂如氏形似者乃覓畫師圖

上饒縣志

人物 孝友 卷之十九四

十二

姊像而懸想添減以傳母神及見者咸以爲畢肖又出贊倡義渡修橋梁曰非敢以是博好善名冀爲吾母九原助冥福也聞者賢之

吳有樞字保青附貢生以子黃中職

誥封奉直大夫事父母至孝年壯強侍膝下依依如嬰兒及居喪泣血枕塊不入臥室飯粗糲蓄髮至數寸許哀毀逾常三年如一日其至性爲不可及

李曰嵩字華忠母孕嵩六月而父歿兄曰嵐幼殤嵩長立事母孝菽水承歡侍疾竟夕目不交睫母卒面墨骨毀見者



感動歲時必親祭父母墓進酒食如事生至老猶然族修  
譜兄以殤不列嵩告曰予有二男請以次男孔墉嗣予心  
乃安族從之孔墉邑庠孫毓鏞邑增

徐治以國學生舉鄉飲介賓啟尚考友庭除雍雍與妻卜氏  
白首相莊年八十歲五世同堂身見七代甲戌報部准以  
七葉衍祥題額旌焉

王居正字體元爽長子邑廩生性耿直而孝友篤至父病三  
年母八十餘患癱瘓五載正事之如一日父歿與弟邑庠  
履正全爨者數十餘年不忍析箸妻某姜某負債逼迫將

上饒縣志

人物 孝友

十三

卷之十九 四

鬻其妻正代償使完聚逢歲祲兩次平糶皆繼父志也生  
平嚴教子姪優禮師儒以故後人多有聲庠序間

王躬正字持吾附貢生進士勲子也性英爽幼隨父任讀書  
穎敏過同儕歸應童試入邑庠父後回籍營置濟運田產  
躬正輟舉業任家務援例入成均父患病卧床褥者三年  
侍奉備至延良醫不惜貲財母氏徐嚴厲躬正先意承志  
見稍不懌輒長跪解釋俟霽嚴而後起處鄉黨然諾不苟  
族中嫁娶多賴之強年歿聞者無不嘆息子四惟賢癸酉  
拔貢候選教諭惟能國學生惟樑邑庠生惟傑業儒



郭元緒邑庠瑀幼子也純孝性成精於醫以家貧乏養遊浙省西安縣有少女被祟延之診視怪卽絕聞母病馳歸不及視含寤寢於墓者百日三年不薙髮不茹葷念父衰輿之至浙侍養十年及歿絕水漿數日扶櫬歸里哀感路人葬後廬墓如初姊憂其過毀餉飯埋以肉元緒泣不食後娶於浙會春夜大水山崩猝不及避遭溺嗣竟斬焉至今言其孝者多哀之

李春榮性至孝八歲失恃號哭喪明醫治僅痊一目及成童父病瀕危榮齋戒籲天割臂肉和藥以進病立瘥時屆盛

上饒縣志

人物 孝友 卷之十九四

十四

暑以布裹創有問之者曰臂痛耳後其妻見左臂刀瘢斑斑然爲泣數行下越二載父歿哀毀愈甚廬墓者屢月嗣是每逢令節及兩親生忌日哭泣祭奠如初喪時

以上前志

徐維藩字介英明崇禎諸生閩吉次子也性至孝痛母胡早逝弗獲逮養事繼母楊恪供子職得其歡心康熙七卯閩賊入境焚掠甚慘藩負楊冒風雪過避妻余腹子踵其後嗣因賊氛漸逼勢難兼全藩命余棄兒遁余誓與兒俱促藩先行藩急欲免其母踰險徑去義不返顧迨賊退余母子以匿他所均無恙人以爲孝感所致居恒食貧勵志義



方課子朝耕夜讀不令少佚厥後伯子炳煥仲子炳誠叔子炳煜季子燦或蜚聲庠序或布德鄉閭均克繼承先緒  
垂裕後昆迄今子姓蕃昌科名絡繹爲鄭家坊盛族前志增  
徐添元字次範性散友睦期功之親植孤恤寡極周備里鄰間遇爭訟事多所排解歲饑減價平糶子孫化其行五世同爨雍雍一堂學使汪獎以散睦繁昌扁前後邑令暨學師均有贈額其後八列鄉國學者二十二人登武鄉榜者二人

林文桂字錫蔭散孝友喜施濟與物無忤生平未嘗一履公

上饒縣志

人物 孝友 卷之十九 四

十五

庭鄉里有善人之日現年八十有九親見曾元五世一堂見者欽爲 熙朝瑞事

方朗鎔字孔陶父仲玉白高洲遷鄭堂父歿撫諸弟成立母徐氏病篤朗鎔沐浴齋戒夜半禱於天割股肉以進翼日遂痊弟婦徐劉二氏孀守撫孤朗鎔待以禮故居距百餘里春秋必躬省祖宗廬墓邑令孟克文旌以謹飭可風扁餘干教諭周操爲立傳

趙登勝國學生少事親能得歡心兄某早卒遺孤二登勝盡心教育視已子尤加篤或憫其勞瘁答曰不如此無以對



吾兄耳年僅中壽卒鄉里稱之

盧濬字漪川國學生天性醇篤不事浮華居家恂恂敦孝友子姪多列膠庠三子苑梅以府試冠軍入泮郡守黃山王公贈以厚德延祺扁額

周效勃字定漢號厚庵幼有異秉七歲失怙哀毀若成人就傅數年學業精進童試再黜援例入太學事母二十餘年孝聞遠近伯兄早卒撫姪如已出仲家落傾已財飲之生平不惑形家言於祖塋加意培護有盜葬者出理之且誓族眾立約杜後人覬覦祀田多逋租謀棄舊圖新有欲分

上饒縣志

人物 孝友

十六

卷之十九四

其值者獨排羣議復田如初躬節儉積羨濟人歲歉出資貴糴賤糶全活甚多自以積學未遇課子甚勤夜半雞號卽促起使讀寒暑無間攜長子如蘭赴選貢 廷試於同譜中獨器貴溪邱藜照樂平汪守和出都邀汪同載後汪捷鼎甲邱成進士人服其藻鑑不爽次子如璋以文學受李令德樹知入邑庠在任時未嘗投一刺及李挂吏議眷屬不自給則時其匱乏相餉遺其方正尙義多類此以子如蘭選庶常贈如其官卒年六十有三汪守和時官侍郎

表其墓



葉貴美貧而孤傭力以養其母或倩其遠行辭曰予寡兄弟懼累母倚閭望也每夕市醕酒進母而自歔其醕者款語承歡融融如焉後母病瘖中裙廁牖皆親滌之十餘年不稍倦

徐天奉性純孝在父母側油油翼翼不忍旬月離父庠生孔俊病危奉顙天割股肉以進尋愈創亦無恙父增壽幾及三紀族鄰將以其事聞於官奉泣曰救父情迫非以沽名也力阻而止人嘆其孝出於誠云

劉有恆字堯夫性至孝曲體親心有弟五人篤愛之以博其

上饒縣志

人物 孝友 卷之十九 四

十七

歡質敏善讀書嗜古不趨時好試弗售念親老多病因專心醫學精其術侍奉間察其色以調護之父母均盲高年推以活人應手輒效貧者予以藥餌不售直鄉里德之道光元年有司臚列行誼聞於

朝賜九品冠帶年七十有五終

監生吳如茂性仁孝幼失怙事寡母曲盡孺慕母病篤羣醫束手顙天割股肉和藥以進遂獲痊勤苦立家撫二弟如燮如芳均入太學施棺濟貧諸義舉咸樂爲之子雲入邑

庠



詹天清字宗彝與曾祖父俱邑庠性孝友先意承志二親喪獨力仔肩素善醫不索酬八旬餘昏暮有請必往人皆德之至橋梁路亭諸善事無不竭力欣助故其子卽名曰橋曰路曰亭皆入泮三登科其庠序相承蓋六世云

汪安民字存仁太學生性篤孝友幼而失恃隨父事孀祖母敬養備至事父與繼母亦如之弱冠父委家政偕弟圖力任其勞兄弟八人後先競爽三安國尤以宦業著人以爲有荀氏風出貲修十四都西山大路往來稱便邑中有祠廟橋渡諸義舉襄助建修不少靳惜

以上前志

### 上饒縣志

人物 孝友 卷之十九 四

十八

徐城字天錫邑庠生作客姑蘇夜夢城隍謂之曰汝算將終念汝事親孝特告之翼辰起卽儼裝回里數月而亡瀕危口占曰來也四十六去也四十六兩手拓空虛由來無拘束聞者謂有夙因云

陳錫齡字鶴亭郡增生父母年皆八十餘與伯兄郡庠錫周仲兄國學錫光同侍奉未嘗朝夕離其父喜聞古軼事齡承志爲旁搜遠引以博其歡事二兄亦恭順有加年五十卒子德普副貢生

周長學字錫望庠生慎餘之次子錫望與兄祖望皆訓學館



歸輒依母細瑣必親母喜謂曰吾無女若卽吾女也父病隨兄侍湯藥衣不解帶嗅遺矢且刲股進父聞慰甚道光甲申院試默祝三聖祠願屈己名以伸兄是年祖望果遊庠子鴻翼邑增生姪鴻謨博士弟子員

鄭兆蘭字希穆號陔庭廩貢生官南康府學訓導父蒂貴樂善好施生平多隱德前志有傳蘭性至孝事親能養志父沒哀毀逾常雙目盡盲後遇一醫士治之右目忽明左目亦稍能視母性嚴蘭先意承志盡得歡心凡事稟命而行無敢專擅者母多病捐金造雲洞寺佛像以祈母壽年逾

上饒縣志

人物 孝友 卷之十九四

十九

五十孺慕之誠不少衰潘文恭公督江西學政故事學官舉報生員優行無以孝稱者惟蘭以孝行舉文恭大異之時屆母壽辰文恭書萱榮荻範額獎焉蘭篤信因果不敢襲理學虛名而利人濟物本於天性嘗三次焚燒債券語家人曰彼既不能償留之必貽子孫咎故盡焚之鄰里戚友賴以舉火者賴以完聚室家者數十年後猶感其德卒以施與太繁家業亦落而蘭終無悔志也蘭重師友誼邑附生鄢某蘭業師也每歲晚必袖金爲餽終蘭之世皆然劉君斗槎亦蘭蒙師所厯借金悉請勿還歲貢生鮑君燿



布衣吳君朝棟俱賢而貧與蘭爲道義交咸歲卹其家道光丁酉拔貢瑞昌縣教諭楊君日煌家故貧年未弱冠蘭奇其才復延至其家課子若孫閱十六載有加禮今浙江方伯盧君定勳其封翁恩貢生諱贈梅與蘭訂文譜封翁疾革時方伯尙幼遂以見託訓誨備至勝於己子及方伯膺壬辰鄉薦蘭爲位奠封翁曰吾今可以無愧於故人矣藏書數千卷每卷悉加丹黃著勿以小齋詩文藁兵燹後僅存一帙待梓又錄太上感應篇及先正格言共八卷梓以勸世名曰修福全書子八人三志坦邑優增生五志昀

上饒縣志

人物 孝友  
卷之十九四

二十

邑優廩生以守城勞績保舉知縣六志暄咸豐五年守城殉難另有傳

周龍光字斗墟號福齊父之緒卧病三年光侍起居調藥餌未嘗有倦容母壽八十餘亦奉養無違依依孺慕母卒扶櫬南莊有來阻葬地者理譬釋之待伯兄優家貲悉以多相讓而爲人慷慨歲歉則平糶以濟貧窮或請貸者不能償焚其券終弗索取也年近七十卒子學淵例貢生授修職郎

監生傅顯裕重義輕財與兄析爨貲產悉以多讓兄而自取



其寡者母老在堂獨供甘旨歿復以一人營殯葬兄愬然裕亦未嘗與較也道光年間賑饑平糶村中咸飽德焉壽六十八終

程延援咸豐戊午春二月賊入境念父老且盲不忍他顧令妻子等各逃避而已獨負父以走甫出門賊突至脅使釋父去堅不從威以刃厲聲罵曰吾雖農民詎忍舍親歸賊耶賊怒戕之

鄭培德咸豐戊午春二月賊犯境奉母避居於霧山無何賊搜及執其母培冒死奮擊脫母於難移時賊集力戰而亡

上饒縣志

人物 孝友 卷之十九四

二十一

余我壙字維翰太學生幼失怙事孀慈以孝聞咸豐戊午二月賊由鉛山竄上瀘壙奉母避於羊角石無何賊勢逼母命壙獨去壙弗忍遂被執不屈厲聲而罵賊怒殺之邑明經鄭良弼爲立傳

熊運麟性至孝咸豐辛酉賊入境負母而逃遇賊被執抱母不去賊怒斷其兩手猶向母哀號而歿

鄭丹顏幼業儒未成而習醫性仁孝咸豐庚申十一月賊入境各驚避因母衰且病留於家賊至被執勒之從以母老辭賊不聽脅以刃厲聲罵束縛倒懸之罵益烈中槩洞胸



死

徐廷訪邑北農家子也家貧親老嘗傭作鬻薪以供甘旨性馴而氣甚壯咸豐戊午賊入境訪念切膳親聞警不懼赴山樵采遇賊於途執令降不從放聲罵脅以刃罵益厲遂被害事聞觀察沈爲彙詳請卹

楊立豫父武晃邑庠生咸豐戊午仲春賊入境豫隨父出避中途遇賊賊刺其父豫救之握賊矛不釋手父得免比父去而他賊踵至豫遂遭屠

張登科性孝友咸豐戊午春聞伯兄連元罵賊殉難一慟幾

上饒縣志

人物 孝友 卷之十九四

二十二

絕同治辛酉秋賊由下游回竄蹂躪郡境科奉母避於迎春塘被獲脅令降以母老辭威以刃不屈遂遇害

鄭祖藍咸豐戊午仲春賊犯境念父齒衰難遠避遂不去無何賊至執祖藍勒索金帛藍厲聲罵曰吾家貧苦奉養無貲豈有餘財及鼠輩耶賊怒立磔之

呂光春邑諸生光偉兄也世居城南新開塘天性純孝咸豐戊午仲秋賊由西竄南擾及本村春念母蕭齒衰病廢弗克遠逝負匿附近山窰旋家守護不料途次遇賊繫春令降春以垂暮慈親且櫻篤疾山阿了處侍養無人陳情懇



釋賊不聽露刃促行春怒嚼齒唾罵遂斃賊手

鄧新福上瀘發漣子也年甫十四克散孝行咸豐戊午仲春見父陣亡誓不戴天冒刃衝鋒而死時人比之魯汪童焉陳發賢上瀘惟金子也咸豐戊午仲春痛父死賊矢志復仇奮勇衝鋒而死

揚新發城西濠畔人咸豐戊午二月聞賊警奉母劉氏避居於邑南不料賊突至刃其母新揮鋤泣血奮不顧身為賊所中而死

鄭孝順其父忠元病延醫弗愈禱於神願以身代又弗愈因

上饒縣志

人物 孝友 卷之十九四

二十三

割股和劑進得無恙族紳皆知之道光癸巳上事於學使翁贈以百行斯融扁鄉里榮焉子昌譚邑庠生

邑庠鄭堃育廩生炳勳之繼子入齡勳故家貧讀書為事遊庠後授徒於外每夕必焚香默禱先聖前為兩母祈壽後生母病瘋奉事三年畧無倦色繼母卒兄念育無貲謀謝弔客而育則典屋營喪竭情盡禮雖親兒不是過也咸豐二年立春日自分將終命兒孫輩具衣冠為敬神遂溘然

逝子二長國學次明經

登仁郎姚之衢號仁山幼失怙恃其第三齡養於乳母家衢



依姊壻居家事嫡堂兄經理之十餘載乃攜弟歸嚮讀書  
知義聞父母厝而未葬撫膺大慟徧覓佳城既葬力艱封  
樹二十餘年嘗腰白帶以志憾年四十家稍裕始釋白帶  
爲修塋立石焉性友於教弟長成念嫡堂兄老而盲分田  
十餘畝相贍以報其勞大僕吳伯新先生爲立傳子某某  
邑庠生孫景曦優貢生曾孫嗣崇拔貢生嗣樞邑庠生

劉華彪號豫齋廩貢生父靜軒公任陝西洛川令奉檄往西  
粵買銅彪隨侍舟車悉心調護蠻烟瘴雨歷盡艱辛事老  
母孝能錫類推恩嫡堂弟華棣歿家貧其婦余氏欲撫孤

上饒縣志

人物 孝友  
卷之十九四

二十四

守節彪爲籌畫以成厥志且急公好義郡邑先後修建

聖廟文昌宮暨城南浮橋悉董其事道路傾圯者亦隨葺之離  
城里許有江公行祠久坍塌捐所積館俸率先倡修而屢  
薦不售家居講學兒孫門弟多賴裁成年八十有八卒

祝殿芬字培階幼失恃與兄殿芳篤友愛每食必俟芳未嘗  
獨先芳病卻食亦爲之不食事後母朱氏孝朱病盲延醫  
弗效芬每晨以舌舐之數月復明弱冠承父命獨理家政  
以故芳得一意向學爲邑名諸生芬恬靜寡言傾心儒士  
課子炳垣蜚聲鬢序壽七十以齒德兼優與賓筵卒年八



李孔堡字性安號靜山父曰炳義行詳前志卒年四十餘時  
 堡九齡兄孔堅十二歲依母鄭氏居鄭性嚴深知大體堡  
 稟訓讀書中年遊泮嘗隨兄定省侍必更闌母命之去然  
 後歸卧房兄老無兒長子毓鍾膺鄉薦命承厥祧唯唯聽  
 從性不趨炎不喜侈承父志遇方便悉為橫逆來唾面自  
 乾弗校也以附貢七舉鄉飲賓壽逾七十卒子毓鈴倫生  
 毓銀邑庠生同知銜晉封四品孫樹清博士弟子員樹浦  
 候選直隸州

上饒縣志

人物 孝友 卷之十九四

二十五

張詩曉性篤孝父亡母病數年不歸卧闔咸豐辛酉賊入境  
 曉負母奔逃乞以身代賊釋之年五十卒

國子生徐奎田字魁旃號碧泉邑北鄭家坊人性孝友生歲  
 餘母辜即逝四齡忽覺一慟幾絕垂髫出承伯父祧維時  
 祚薄丁單兩地子職任以一身皤然四老暮景克娛未幾  
 連丁內外艱麻衣漬血饒有高子臯風焉治喪一稟古禮  
 不作冥薦遇異母弟素親愛一室怡怡老而彌摯宅心仁  
 慈壯歲憫嬰孩遺疾多斃庸醫奮研幼科洞其祕妙全活  
 無算而於貧家體恤倍至聞召立往雖值富室重幣固邀



不能奪也入門診畢昇以藥璧其貨產可後不居功不受  
報脫遇危疴淹留信宿食品務令節嗇卧具戒勿更張縱  
啜藜羹擁敗絮欣如也平居酬酢往來惟冀裨人不圖利  
己而大度能容與物無忤人卽陵以非禮胥恬受弗校焉  
念高曾來世德相承督課諸嗣甚嚴不屑屑汨於俗學勸  
其檢束身心追蹤先哲歷延名宿殫心教育重道尊師禮  
優情篤昔人所云教子以義方者殆不是過厥後壽逾八  
袞目覩伯子瑞麟循例就職仲子味道中式道光己酉副  
舉叔子中道季子致道暨二孫象珊品珊悉列膠庠致道

上饒縣志

人物 孝友 卷之十九 四

二十六

復以增廣生協理團務疊膺獎叙卽選訓導尋又食餼固  
天所以報其德亦貽謀者善也

王惟忠字晴岡號進思邑增生廩生

貽贈文林郎居正

長子也學邃品端承父志課諸弟讀嗣與弟惟孝惟廉同  
受知於文宗李雲門先生忠孝友根諸天性嘗作楊生記  
情詞懇摯讀之使人意消惜文稿未梓燬於燹子效穀孫  
恩熙俱邑庠生

國學饒思仁原籍旌德事父母孝凡貿易所得悉歸諸父母  
病雖千里必歸奉侍嗣因母疾未廖散絮衣且割股和藥



以進尋愈後父母歿篤愛季弟衣服貲財無不與共族黨稱之子佩榮以軍功保舉巡檢

方基號樹屏 恩貢生父早世事母以孝聞祖母愛之割腴田爲膏火資諺所謂長孫田也祖母歿各分爨基讓其田於眾以爲祀產自幼至長皆賴四叔正之延師督課終其身敬禮不少衰云

鮑應崙號崑山邑庠生逾晬而孤母癯委兄司其出納家故豐同居數十稔因食指浩繁始析焉羅家石田數十畝歸崙產也壤甚腴歲收常數倍農者寶之崙念伯氏勞成重

上饒縣志

人物 孝友 卷之十九四

二十七

累旦夕有追呼者慨然曰田疇易得兄弟難求若重田疇輕兄弟奈骨肉何遂召各貸主至於家爲署券如數抵償兄感泣告母母含笑爲崙言曰汝待兄如此足慰吾心後日必得賢子孫報崙毫無德色第順承慈意而已子友管太學生孫炳瀛優增生候選訓導

繆九錫邑增生以鄉試首薦不售淡於進取出孝入弟士林僉謂不愧讀書人云

鄧讓珩號湘溪歲貢生性至孝母盲卧病在牀珩伴寢食侍起居調護維殷有事亦必稟命而後行友愛兄弟財產能



讓待人接物出以至誠父克剛嘗有焚券風珩體其意推  
廣之周貧賑乏至老不衰卒年六十八子光旭郡庠生  
楊日輝號曉樓四齡母故賴祖母養成比冠父又故因家貧  
遂棄儒作賈親弟日燁失怙恃爲支持令學習生理並出  
貲助之或無事家居雖半載經年亦給以食有姑孀居喪  
殮不給輝奉侍慇懃藉以存活者三十餘載後姑終喪葬  
偕親弟日煌頗能盡禮已故張廉訪秋坪舉於鄉得捷書  
苦無資赴省日煌言諸輝卽以五十金畀其慷慨如此年  
六十七終子煥培太學生

上饒縣志

人物 孝友 卷之十九

二十八

李文耀家貧年十三父故母癯嘗捕魚以供穢器褻衣悉親  
滌之一日大風雪乏薪米計無所出解衣泗水作鳧沒得  
丙尾二賣錢數百枚歸以養母彷彿王祥卧冰事其母越  
十九年卒

羅作材附貢惟滄再繼室林氏出也滄故林氏賢而慧解詩  
書音律兼耽花卉居家則極其儉約作材知母意每進饌  
必託言他饋方肯下箸暇輒爲母談古事或調絲竹值園  
中花放母雖老嘗背負以遊母病五年親侍湯藥破廢寢  
食者凡三日兄作梯邑庠生異母出也無子而殂作材爲



治殯葬立嗣子取遺貲購田以作祭產鄉里搆釁者屢出  
金講和債戶家貧弗克償焚其券且益周之乞人率先加  
慰藉然後給之食咸感泣焉子元燈孫植基俱庠生

王樵父母俱存兄羸而弟弱家中落嘗負薪以供後學醫稍  
得餘貲念雙親衰邁身後宜圖遂預購棺木製衣衾焉父  
歿弟未娶出百金爲聘盡以諸祀產歸謂其弟曰汝畜妻  
兒承宗祏吾老矣弗再儷也初樵原有婦因忤母出之鰥  
居侍母母壽九十六而樵亦年逾七十承母氏歡論者比  
諸老萊云

上饒縣志

人物 孝友  
卷之十九四

二十九

楊興福母患瘋疾興奉養殮每食捺匕匙以進衣履按節候  
親更之遇便液爲負登廁踰雖穢惡弗避也析炊後兄弟  
俱貧興獨養母且承志購其困乏年五十餘母卒作嬰兒  
啼水漿不入者數日里人咸歎息焉

國學余克垠幼失恃繼母劉氏嚴事之能得歡心遵父命與  
兄析產兄克墉獨取贏焉垠無異言父歿喪葬費倍於兄  
弟劉歿亦然克墉家後替垠商諸伯仲歲贈以穀族人由  
是多賢垠舉祠事相委祀產歲收多逋負用不敷垠出貲  
協濟復貲修祠宇償以己業黃掛村江某債累鬻妻垠聞



給錢完其夫婦私租欠者屢免之年六十七終子三長兆  
銘次兆銜末兆鏗

鄭丹成家貧孝養雙親每月必設肴以供兄子爲母所鍾愛  
承志召侍食凡茶餌率多置一盂父歿哀毀事老母益篤  
一日聞警負母走賊已來依母不忍去賊義之攫其所帶  
米令挑入營釋之歸母餒甚掃地獲脫粟斗餘搗屑作粉  
團以進得免於饑年逾六十母病卒爲孺子啼如是者凡  
三年

魏基迪以孝聞咸豐八年父瀕危一慟幾絕踰年母病構疏

上饒縣志

人物 孝友 卷之十九四

三十

密禱於竈神願以身代後果痊基迪念母教訓蒙苦讀有  
得於心務求實踐嘗謂諸同學曰凡欲做好人當自門內  
始後以搽修過銳寢食幾忘累月窮年積勞成疾疾大漸  
業師魏煥檢書囊得其乞代藁閱之愴然而迪尤慮母知  
益慘悼囑煥幸勿言年二十七卒

國學鄭曰庠父患瘋一切必躬親不假僮僕事母亦然母亡  
昇棺安厝壙將穿知爲古塚命急掩之爲立石而另擇地  
以葬母焉咸豐辛酉賊竄沙溪暴骨縱橫纍繫數十具出  
賚收之又葺津梁修道路燬券書所爲無非善舉年六十



餘列賓延壽八十卒

周樹椿早歲喪母繼母唐氏生樹須父卒家貧椿未娶撫弟須友愛唐年六十餘跌傷足偃蹇牀蓐間椿侍起居供飲食未嘗稍離側凡里中傭作囑須留不與之俱出出則朝往而暮歸唐年八十有五卒椿偕須至老白首相依須亦事椿如同母焉

鄭文達家貧父早喪母尙存不忍遠出嘗就近爲傭每晨夕必歸炊飯母母食畢去大暑時田間力作午後輒回家爲母進湯沐所易褻衣親滌之後屢遇賊俱以待母脫論者

上饒縣志

人物 孝友

三十一

卷之十九四

謂其至孝所感云

周汝賢性孝友父歿柩在堂夜分隔鄰火急呼救棺莫之應賢與兄召南一舛而出聞者訝焉母辜卧病待湯藥者數年弟某以田鬻倍價給之不署券後弟復他售爲贖還重予之值晚喜讀史書嘗縱論以示鄉愚遇忿爭多方勸解又建津梁拯溺嬰修宗譜稽失醮先塋累年共得十餘塚卒年七十三子魯附貢生厝之於平原邑孝廉辜滄撰墓誌銘咸豐己未水暴溢壞田廬無算葬基上下均坍塌惟賢墓歸然亦異事也



國學劉昌誥字錫光廩貢華彪次子也應童子試屢列前茅以父待宦秦川故遂棄儒業理家政性孝友曲體親心兄弟分炊能讓產有會計才尤善營土木事郡建

文廟考棚校場修城垣邑建

文昌宮養濟院長清浮橋東嶽

文昌閣南屏謝公祠及增靈山書院膏伙皆與有力焉前郡伯禹民銘公進軒鹿公士良史公咸稱其才識諳練云子世馨邑庠生世徽弟子員保舉訓導世斌浙江補用鹽大使

上饒縣志

人物 孝友 卷之十九 四

三十二

繆君鼎字福順幼失怙恃養於大父母及長痛親逝環墓啼號聞者揮淚事大父母若父母病則侍湯藥不出房闈大父母故哭泣幾喪明繪其像書父母諱於側事如生劉工榮孫者備有年矣餘貲倩君鼎息之鼎權子母爲娶婦成家鄉人來稱貸有求必應不能償輒焚其券年八十一無疾終

周邦光事雙親孝愛諸弟篤課子以義方里人有忿爭者釋其事毫無德色家雖中落賑饑施棺救嬰諸善舉咸慷慨領囊年五十八病危勗兒曹曰吾家忠厚數傳爾輩能承



先志紹家聲吾目瞑矣遂卒

童作霖以孝友稱父歿躄踊啼號居喪骨立三年後每遇忌辰輒淚下泫泫視灑柏枝泣蓼莪者無異也友愛同胞暮齡益篤藹然天性人咸敬之年七十五卒

鄭鶴山性孝家貧母病禱於天願捐軀以緝母算葛仙山廟神最顯持齋三載擇吉齋香縑叩之廟有捨身臺高百餘仞聞陟其巔躍而下所求皆應鄭迫於救母縱身焉家人至墮處見狀貌如生縋之出歸殯於家是亦孝中之至奇者

上饒縣志

人物 孝友 卷之十九 四

三十三

游松壽父廷拔母葉氏甫辟父亡家窶依母乞食稍長力耕養母後母卧病十餘載奉侍依依凡大小洩悉爲之親絮虎子焉又賣所墾田厝父室旁每得新蔬祭然後食夜則移牀就墓地灑涕中宵數年無疾而卒

庠生游澧兄弟五年四十餘父病澧焚香默禱願減己壽以增父齡後父歿年八十有奇方澧兄弟析產時家正落父憂之澧請以祖賜讓長田數十畝并妻熊奩具悉作均分父始釋然子四棘舉飲賓蠶補弟子員孫錄勲鼎勲元孫桂基蘭基俱掇芹食餼



游衛玉母病延醫無效家有故園種竹千竿玉徑入林中叩頭流血操刀割股肉以奉母母病遂愈

國學徐澍字攀桂號樹滋四齡父故事母熊膝下依依晨昏無間避寇昇母靈山麓遂卜居焉中年勤儉起家素多善行兼習鍼砭以故山人敬之年六十三先母逝臨訣泣告曰兒無牽絀所難舍者老母耳子林例貢生

王文瓏母病焚香割股真藥中一服而愈後病又作瓏詣大葛仙廟廟有捨身潭欲往投之爲母祈壽見者以愚孝阻焉乃止

上饒縣志

人物 孝友 卷之十九 四

三十四

周有孫母許氏年九十餘病孫執匠氏業僅可營身而於老母養殮尙缺也因不得已爲棄斧斤攜囊鉢常朝往夕歸得錢米悉以供湯藥論者竊比諸吹簫乞市云

繆伯琦父故母吳氏守節撫之十餘歲卽能奉養長通醫理兼習形家言而好行方便不受酬金孝子仁人如是如是

余錫懷字愉賢太學生性仁愛伯兄錫詔亡懷僅一子名純清命承大祧母病劇懷精於醫湯藥親嘗母歿勸父歲續娶未幾父又亡奉繼母及寡嫂孝敬有加事必諮請而後行道光年間饑出儲平糶人咸感之年三十四卒以季弟



錫鏗長子純瀚嗣

鄒書紳字新元弟銘紳字秋元秋事兄如父兄病同牀半載  
湯藥親嘗歿號哭失聲而新亦待秋友愛聚首怡然即際  
彌留依依不舍村人稱謂難兄難弟焉

徐家謨邑庠生性孝友兄弟以臨池為樂家多名揚暇則掃  
地焚香置身明窗淨几中端坐作蠅頭小楷興酣命子弟  
輩立旁為伸紙揮毫寫草隸數行相視而笑伯仲之間怡  
怡如也眼見一堂四代舉賓筵以壽考卒

周杉字良材八齡失怙以樵牧營生年十五方向學每夜聞

上饒縣志

人物 孝友 卷之十九四

三十五

人拍書案作聲聲杉謂父靈爽使然益發奮一夕山館  
歸遇虎爭道叱之虎驚避得舉茂才繼念親老家貧為商  
楚越取貲養母並給同懷兼之地學醫書悉窺其奧母病  
製方破則卜吉而年未五十即斷琴絃不復再娶所居戶  
牖悉鏤格言俾兒孫咸觀法焉厥後委化日時亦能預識  
如期溘逝神若龜著遠近尤歎為奇云

飲賓徐原鼎弟原珂伯仲友愛鼎珂痛人薄於天性也非坐  
擁私財即婦言是聽甚至骨月參商積成釁隙感慨係之  
因大被同眠皤然聚首年七十餘先後卒



周宗顯字效西號懷耕少貧爲縣胥吏稍裕乞歸隨兄家居侍養後親與兄繼亡喪葬從豐每月必數省親墓並爲兄立祧捐租百餘石作合族祭田以廣血食庶常饒向榮進士張步青孝廉楊鼎劉毓祺均契之爲舉賓筵不受年七十六終瀕危焚債券千餘金子慎餘孫祖望曾孫鴻謨並遊庠鴻翼邑增生

饒宗新順事繼母視繼母子若同胞性慈惠結廬江干每暴漲恐橋圯必巡橋畔留阻水者宿其家一日童丐某隔於橋兄弟對岸立弟冒險相從新喊之不聽墮水死數日尸

上饒縣志

人物 孝友 卷之十九四

三十六

出新爲購棺殯葬並卹焉嘗誡家人慎毋溺女至今猶守其訓子啓揚郡庠生

庠生葉國沅性仁孝父力學有聲沅遵訓亦勵志讀書暇則趨庭闈定省不荒於嬉應童試郡縣悉冠軍隨舉茂才邑侯程肇豐深器之謂玉堂中人沅舉孟氏修其天爵對後果淡科名不離親膝是蓋以家庭爲至樂者

黃炎興家修八齡子也咸豐十一年八月賊至掠炎母欲殺之炎抱母哭爲乞曰殺母請殺兒兒願代母死賊遂殺炎而釋其母見者亦心酸焉



連繼往性肫摯叔母某氏與往母最睦孀居往善體母志事  
之若母後叔母故母年九十餘色養依依母歿孺慕終身  
人無間言現年五十歲

鄭明拔咸豐年間賊西竄父八十餘被擄乞以身代許之釋  
其父拔從至湖巖賊義拔令還家人謂孝心所感云年五  
十九卒

國學王重球芋陽人幼失怙事母以孝聞雅敬兄析爨時念  
兄食指繁以沃產歸掘地得鏹分其半以予兄性耐忍遇  
事率唾面自乾不履公庭素最憐貧債款不能償者焚其

上饒縣志

人物 孝友

三十七

卷之十九四

勞子五四道源監生舉飲賓遷興安葛源承父志製絮衣  
給丐歲以百計又精醫書施藥料活人無算持躬尤不苟  
有田家婦誘以私峻拒之子二長文彬太學生孫襄邑庠  
生

楊武晃號顯民邑庠生甫冠與汪紀諸君遊一日釀金飲汪  
啖之嘉果食舍果問其故云歸以遺母有考叔風晃好善  
舉不憂貧嘉慶間黃荆山涂姓者因變鬻妻哭甚哀晃聞  
爲集金留其婦又廣施丸散活人甚多

鄭歷鎮事繼母孝年六十三死復甦謂家人曰予至一所若



官衙扶服入見緋衣在座知爲冥府因泣告母老須養乞  
釋還座上人默然良久曰念汝孝心爲延齡十載且速去  
後果七十二終

徐秉貞字夢松父故事母朱左右就養得其歡心母病湯藥  
親嘗五歷寒溫無少間歿喪葬如禮忌日輒閉門飲泣至  
老如初貞早喪妻不再娶三弟秉美病危託以兩孤貞爲  
養育長成之一如已出

曾功達字成允號立人太學生舉賓筵冲齡失恃哭哀甚事  
繼母承順得其歡心待弟友愛有田姜風兒輩訓以義方

上饒縣志

人物 孝友  
卷之十九四

三十八

鄉鄰倡善舉鼎力成之子三次玉聲邑庠生孫十一以誠  
一城均遊庠道誠處士另有傳

林應彪家貧母鄧喪明饗殮不給彪充營伍所得貲糧悉供  
母母拂意輒柔聲怡色務得其歡有幕客某寓於鄰聞彪  
事爲言諸邑宰宰歡甚一日見參戎言及彪參戎飭往見  
許置門下卹其家後入武庠以孝著

周履安字泰然號虛谷觀察如蘭次子也長應童試王文宗  
以墨污卷置僧生援例入太學會父如蘭官楚北隨至署  
舉業遂廢履安幼失恃賴祖妣潘撫成後潘迎養回奉侍



左右頗得歡心潘嘗郵示如蘭曰吾有孫晨夕忘憂矣履  
安趨命黃梅日兄伯煦病於家得書星夜歸躬調湯藥兄  
卒哭失聲立姪中賢者嗣叔禮南家中落力代綢繆南故  
婦寡兒孤始終保護事繼母若生母析爨分貲遵命以多  
予弟族有盜鬻祭田者集金爲贖回里人急則傾囊伙助  
弗責其償賊去後廩剩餘糧被強梁攫取人請鳴於官寢  
勿問凡城垣團練捐輸均董厥事授修職郎年七十二卒  
傅上珍字福麟妻吳嫺姆訓父母俱嚴珍偕吳奉侍悉得歡  
心又能友愛三弟賓娶廖氏生世衡纔三歲賓病瀕危慮

上饒縣志

人物 孝友 卷之十九 四

二十九

子難自存活泣囑曰弟不孝不能事雙親返貽以妻兒累  
賴兄及嫂庇俾婦克守節撫孤九泉瞑目矣遂卒珍不負  
所言翼其妻子析產後同爨而食且課世衡讀長爲完姻  
生三子而衡又亡妻願矢志亦備卹焉咸豐八年賊屯邑  
南珍避居山谷覩難民饑甚分升斗賙之不取其錢珍壽  
六十六卒吳卒七十餘

方敘煦字雙喜號炳雲性孝友重道尊儒學師魯金渠獎以  
篤行懷義扁邑進士貴州知縣王效虞亦以德峻望隆額  
贈之子懋修能承父志不墜家聲



附貢生余崗字斌瑞號平山庠生之熾子也生八月父歿節母鄭安人撫育成立性孝承顏悅志色養無違年十八遊庠有進取志鄭以水次風波戒毋省試而崗亦慮貽母憂遂理家政每歲所餘輒贖貧乏蓋母性好施特藉此娛親志也生平博學工詩著述甚富所刻悼亡詩六十章情真語摯又註袁簡齋駢文箋就而石琢堂已先刊行因摘其所遺者錄爲一帙付手民鐫之以子錫奇職

勅封儒林郎

余珏字環玉邑庠生幼失怙事母孝兄姓太學生性豪邁揮

上饒縣志

人物 孝友 卷之十九 四

四十

霍數千金恐累珏議析已產以償負珏窺其意請書所負歸眾償甞強爲拈毫忽中止潸然出涕曰吾何忍累吾弟珏慰之再四始著於單撥田清款餘悉均分時人稱爲難弟難兄云珏生四子次純湘入邑庠

國學潘廷鎮字有祥號鼇峰原籍徽婺以貿易起家卜居邑北之西山性友愛伯兄其祥尤在婺家中落鎮以故里諸田廬悉讓祥并署券尾云子孫異議者以不孝論伯兄乏嗣出金納遣室者再得有後邑建

大成殿



文昌宮信江書院先後捐貲甚厚去西山三里汪嶺背路通  
徽饒有二澗每山流暴漲行者阻焉鎮建橋兩座名曰雙  
濟橋置田善後今其子孫猶世葺之

王龍才性友愛四世同居兄妻某氏故遺孤雛一龍善撫之  
逾於已出延師聘室不憚劬勞同治元年

覃恩予九品年近百齡終

國學汪莫邦字汝孝少業儒性孝友事親孺慕居喪哀毀如  
禮不隨世俗作浮屠事同懷弟五延師課讀嘗以本行相  
勗取孝友睦婣任卹六言爲其別字均克仰承父志爭自

上饒縣志

人物 孝友  
卷之十九 四

四十一

濯磨安邦能邦邑庠生餘入太學兄弟友愛怡怡一堂析  
爨後亦不忍離諠諠以睦宗族散詩書爲訓建六行書塾  
置學租以課焉又於水晶嶺半構亭立田善後並建惜字  
塔設夜燈以照行人學使王獎之誼散孝友扁孫步鼇榮  
鼇京鼇元孫日昞皆先後遊泮

增生汪士林安貧好學日種園蔬夜嘗苦讀事親以孝聞親  
病衣不解帶者月餘歿哀毀逾禮兄弟分居祖所遺田悉  
相讓未幾兄弟又中落相繼亡喪葬費畧無慳吝生平授  
徒於城北葉氏五十數年有富戶某以多金欲動願相延



一笑謝之其耿介如此年五十六卒子燮遊武庠  
邱敬業性至孝母病延醫不治割臂和湯以啖母母痊越三  
年乃卒鄉里稱爲邱孝子

叟希仁兄弟五兩親悉一人供養膳必豐潔親歿喪葬有經  
亦獨承其事太祖祀田罄於訟血食無資仁傷之出租十  
餘石綿其苾芬爲人能守正持公凡鄉鄰有議一諾便成  
無須約劑紛紜也素多義舉近地小溪橋捐白金二百倡  
成其最著者孫應耀國學生曾孫聚奎邑增生

劉昌閣字秉謙晬失怙賴母郭氏守節撫成之自幼及長悉

上饒縣志

人物 孝友 卷之十九 四

四十二

遵母教嘉慶間爲請

旌表閣妻蔡氏亦善體夫心歡承膝下鄉鄰歎閣孝而稱蔡賢

黃梓國字學儀太學生授例授都閩少孤善事孀慈出祧後

爲母楊請

旌待兄弟和好讀書嘗延師督課鄉子弟有成名者邑中倡義  
舉率樂傾囊歲饑減價平糶存活甚多年逾七十五世同  
堂子三雲山邑庠生雲章雲梯例貢生孫五瑤臺光祿寺  
署正銜曾孫琦麟國學生樹勳業儒元孫葆燈葆元俱就

學



黃雲高號柏源邑庠生寄居廣豐廿四都性仁愛延師課子姪讀禮意周至咸豐元年捐營千總並請

封祖父母析產後因四弟早逝遺孤幼挈令同炊教讀婚配一如已出鄰里搆釁者為排解焉歲饑減值平糶橋梁路亭圯悉修葺之同治二年奉憲築堡石井塘以勞績保守備銜廣豐縣令黃鶴羣獎以孝友傳家扁中年舉兩兒人稱為積行之報云

國學楊世筠字江佑號樹森庶出幼失怙孝養嫡母愛弟德淵延師課讀補博士弟子員遇善事解囊樂助映虹鷄鳴

上饒縣志

人物 孝友 卷之十九四

四十三

二石橋捐金四百兩成之咸豐九年子以桂捐請

封典追

贈武騎佐騎尉

從九姚忠信號鳳祚幼喪父事孀母孝母病朝夕不離家貧拮据撫幼弟五人使習商販而竭力經營得置田產並為授室年未五十卒

吳伯鼎幼孤事母孝教弟讀書入邑庠事兄如父日夕肩隨兄卒廢寢食積憂而逝鄰人咸歎息焉

楊德淵附貢生由訓導捐知縣加同知銜分發浙江淵少孤



孝事孀母待兄江佑恭性倜儻有膽氣咸豐間賊竄江省  
軍務倥偬時觀察沈公葆楨駐防信城委淵辦理支應局  
淵移孝作忠躬肩其任事無鉅細動中機宜沈公深倚重  
之咸豐九年赴浙候補藩憲差委錢塘發審並充戊午己  
未兩科收掌試卷官嗣奉撫憲扎往偵皖賊饒鎮軍廷選  
遇於途次接談竟日喜曰奇才也遂移請留參戎政積勞  
成疾乞假歸卒年五十八

國學方賡廷字觀臣兄弟二幼失怙事母以孝聞與兄析箸  
美產悉歸兄村中貧窶者率周給之廷性嗜學抱憾未售

上饒縣志

人物 孝友 卷之十九四

四十四

嘗設義學於家以教寒士士受其栽培者多成名焉

汪能邦字汝嫻幼失怙遵兄教誨年二十以郡試第一入邑  
庠善承父志事孀母得其歡心母歿寢苦枕塊不入卧房  
兄三弟二和樂且耽析爨時率能友讓歲饑互相平糶終  
其身未嘗履訟庭誨子姪輩以太上垂訓忠孝友弟正已  
化人語爲箴子四長占鼇三殿鼇均國學次京鼇邑增生  
文鼇從九品

陳恩榮字大元長棄儒業隨父充縣屯糧科軍戶窮者送辛  
工紙費嘗璧還之寄食公門素無干與親友舉訟事來委



每再三開導並出費相調停爲縣侯石公瑤辰所倚任榮  
事親承順凡父所尊敬者待之益恭母老患癱侍疾達旦  
弟貞尤母鍾愛能曲體善全而鄉邑中有義舉亦慷慨捐  
金毫無吝色年六十六終

余士江號注之性孝友家貧舌耕餬口督子弟使從正業兄  
弟分居能讓財產雙親亡殯葬費以一身任素精醫理不  
索酬謝而濟散施丸建亭修路至老不衰壽七十三卒

李世臣父邦憲早故母氏周青年守節撫養二孤長世培務  
農次卽世臣病足嘗爲人牧得值悉以供母後母盲家益

上饒縣志

人物 孝友  
卷之十九 四

四十五

貧兄弟未娶奉侍無人遂棄牧業屢於其家凡母飲食起  
居悉以身代母年七十五終世臣現年五十二

蔡德純郡庠生好學能文縣令梁取以冠軍屢薦不售遂棄  
舉業爲塾師設教數十年從遊者眾性孝友事父母順析  
爨後兄弟繼亡有妻兒累純出館穀賙之卒年八十三子  
六次士升候選從九三旭升邑增生四吉升邑庠生

鄭新居家貧以備養親母病足朝往暮歸凡奉衣裳供飲食  
晨夕必躬親母卒泣血攀號哀動左右里中稱孝子焉

庠生鄭善綱事親孝敬友愛諸昆親歿哀毀逾常居喪盡禮



素仗義建祠修譜施藥平糶而持正不阿有相爭者輒以理剖其是非帖然心服又今之魯仲連王彥方也

黃正達兄弟四達爲叔子嘗貿易獅江家計漸裕所置田租均出手剝析爨時以多予兄弟未幾兄弟又窶達復分己業益之如是者三卒年六十一

周朝陞家貧嘗充府胥母病瀕危藥須復桂陞自恨無資剗股啖母尋愈母亡方知其事兄食指浩繁家貲日蹙陞念艱難賣經承以錢助之不足益以田廬竟至棲身無所有難聊賴亦無怨焉現年六十三

上饒縣志

人物 孝友 卷之十九 四

四十六

周永全字玉光親故家貧初爲縣署鈔胥後充刑禮二科所餘紙費購市肆數間安置諸弟並爲授室年逾四十退卯而歸貲財悉予諸弟復習祖所遺方書由醫致裕諸弟有不足者仍分升斗給之生四子年六十六終

王朝檄家貧母病醫卜無功因剗股以啖母母愈十年方卒後檄產四子其第二子生而左臂有瘢痕殆天以是顯檄孝亦異事也

余陵字起峰由貢生授照磨職十齡失怙善承母歡母歿事兩兄如父屋旁構別舍講學其中名曰荆花小築兩兄亡



待寡嫂有禮惟命是從族有貧難讀書者召入塾殷勤督課之多成名去孫純清

恩貢生純濬附貢生

邱素敬事親以孝聞其母病草割股肉和藥進之一服而瘳延齡三載母亡後始爲家人偶言及焉

廩生劉雲漢字鶴翔幼聰敏工詩古文辭事雙親孝三十而亡病草時拊膺呼天以親恩罔極子職未終爲恨父母苦無術慰之其友人邑孝廉蔡君與仁正言曰顏回短命俎豆千秋汝行過人便堪壽世孝友傳必汝登也遂點頷頤

上饒縣志

人物 孝友 卷之十九 四

四十七

焉

夏之樂字連壽父病焚香祝天願以身代不愈遂割股和藥進尋就痊歸功於藥餌後因袒裼露瘡臧始知向之瘳親者蓋此操刀一割也

黃昌輝字玉瑚父病湯藥親嘗衣不解帶者累月父臨危歎曰真吾兒也解所衣羔裘被之彰其孝焉咸豐年間穿窬得金急掩以土有古掘錢弗取風嘗著枯骨記謂本草綱目旣云人骨治病未有一效又云可用年深朽骨一言未檢貽誤非輕復作洗骨禁謂



皇清律凡愚民惑於風水將已葬父母及五服內尊長骸骨發掘檢視占驗吉凶者均照服制以毀棄論坐斬罪故白虎通曰柩者久也久而不變也國子高曰葬者藏也藏弗見也程子曰他日不爲城郭不爲道路不爲貴勢所奪不爲耕牛所及其地可以葬而垂久遠焉爲後世偏聽陰陽家戒深切著明有識韙之

監生蕭世國父蘭年逾九十遇事必稟命而行病則侍湯藥朝夕不離歿居喪盡禮甲寅歲饑發倉廩以濟村貧族有艱於祀業者捐租作祭田俾縣血食堂姪某大宗子也窶

上饒縣志

人物 孝友 卷之十九 四

四十八

不能婚爲完姻延其一綫生平義行多類此

汪鈺號佑山昆季三人幼從親兄孝廉鏗遊弱冠入泮母病究心祖遺諸方書侍醫數載他人來延者亦爲診視不望其酬兄故弟髫凡事悉資籌畫分產後子姪輩或踰閑蕩檢弗忍稍寬族祠創於鏗旋病亡鈺身肩厥任經費不敷典已田欣助竟落成焉卒年七十二子汝淮授國學讀書未售雅敬師儒母病嘗藥累年有父風壽逾七秩孫五文彬附生文楷廩生文梯文杰監生文渠從九曾孫立勳弟子員立輝國學生



鄭獻修性孝友事親能作孺子容父歿獨治喪母年八十四  
多病藥餌親嘗先母數月卒易簣時兒孫環立叮嚀以敬  
奉祖母囑初家小康微貲悉歸於弟以貿易自營後漸裕  
手創腴田仍分給焉弟貧復爲營生計賃屋居之排難解  
紛當其餘事六旬舉賓筵以壽終子六長漢章從九品次  
漢階邑庠生

紀德蓋字玉成號蘭泉邑庠生性至孝親存色養無違歿居  
喪盡禮每逢忌日必舉哀邁年如故詩古文辭多受益於  
兄德蓋事塗如父前明祖壙在廣豐有未識者蓋徧訪諸

上饒縣志 人物 孝友 四十九  
卷之十九四

故老得其真塚修葺之遇忠孝廉節事加意揄揚而於廉  
尤甚謂廉乃六計之本處爲正士出作良臣蓋名教中一  
大關鍵也子二長文純邑庠生軍功保舉教諭

欽加五品銜次文淵邑廩生

鄭銓字秉衡性肫摯績學家居孝事父母厚待同懷析產弗  
錙銖較善賦詩見佳山水輒豪吟曾次曠如也素慎笑嘖  
臨財不苟有古君子風毫舉飲賓周太史湘臯欽其行誼  
於九十生辰題壽額祝焉越十餘日無疾終

鄭德均字宗元主政秉醅伯父也素習商交易嘗公平畫一



愛弟德壘輕財重義三十餘病瀕危呼壘前語曰半生拮据累千金念同胞難得百倍於財今畀若不忍私吾兒盍藏諸壘善承均志待姪無欺後壘子醕官儀部王政爲請封

諾授奉直大夫

李茂榜兄茂有貧難自給榜分已穡贍其家兄故喪葬躬承爲貸錢百緡贖兄生前所質產督姪務農以供母膳鄉里競稱爲義焉

葉桂美幼孤家窶備耕養母母病左右湯藥雖墳褻亦必躬

上饒縣志

人物 孝友 卷之十九四

五十

承如是者十餘年美固農家子未習詩書而愛慕逾常不當於今孝中求之

葉永雙咸豐八年二月賊入村父建新倉黃出走且卻且前雙偕諸兄掖之行未數武追至遂挺身禦賊被槍而亡乃父乃兄得脫虎口

張財齏與弟財殿久析居後殿亡出賞殯殮之遺孤壽崽幼且貧挈使同餐撫如己出壯爲完婚給以財產壽逾七十終

楊朝梧幼失怙母寡屢以哭父廢寢食時梧方齒亦不寢食



與羣兒相嬉戲或噉之果餌必持告母母啖然後敢入口  
長善鍼石活人甚多因母患偏口不治遂沃藥於庭終弗  
言醫居喪三載不入內房母在爲建節坊歿每出入其下  
成欷歔焉而睦族和鄰扶危濟急遠近亦並稱之仲孫正  
齋移籍廣豐中道光辛丑武進士

欽點御前侍衛僉謂天報厥孝云

應步階字彩章家貧失怙得母歡心弟曙堂甫晬隻手撐持  
擇配延師艱辛備歷弟亡遺孤三歲視如己出未幾又天  
弟婦繼之一脉摧殘肝腸寸斷慮母邁難禁暗中揮淚後

上饒縣志

人物 孝友  
卷之十九四

五十一

母物故衰毀逾常年七十終子二遇亨邑廩生

脩琨珊兄弟五居長順事雙親父故家貧撫諸季成立以慰  
母心厥後家貲日裕樂善孳孳道路橋梁捐貲踴躍鄉里  
稱仁孝焉子春魁以知府銜捐請

封典

贈朝議大夫

汪貞邦字節經父早故母程稀齡病廢貞與妻熊暨妾周環  
侍數年未嘗少間時貞已四旬尙無弱息母臨訣謂曰汝  
盡孝死而有知當多抱佳兒以遺汝母亡居喪毀瘠服闋



後連舉四子長學瑛授國學次炬浙江候補縣尉玉邑蔡  
孝廉石坪以孝友性成扁贈之

繆仕伸業儒事親孝遵兄命異居獨歸瘠產後兄貧窶讓已  
產助之自顧無餘賞意豁如也

繆觀忠國學生養親能菽水承歡兄弟窮餓家雖貧必分羹  
以食孝悌之聲達於鄉里生平亦嚴矩矱慎樞機處衣冠  
中無愧色

辜瑞來字詒子幼孤而貧爲人牧月負米養母會歲祲牛家  
汰牧豎來不復得米乞於市母終不得飽母謂來曰荒年

上饒縣志

人物 孝友  
卷之十九 四

五十二

難存活母子偕亡無益我去兒當不餓死來泣諫不從母  
既他適來戀母甚苦每輟耕隴畔欲歔流涕聞者哀之嗣  
母所嫁夫死無子凍且餒聞來年長有貲仍歸依來來得  
母甚喜盡以所積備錢奉母母日飫甘旨若忘來之貧也  
者又性嗜酒來積錢半爲酒家取去母醉詈來來噤不敢  
發聲且惴惴焉引以爲己愿母稍霽輒怡然渙然來慮母  
用不給遠備浙江華埠以病未歸臘將盡母望來切屢倚  
門來忍心動力疾至家已除夕矣母怒曰來兒來何暮來  
不敢言病汗淫淫陳緡錢几上前爲母壽母盡舉以償責



母病來跬步不離扶掖抑搔惟謹襦袴不潔必親爲滌放  
凡母所需罔弗致母告人曰來兒真孝子也母死哀毀骨  
立族人稱之如母言

繆一清性孝母王氏病治療無術清焚香默禱割股肉和藥  
以進尋愈厥後壽逾七袞無疾而終

夏秉華字鳴玉家貧服賈每於升斗間陰益貧人雖自吃虧  
不計也性至孝恒牽車遠出孺慕之誠頽白不衰道光乙  
未饑且疫母妻俱病華日侍母旁躬湯藥妻則委兒輩爲  
調理焉妻死母危治喪草草而事母益謹衣不解帶者幾

上饒縣志

人物 孝友

五十三

卷之十九四

兩越月母竟獲痊平居心氣和平臨事難以非禮干若恐  
詒親羞者子三長承成次展成辛成第三候選訓導

余純乾號金門性孝念大父早亡未獲逮養事大母及父母  
膝下依依父歿孺慕常殷凡屬貽謀恪遵弗失咸豐戊午  
賊竄南瀘乾急遣人負大母與母遁無何賊追及負大母  
者舍之走乾獨留掖坐道旁乞賊勿傷大母命願以金獻  
賊聞揮利刃裂其腰纏攫金而去未嘗傷及腹亦不攜乾  
昆季五居長友愛甚篤饒有長枕大被風子良材附貢生  
鄭浚邑南人以數奇不遇絕意科名力敦本行理家井井有



條毫無私殖事雙親待諸季以孝友聞里有資福寺歲久將傾垂涎者皆欲攘出廢寺而浚獨出費收田仍歸寺內廟宇爲重新之生平氣度寬和與物無競產業被侵未嘗與校一夕獲偷兇多方婉勸其人慚感卒從正改邪有王烈風

周之德邑南諸生性孝事祖母及父母均得歡心素慷慨義舉無不捐資晚究歧黃相延輒去全活甚多年近古稀卒

子育滋入品銜

以上新增

余錫俊號金谷性至孝母病侍湯藥衣不解帶者數月事父

上饒縣志

人物 孝友

五十四

卷之十九四

膝下依依未嘗離左右遇事皆竭力恐違意歿喪塋盡禮待弟友愛貲財不靳素好義村資福寺將傾出力倡修重建宗祠亦襄事捐金鄉黨有爭者悉爲排解生平謙讓能虧己益人不與之校最善丹青人物山水率精妙嘗爲郡守雪舟袁公繪圖頗邀贊賞謂目中所罕觀什襲珍藏視同拱璧援例授五品銜子四長國賓太學生四國敬業儒





上饒縣志卷之十九 五

義行

明

周尚文別號雙溪少穎敏以明經舉進士歷官國子祭酒引年致仕適鄉里兵燹初息丁口流離廬舍灰燼周氏數百戶幾歸烏有公慨然振起恢承先緒不數年而比閭絃誦遍野農桑遂為邑中巨族之冠又撥立田地山塘四百餘畝起建慈氏院永為萬年香火住持僧大淵公之親甥也暇復建雙溪草堂築涉趣園種竹藝茶培花植木其隙地

上饒縣志

人物 義行 卷之十九 五

一

鑿方池蓄魚數百尾時與里中高年徐松齋輩憩石憑欄清談竟日至國家之體制古今之事理黔陽之風土京都之景物一一詳說無遺聞其言者無論老幼婦孺咸忻然領受終日不倦嘗於傍晚登山遠眺見炊爨無烟者輒招來給米緡以周之遠近咸稱為萬家生佛云  
據高洲周氏族譜增新增

章敬思毛孟彰素仗義正統六年饑孟彰出穀二千五十石敬思出穀二千一百石賑濟知府金銑知縣王誼錄其事以聞旌為義民仍免本戶雜派差役五年今勅尚存  
孟彰勅名

里保





章敬端章善宗章善能皆敬思族人景泰三年饑端出穀六百石賑救恩賜七品官職宗與能亦師其所為出穀六百

石朝命立石記義今石已燬里有門額曰旌義世家舊志增

朱仲舒字克明世居水南上鄆沉密有志自恥身為齊民無

由建白乃置義田以贍俗之貧而無養者立義學以教族

之貧而無師者御史蔣欽為之記未軒黃公督學至郡造

廬訪焉子汝陽任楚茶陵歸承父志贍里族不衰尚書楊

顛有記

周烈字顯章景泰丙子歲歉傾資恤族鄰有司上其事賜義

上饒縣志 人物 義行 二

卷之十九 五

民坊於其里

章伯熙字德明邑庠生輕財好施景泰四年饑捐穀六百餘

石接濟鄉里事聞旌為義民勒石誌之今石刻猶存以上舊志

鄭鏗字水清性好善橋亭傾圮悉修除稱貸為解囊未嘗納

重利不能償者終身弗責取萬歷十有七年荒村中苦噉

噉一日需米數十石鏗獨餬敖庾以濟年九十三終承天

同知徐允德贊以睦婣任卹濟窘為心云據鄭氏宗譜增新增

徐善箕字稚調天啟丁卯舉人為人樂易好施不為苟得初

中時監司謝公知其貧送一犯來令其關說可得百金箕



詰其情理虧甚卻謝之監司益重其品葬親求善地以四十金買戴姓山旋知爲古塚而戴族赤貧原金隨分散不得償欲伐塚改葬箕語以不索原值山仍歸戴祭掃如舊其仗義疎財類如此以故其家中落次子當聘至鬻產成禮焉乙亥秋西隅火沿燒數百舍箕所居三面皆隣火巋然獨存人謂天之報其善也後爲石首令廉惠著於荆南

採鄭仲夔前  
治賞集增志

周誥號松亭嘗建義學置膳田以待學者歲饑設粥活眾後結精舍於墨山之陽與婁諒夏尙樸輩歌詠徜徉至老不

上饒縣志

人物 義行  
卷之十九五

三

倦三與賓筵卒年八十

鄭道陞字南山業儒會戊子己丑兵荒棄帖括隱居鬻產濟人子志達字隱公能繼父志好義不衰卒年逾八十

盛廷梅字景初執禮恭謹樂善好施上憲屢旌其善葉福正品端行潔葉尙高性渾厚樂施與與余激余瑄周文六余文會俱列賓筵

皇清

周十三同姪周五三康熙十五年大兵恢復信郡分兵南鄉撲剿餘孽先是周叔姪爲賊兵所獲勒令引路搜掠婦女



周實知所在佯辭不知割其股肉炙而噉之叔姪相語曰  
甯死無陷害千百人也兵怒益劓其股肉殆盡而死俱無  
後

鄭文綸字宣之順治戊子饑米價騰貴文綸出穀四百石賑  
之

鄭祚元字公允學甚富不樂仕進康熙十年設粥賑饑全活  
甚多丙寅水災又出穀救之

祝麟娶龔氏麟年二十五而龔亡終不再娶康熙十一年饑  
罄廩賑之子姪未娶者竭力畢其姍子圭湖口訓導

上饒縣志

人物 義行  
卷之十九 五

四

盛柏字鶴齡甲寅避寇居玉山有鄭某妻被賊掠貧不能贖  
柏慨贈四十金終不取償柏無子年六十六而生子壽八  
十九

王煊字幼宣年未四十而鰥不再娶生平好周人急寄居興  
安興之民目爲長者

姚應章龔大魁樸厚自持鄉鄰重之

鄭韶斗字北樞貢生性和而介積學安貧嘗受知於郡守張  
國楨後守罌吏議韶斗率同志走秣陵白之其仗義若此

余洵邑庠生積學能文性和易喜施濟邑東賣粿舖獨成石



橋一座又首成通濟橋事見邑令黃中驥記康熙丁丑歲  
歉洵穀盡買穀以濟貧乏鄉里德之

王世璧字子覲性厚謹好施與三十八都五桂山保母嶺下  
諸石橋皆獨力成之

岸生鄭祚基恭謹自持不撓勢利能緩急人尤以教子爲急  
子三皆爲名諸生

王學遜字士敏少孤於昆弟行最幼及析產惟兄所與曰予  
藉兄成立所有皆兄賜也好施與於讀書士尤敬禮之強  
年承運軍戶有貼軍溫姓者僅一子應貼十金窘甚鬻其

上饒縣志

人物 義行  
卷之十九五

五

子以應之學遜詢悉還金贖其子辛未歲饑平糶濟鄉里  
子勲進士官始興知縣迎養在署聞勲追比積欠錢糧問  
欠若干曰數百金遂命出示諭免促次子奭歸攜家貲報  
銷卒於署邑民哀泣吊祭者甚眾 贈文林郎父大經以

孫貴 馳贈如其官

以上  
舊志

汪光字月垣邑庠生性寬厚究心理學每舉易之損象訓人  
曰懲之又懲窒之又窒損我之疾自無忿無慾矣曾夜拒  
莊婦私奔移宿他家仍不明言其故精於醫不責報家貧  
病劇者捐參朮以活之亦不取直其他事好施與類此人



咸頌其義屢舉鄉飲賓邑孝廉蔡興仁貧而好學得其玉成之力於其卒也爲作傳子德遠邑庠超遠國學孫鏞乾隆己酉舉人鈔邑庠

按前志列汪光於方技緣其存心濟人求醫者無貴賤貧富請必往往必奏效良醫之名噪一時故列方技而善行反掩茲兼採蔡傳改入義行以上前志

張煥字德章監生乾隆五年郡建靈溪橋歲終難以集貲煥獨力加捐葺事九年橋圯十八年重建續捐貲二百金十六年荒歉散錢賑給鄉鄰凡義所當爲者必爲眾倡之至

上饒縣志

人物 義行 卷之十九五

六

老不衰知府福贈扁曰詎篤粉榆

汪之濬字若濱力於爲善有才幹爲眾所推康熙年間知府周建造鍾靈橋委濬董其事或勸以捐例入監笑謝之以布衣終其身子鄉賓元材簡臣元楷國書俱能繼父志勇於爲義孫煒光自有傳

陳子秀少貧爲人牧中年生二子長卽分析令各謀生益勤力耕作將以有爲也所居鄉地名長洲有木橋累興累廢秀積累十餘年費金數百鼎建石墩九座上駕以木行旅稱便又數年置租田十餘石永爲修橋費會眾立碑不許



子孫侵壞卒年八十有三

鄭養潔字孔與號克齋考授吏目天性醇厚聞族中有力學者敬而愛之置田數十畝以資膏火鼎建五柱山高勘兩地石橋城南湖塘山亭城北古塘山亭其他給絮施棺修整橋路善蹟甚夥郡守劉堯裔給扁獎曰心存宏濟年七十有八無疾而終邑令王惟一撰墓誌

余作霖字沛功授職州同知宋儒正叔裔孫於其祖讀書故址雲巖山築室置田為鄉人來學者膏火之資乾隆八年歲饑減價平糶粟垂盡復市穀以益之不能糴者貸之後

上饒縣志

人物 義行 卷之十九五

七

十六年三十年平糶如初巡撫陳宏謀匾獎曰惠遍桑梓大守陳世增給榜獎之曰如余君者可謂正其誼不謀其利之君子矣

余琳字孟玉附貢生學優品潔慷慨好義乾隆十六年歲饑傾囷平糶獨力鼎建沙溪龍門額橋一座修復土溪石橋一座鷄母山石板路百餘丈已沒人頌其義不衰

余成龍字上雲考授州同余璉字商玉龔珍字聘三俱監生歲饑出粟賑貸義所當為無不欣躍從事俱經郡縣獎勵璉不奪佃田不受佃利亦為鄉鄰所樂道黃國魁捐社穀



以惠桑梓修橋梁以利行人舉鄉飲賓

鄭正官字任賢康熙間太守周造鍾靈橋首委任焉兄弟有四人皆讀書不善理家正官撥已產數十畝以佐讀鄉鄰貧不能娶者傾囊助之舉鄉飲賓卒年七十有五

徐可學字希聖有隱德曾市山形家誇爲吉壤近山有豪家魃葬之或報可學鳴諸官可學曰生者可罪死者何辜乎聽諸越數年葬家竊視之不利私負其骸而去近都周氏有宦塚青版累累子姓奇窮人有購之者願發藏更納棺可學聞知徑詣周詢其直曰三十金可可學如數償之且

上饒縣志

人物 義行 卷之十九五

八

曰吾必爾全塋署券周子唯唯押券袖而歸踰年可學毋故擇地子弟以周舊券告可學曰吾豈利彼福地哉向之所以購之者蓋以絕鄰家覬覦耳塚落吾券而後周墳可無恙也常曰吾生平無他長只學得吃虧耳吾願子孫世世如老漢也年六十有九卒

李輝捐職州同本姓汪父元材以姨甥出繼李氏後李氏舉子有孫元材命長子煒歸宗仍俾輝爲李氏後輝敦樸有長者風足跡不履公庭好施濟鄉人德之

以上舊志

余如璋字騰雲增貢生父作霖有義方恪遵弗替族祖某家



貧年老娶妾生一子子殤妾復病璋爲延醫並給藥費得愈後卒舉子孟顯達有媳病劇求施棺詢其病可治施以醫藥病果痊盧子勝多男貧無以育將鬻妻璋曰鬻母以贍子若人道何給穀完之母子至今歡聚其他義舉多類是子三崇嵐俱有傳歲候選府照磨盧子勝之子連孫亦謀鬻童養妻歲止之資以錢穀及被帳之屬爲完婚舉二子人以爲善繼其父云

舊志前增志

盧懷珍雍正十一年捐租百石於弋陽晚港橋乾隆元年捐建邑西路三十八都羅橋九洞二十七年圯於水子覬復

上饒縣志

人物 義行 卷之十九五

九

捐金修造靈山天堂菴捐田數畝膳僧施茶三十三年減價發糶知縣劉獎以好義可風以監生膺鄉飲介賓

鄭紹瀚字繼遠穎悟過人弱冠補弟子員爲人豁達和平不計瑣屑租稅有定額瀚不論豐歉得半而止歲以爲常中年後絕意功名寄傲於山水花鳥間浩然自得卒年逾六十

以上舊志

徐炳煜字仲戊號逸山邑北鄭家坊人性仁慈好施予告貸填門肆應弗靳積券盈篋從不苛責廉得貧不能償者悉檢燬以杜後累素喜解紛家居暇日座市塵遇有忿爭



構訟者邀至家出酒食金錢寢之如是者數十年雖疊耗重貲不計焉而軫恤鄉閭如同一體雍正十三年見闔甲逋賦未清屢煩追呼慨然獨任掃數代輸以足課額催徵委員馮公嘉其好義急公目爲一鄉善士書懸堂額又連值歲歉歷經增價遠糴減價近糴以拯凶荒乾隆五年邑侯汪公文麟聞而義之賞給花紅詳報列憲以示旌獎死之日鄰里戴德者咸雙涕交沱歎惜不置焉子爲埔孫三壽三泰均國子生亦先後以義行著人皆稱爲善繼志云  
新增

上饒縣志

人物 義行  
卷之十九五

十

鄭紹瀛字亦昭邑庠生少好技勇有才畧任事不避艱險族多積欠丁糧瀛破產代爲輸納有中表爲牧牛者債逼瀛妻卽贈以牛二變價償債妻得以全年不中壽而卒戚黨咸惜之

毛振鼇鄉飲賓樂善喜施治家嚴整有法太守周鏞元獎以里稱善士扁額其孫元鏞元鋼皆諸生能守家訓自振鼇以下凡六世男婦八十餘人合爨同居未嘗分異人稱義門云

余昌字西屏邑庠生事親以孝聞其父素嚴昌允意承志得



其歡心凡甘旨供設其妻鄭氏亦佐之惟謹性樂善喜施  
乾隆辛未歲饑昌傾貲減糶無德色知縣鄒應元獎以嘉  
惠桑梓扁額嘗獨修玉邑石巖橋及本邑東灘嘴橋其爲  
人完聚室家并資貧友成室諸義舉不勝書子六俱以文  
學著

余坤少負才氣入成均屢試棘闈不利攻苦抱病遽卒先是  
辛丑歲與弟生員峯承父人壠意捐西洲莊田廿六畝入  
信江書院并增葺雲巖正叔書舍當事嘉之

徐維均字秉臣介寧事親先意承志四兄一弟怡怡一堂善

上饒縣志

人物 義行 卷之十九五

十一

治生初產薄殫力經營日漸充裕生平樂善好義凡族戚  
窘迫不惜解囊子宸鉶附貢有父風

姜士鳳字鳴岐幼失怙治喪禮如成人既葬獨臥墓側母氏  
桂撤具令歸則躡踊大號行人動色士鳳先貧後裕捐修  
大嶺水晶嶺及北谷嶺石路數十里貸穀減息荒歲減價  
不能償者還券年四十四舉四子稍長各課以經史俾曉  
大義卒年八十一長子際聖庚辰舉人其三均列膠庠

周紹漢字倬雲太學生純樸有至性事親孝養備至好善樂  
施與捐建橋梁亭道不可枚舉乾隆三十年歲大歉紹漢



減價平糶其妻朱氏亦傾奩具佐之遠近賴以存活者甚眾知縣劉埴獎以扁額後凡遇荒歲不惜傾貲子鋒監生有父風以上舊志

陳才玉樂善好施如白沙義渡洋樂時港蓮花塘仙山底等處各石橋及四十二都官山涼亭皆獨力修造後峙港石橋傾圮其子世言復改爲義渡人謂其兩世好行其德云

府志

劉文衛字康侯勇於爲義少遇相士決以必夭後近三十復途遇前相士駭曰子尙存乎諦視之曰陰隲滿面從此福

上饒縣志

人物 義行 卷之十九 五

十二

壽延長矣屢親有道若將不及遇貧困多方賑急鄉莊有善人之目發憤力學未遇晚舉飲賓目光炯炯猶能書端楷細字卒年七十九

趙繼瑞飲賓爲人心存利濟 國初閩變爲賊兵搜獲勒令向導瑞故迂道以緩其行乘賊不備陰遣同伴馳報各村令走避獲保全者數百家年至九十邀 恩賞賚學憲沈獎有扁額孫志廣嚴毅方正事繼母以孝聞訓子弟恂恂有萬石風曾孫枝柱性豪爽遇事急公尤能和睦鄰里族中罕有構訟者



鄭文棟字子樑好利濟乾隆辛未饑傾困平糶邑令鄒應元  
獎以嘉惠桑梓扁庚子辛丑連年歲歉復出穀四百餘石  
按名分賑里黨賴以存活嘗捐千餘金倡建宗祠他善行  
多類此子七長吏目顯瓏捐建圳坑橋四附貢丕顯修王  
元橋及水口墩路百餘丈五逸光附貢生建婁村舖西湖  
橋邑有公舉當事多委重焉六飲賓顯琳造黃石渡亭修  
路數百丈人謂一家好義接踵云

方質字元直鯁介端方好排難解紛鄉里有爭訟質至數語  
而平乾隆十八年布政使司廉其公直簽爲族正年八十

上饒縣志

人物 義行

十三

卷之十九五

一 卒子潤邑庠生

鄭作相字愧任歲貢生能文而好義焚券平糶諸事慷慨無  
吝色有孝丐吳元喜者童也乞食相家相詰以年雖少奈  
何不備教以自給丐潛然出涕曰我母病瞽不忍旦暮離  
也相異其言潛僱之則瞽母果在碓屋中丐方進食惟謹  
遂令丐推母至已家囑妻桂氏善養之而使丐牧牛三年  
丐母目復明轉給事桂丐亦長成力作肥相家其後相築  
室一區割田三十畝畀丐娶妻生子焉

李廷用以 覃恩授登仕郎性慷慨多善舉嘗獨力捐建規



頭溪橋年八十三卒妻蘓氏年一百零一歲學政王宗誠  
匾獎之曰百齡五世子敷榮國學向榮邑庠達材創職因  
材邑庠皆克承先志云

王奭字廷召太學生父承漕運兄勲舉進士官於外奭年少  
理家政有老成風弟貞早歿遺孤七齡撫養若已出族有  
某貧甚將鬻妻童氏奭按月給食得完娶又有某妻童氏  
因債逼改適券已成矣泣與夫別奭代償債留之乾隆十  
六年三十九年四十四年出穀平糶於石港建橋一座行  
人便之尤喜排解勸某武生息訟至感其祖父入夢里黨  
傳頌焉

上饒縣志

人物 義行 卷之十九五

十四

羅兆鏞字伯鸞登仕郎家素封積而能散於邑東北冷水池  
坂建畱耕亭施茶行旅德之乾隆十六年歲歉買穀平糶  
全活甚眾邑令汪文麟獎以高風可式額

張堦字至元國學生和易恪恭動遵禮法平居極儉約而扶  
危濟困輒傾囊無吝色個人稔爲長者雖豐歲恒多逋欠  
從不一訖理郡邑有公事皆捐貲任勞始終不苟當事重  
之兩舉優行教授熊曰華贈以詩有其言有物堪維世公  
事無私可對神之句卒年八十有三歲



李曰炳字萃熙太學生七歲失恃越數年父又棄世曰炳事繼父撫兩弟以孝友聞操家政著有成勞處里黨間排難解紛人服其肫誠靡不從每伏臘時斗米百錢遺困窮者數十年如一日常施乞丐人棉襖多至千餘領乾隆年間兩次賑饑穀數百石計靈溪橋圯議修費大僉色阻曰炳捐千金倡之橋遂以成前後計修路十五里有奇方興工大修舖路以疾劇資志而終今其子國學孔堅邑庠孔堡孫邑庠毓鍾能孜孜爲善成厥志云

周效銓字又溪附貢生於兄弟行齒最長日與諸弟怡怡聚

上饒縣志

人物 義行 卷之十九五

十五

處以承父母懼母年九十銓鬚髮皎然猶晨夕不離若孺稚人謂有老萊子風焉家素裕鄉里告貸無不應後多不能償者悉取其券焚之倡建信西橋邑貢生丁復有記子蓮邑庠生

楊文遠字碧三慷慨好施近村橋路有傾欹者皆捐貲倡修購石課工必親之歲歉減價平糶親鄰有急需薄其息以相貸後積券若干悉召其人還之子三賢傑琚皆先卒孫朝選倡修雞鳴橋設立龍潭義渡急公樂善有祖風焉余維喬邑庠生胞叔某出繼於鄭生子四貧不可支喬飲助



之并招其一子維懷歸宗愛如同胞割田構屋畀之他如賑饑造亭捐基址以廣祠宇焚借券以蘓寡人族黨至今樂道不衰

徐鏐歲貢生性穎敏幼失怙恃克自振立初堂兄士經家貧鏐父母衣食之及鏐長體親志待如同胞堂姪之機幼孤婚教如子爲置田產俾自立嘗捐田十餘畝倡興文昌閣文會教其鄉里子弟課有常試有費文風一振邑北建橫塢亭施茶又平糶施棺諸義舉慷慨無德色年七十舉飲賓

上饒縣志

人物 義行 卷之十九 五

十六

趙光輝瑞繼孫也瑞值閩變以機智活數村人命輝承祖父志凡賑饑施棺建亭修路造渡事關利濟者悉慷慨樂行尤口不言財嘗曰教子一經吾志也以故後嗣俱能鼎立云

方鈺字懷玉 恩貢生性醇謹好施與義所當爲慨然樂赴乾隆十六年饑出粟賑恤全活甚眾邑令汪文麟旌以重義可風扁六子深淮濔清入邑庠濬國學生以五子淇貴贈武信郎人謂積行之報云

林文祥字祖瑞性正直樂善好施所居地有拓壩久湮乾隆



三十八年文祥倡捐濬築疏導支流濯田數千畝至今亢旱無虞里人咸食其利

周廷玉字文琮輕財好義乾隆十六年饑廷玉出粟賑給不足走縣領常平倉穀以繼無力還者皆爲代償念切收宗睦族出貲倡修宗譜年六十一始生一子弟有子三析產日以三分歸弟已取其一焉子漢濱慷慨有父風

汪鈞字志調少業儒困於場屋性豪爽喜排難解紛周貸貧乏嘗捐建六十都鑿石圳官路亭一所名曰五里亭

盧淮字劍水邑增生餘千教諭琪之孫也承家學有聲黌序

上饒縣志

人物 義行 卷之十九五

十七

間性耿直好義待諸昆弟雖析箸事無畛畦訓後進詩文輒先搦管導之凡修建諸義舉無不捐貲倡首遇貧而棄妻者力爲完聚鄉人鬪且訟排解之立已嘗慮郡城地脈掘傷顛府縣詣勘培補兼請修建龍塔事未舉而卒人惜其志願未竟云

黃榜邑增生性溫厚睦族敦倫人稱長者遇利濟事不惜貲必力行之課子孫甚勤列膠庠者接踵孫元培領鄉薦嘉慶十八年榜壽百歲親見七代五世同堂府縣上其事請旌焉是年無疾而終



紀學寬字敷教國學生事父母以孝處鄉黨以和柄家數十年囊無私蓄姻族有急難卽往爲籌畫排解事安而後已凡邑中葺城置橋修試院建文昌宮皆捐貲勸勳不遺餘力卒年六十八歲

余紹初字時成太學生性醇樸幼年失怙恪遵母訓事諸兄克盡友恭生平杜門自守足未嘗齒市肆賙恤里黨歲歉減價平糶尤惓惓於植祀產護祖塋修祠屋臨卒猶以是囑其子焉

王類正字近方國學生少失怙恃與次伯父爽同居爽盡心

上饒縣志

人物 義行 卷之十九五

十八

教育類正亦事之如父及自操家政好周恤鄉里稱爲長者族故衛籍輪房造運嘉慶元年輪值之房貧窶類正慨然代之賙銀千餘兩公私兩安子一惟精郡增生克承父志中年始得子連舉三男旋卒子俱成立人以爲兩世義行之報云

鄭飛鵬字敬文職授州同增級

誥封奉政大夫性和易慕義而能爲嘉慶七年歲饑倡首減價平糶城鄉賴以安全十年復然郡守朱鈺獎額譽婉泛舟城南門外長清浮橋壞於洪水捐貲勸葺復助田租十三



石以資歲修又修龍潭路百餘丈四腳亭路數十丈施散  
絮衣或百件或數十件至七次今歷歷載口碑云

周毓麟  
撰墓志

章盛生家素裕性喜文士念放中讀書者艱於膏火出租田  
十石以爲學膳後積至百有餘石章氏子孫至今賴之

汪兆禧字錫繁例授登仕郎父故兄兆祺早世嫂孀居禮待  
之如母教姪成名遠年宗譜獨力重修乾隆十六七年嘉  
慶七年歲饑傾困平糶賴以全活者甚眾里中有徐姓者  
負債鬻妻禧出金四十餘兩代償畱其妻子鳳岡等克承

上饒縣志

人物 義行

十九

父志今孫曾蕃衍焉

余峯字翠華邑廩生性和易工詩文自其祖作霖世以樂善  
稱嘉慶壬戌郡城饑斗米千錢峯捐金告糶鄰邑減價平  
糶賴以延喘者數百家居人勒碑頌德有山高水長之句  
子二錫詰早故次貢生錫孜承父志慷慨好施事寡嫂盡  
禮恩撫孤姪延師督課年僅四十卒里黨惜之

余崇字雅南附貢生早失怙事母至孝友愛兩弟慷慨好施  
與佃人周某因貧鬻妻力止之免當年租穀并給錢以安  
其家初鉛山大山庵寺僧因修寺宇費缺將九都徐塢巖



竹山二障向崇家質銀二百餘金歲久不能贖崇慨然給  
還質契施寺爲業且訂毋再質他人寺僧感激勒石以記  
之他如平糶修路施綿衣諸義行不可勝舉人傳頌不衰  
焉

姜文燦字呂培國學生情殷利濟邑西諸溪橋爲入省孔道  
乾隆六十年大水圯設渡以濟行者苦之嘉慶七年文燦  
首倡醵金距舊址半里許購石重建計費一萬有奇閱四  
年始竣初費用不敷文燦憂悶欲絕其妻王氏勸其鬻產  
得金千餘悉以佐工時同里周長元與文燦合志興工日  
命子監生尙棠協理棠承父志寒暑不辭瘁所出金與文  
燦等郡守朱鈺爲作記均嘉尙焉

上饒縣志

人物 義行  
卷之十九五

二十

余曰熊國學生邑庠密堂子密堂早負俊才秋風屢躋曰熊  
少多疾病不令攻舉子業甫冠卽援例大成均熊重違父  
意遂專心於課子聘名師曲盡禮意五十初度日子步街  
步衢年末冠同補弟子員報至里黨榮之生平多善舉如  
焚券完陳廣漢葉榮之家室砌石掩叢塚之敗牯尤載口  
碑年逾六旬舉鄉飲介賓

王淑和字廷衍職授州司馬弱冠失怙事母孝色養備至有



疾晝夜在側躬滌廁踰里戚間調恤不吝嘉慶七年減膳濟饑十三年家穀罄貴糴賤糴凡道路橋亭之待修葺者叩之無不捐金以應鄉人頌其義子六奠邦成邦皆國學能邦邑庠

鄭元濶字文江太學生秉質恬雅儉約自奉而樂於施與嘉慶甲子歲饑減價平糶鄉鄰感其惠知府朱鈺獎以風追指困額夫婦俱登耄壽而終

蘇登輅字日瞻授吏職同里有積欠官糧者催料口詬於門計無所出輅憫之問應輸若何出賞如數代納邑令以一

上饒縣志

人物 義行 卷之十九五

二十一

鄉善士扁旌之

楊武鎬國學生附貢生祖望子積學植行以父年邁代理家事援例非其志也性慷慨好施與嫻黨貧乏多所波潤壬戌歲禮鎬承父命與羣從籌畫平糶鄉賴以安乙丑米價昂貴先事調劑迄以無事郡伯朱鈺獎額義充推解鎬平居言呐呐不出口遇事則義形於色無所撓年四十三卒內嫻周如蘭讚其像曰靜則安散動則剛毅蓋實錄云徐士鏜性質樸厚重樂於爲善嘗捐修北鄉窪嶺大路數十丈倡建玉和亭一所輕財好義至老不衰年七十餘舉鄉



飲教授周毓麟贈以額曰淳德稀齡

部士炤譜名克炤世以忠厚稱其祖紹富嘗獨建四都蛇橋  
及三都青石橋修烏鷹溪路數里父之槐鬻田三十石悉  
賙困乏家雖落不計炤少孤勤苦自立事寡母盡孝析爨  
後復與弟同膳歷三十餘年無間言遇鄰里構釁出貲調  
停不索償凡祖父所勸建必時加修葺郡守王賡言獎以  
耆年碩德扁及詩有由來積厚光流遠昔日汾陽今信陽  
之句卒年八十二

祝國璉字淑器國學生幼失怙事母盡孝尤敬崇師友人而

上饒縣志

人物 義行  
卷之十九 五

二十二

能敬每於歲除覘鄉里貧乏者賙恤之

姚之衢少失怙孺慕之誠至老不衰友愛兄弟尤篤摯處鄉  
黨輕財好施眾論翕然稱其惠學師周毓麟獎以題額曰  
太邱碩望

方燦國學生啟品植行撫羣從子弟與子同延師課讀備極  
周至今諸從子弟列膠庠者數人

鄭錫躬性純篤好施濟幼讀書慕古節義之風年二十娶妻  
游氏生一子書紳僅五歲而游氏卒錫躬年壯家裕義不  
再娶教其子擇師課讀不惜費長爲授室生孫今且見曾



孫矣年六十有二四代一堂閭里稱之

徐原昇性慷慨樂善不倦歲歉傾廩碾米平糶鄉里有爭訟必力爲排解己亦未嘗一詣公庭嘗建樂善亭設茶以療渴者人呼之曰義漿當事重其行舉賓筵卒年七十六歲郭克剛字潛遠少失怙恃昆季皆蚤世剛操家政事繼母以孝聞析產日腴田悉讓諸姪與人排解不惜傾囊嘉慶七年饑自食豆粥出粟平糶里人賴以全活年六十四疾革命諸子檢積年借券焚之謂曰吾無德以貽後人敢貽後人累乎言訖而終子讓珩郡廩生

上饒縣志

人物 義行

二十三

卷之十九五

程德基字時履國學生由皖歛貿遷城西敦厚好施與嘉慶壬戌饑出貲赴遠告糴首倡平糶全活市人甚夥郡守覺羅麟欲以其事達上憲德基堅辭乃己性至孝居父母喪以過哀得肝氣症成痼疾終

職員鍾元模字顯明由盱江遷城西善生殖積而能散有戚邱某身故老弱無所糊口模出百金贍其母而召其子授以生計且營聘錢爲完婚焉又張某負模金力不能償以券還之其他敦俗急公好行其德多類是

楊文林樂善好施勇於爲義郡城自府前街西街至西關大



街商民聚處往來最稱繁盛乾隆四十五年文林捐貲修砌街道數百丈平直如砥人人稱便又欲砌東街知府康惜其煩費諭止之復捐修信江書院路數十丈事載府志建置卷其他善舉類此子永祖飛翰朝銓朝鑑俱國學生舒胖字德高早失怙友愛兩弟松錦潤延名師教之得入庠序食餼家法嚴肅門內婦孺聞其聲咳輒動容屏息平生拯卹危難惠養癯獨力不足至質衣鬻器爲之廣豐令游法珠贈以壽言稱爲古隱君子之流

吳孟鏞字公時國學生年十三失怙事母以孝聞母善病鏞

上饒縣志

人物 義行 卷之十九五

二十四

侍疾不離側十餘年如一日弟幼孤藉以成立賜三黨及橋梁路亭諸事義聲素著戴文端相國以好善可風額贈子仲攀仲濟國學孫伯鼎邑庠

王瑾字懷山鄉飲介實性倜儻喜排解居鄉賑饑恤貧無德色人目爲長者同王廷召於石港建橋一座往來行人便之

陳邦麟少貧善治生家致饒裕性好施予遇里中橋亭修造之舉輒解橐以助於期功子姪輩尤能割產賑濟云

李大魁富有莊田乾隆十六年饑大魁察諸莊貧不舉火者



出存穀按戶散給不索值性儉約垢做自擁尤憫恤窮寒  
冬日製棉襖置靈溪橋上遠近無衣者往來輒與如是者  
三年其後昆多列膠庠孫朝旭登乾隆丙午武榜

彭兆明字崇福輕財尚義嘉慶七年饑饉所積穀賑給各地  
全活甚眾其他捐修橋路鄰里皆能道之後舉報鄉飲卒  
年七十七

熊德水字天一邑庠生究心水利居人種穀歲率一登德水  
倡栽晚稻躬臨田畔教以樹藝法地有羅陂童村二壩灌  
蔭青苗艱於修築慨然出材木備用割腴田坵各一犁書

上饒縣志

人物 義行 卷之十九五

二十五

為水道約里許始種穫無幾逾年倍收遠近咸師其法

王清鐸耿介正直里人忿爭鐸至立解婦女有出遊者必呼  
其夫責之人所為或非義唯恐其聞識者謂不愧彥方家  
風歿後鄉中父老猶述其風範以勗子弟其繫人思慕如  
此生平好義凡利濟事輒力行之嘗倡建斗善橋并釀金  
置田為修繕費至今賴焉長子迎江善岐黃活人甚多次  
迎淮亦醇謹孫璧運三曾孫正南俱邑庠

王朝煥字宏猷性謹厚不與外事嘉慶七年饑減價平糶遇  
貧不能殮者解囊賻之族黨稱為長者與賓筵卒



陳國泰豐於財積而能散乾隆十六年饑村人負倉穀百餘石貧不能償國泰代納輸官其濟貧周急多類此邑令鄒獎以好義足風扁卒年八十八歲

潘錦國學生性樂善濟貧周急無德色有逋欠者輒贖之人咸服其大度

盧源字遠叔國學生倜儻有才幹少理家規畫裕如父鋒近百齡甘旨無缺性急公邑中修葺城隍廟出力匡贊不憚費後郡守王賡言重建奎文塔悉其諳練勸捐督工多委任焉有祝某因逋債鬻妻源聞解橐爲之完聚通守汪正

上饒縣志

人物 義行 卷之十九

五 二十六

修獎以俊髦譽望扁額

連懷瑚謹厚慕義嘉慶七年饑村鄰缺食懷瑚減價平糶遇忿爭嘗出貲暗爲排解一時里黨重之

職員姜際熙字文緝儉而好施弱冠佐父理家政備歷艱辛倡修松嶺亭一所嘉慶壬戌乙丑歲祲熙減價平糶拯濟鄉鄰知府朱鈺以扁旌之曰廣惠非私卒年八十歲

邑增生高時茹字彙占性質直事親愛弟皆以誠弟歿撫姪如子治家極勤儉而扶危濟困輒無所靳惜嘉慶壬戌歲饑出穀碾米平糶郡守朱獎以同仁深誼扁卒年七十四



歲子四鵬翔登仕佐郎翼翔邑廩生鶴翔雁翔俱業儒

徐景岱字帝望公正和平善會計族有學田景岱掌之謹其出納以所餘增置若干畝族之貧而力學者賴焉

徐景崧富而好義敬父兄尊師長重建仕路嶺亭倡修王埠霞塢兩橋開沿坂水圳葺英村坂水壩使田疇千餘畝皆早澇有備當事重其義以登仕郎舉鄉飲介賓

金昆字振元勤儉起家虔奉陰陽文刻板印送修橋路施棺木諸方便事行之不倦年八十五雙目失明人疑果報或爽昆怡然自樂爲善益力閱五年遇梓潼神誕日目忽明

上饒縣志

人物 義行 卷之十九 五

二十七

會

覃恩賜七品冠帶卒年九十四歲

余上文性慷慨好義房祖師尹暨妣葉氏世遠失其墓文遍訪志不少懈有許某示以葬所古碑斜欹名氏猶可辨識蓋合塚也遂修葺改豎碑歲時祭掃焉又於竹山頭創建文峯寺以祀江公捐田租二十五石延僧居守之其義舉類如此

徐孔時字應中貢生尙義輕財多善舉捐田設主以醮祭族之無後者倡建允濟橋行旅便之歿時遠近惋惜有德興



人徐某繭足數百里奔其喪子作哲附貢生孫見安邑庠生

游鏞字序東邑庠生好學不倦工爲文鄉闈屢薦不售隱居課子在里閭以濟人爲事周卹困乏至老彌篤鄉人有再生之頌壽至八十六歲

鄭思敬字漢臣忠厚有至性析產後弟思恭將鬻其田敬故予以值置爲己業數年後仍還之精岐黃術製丸散以濟危急雖隆冬暮夜延之輒往不索謝子定國孫彬侯克承先志好施與曾孫如淵舉鄉飲賓元孫岳奇由國學授騎

上饒縣志

人物 義行 卷之十九 五

二十八

尉岳靈國學生

周曰庠監生父歿七月庠乃生事母孝恪遵其訓讀書期實踐不汲汲於名周濟族鄰排解紛爭盡心力以赴之鄉里目爲善人

王 楫字金鼎性儉樸樂施濟遇歲歉隣里有貧乏者輒給以米穀歲豐還之子三俱援例授職監嘉慶壬申年八十有七歲邑侯請贈七葉衍慶扁舉飲賓

國學生周光著字存和少明敏儻好義娶潘氏二十四歲而鰥有孀婦某氏少而美人勸著續娶之著曰婦人從一



而終若因我改節是我敗乃節也决不娶後孀婦亦以節終學使汪獎以額曰守義敢行邑令畢亦獎以額曰品正行端年八十乃卒

國學生盧鋒字穎文餘干教諭琪之第五子也爲人外和內剛而力行善事嘗赴莊見某負債將鬻妻鋒憫之爲出金償債妻得免又同里某貧無措欲鬻妻以圖存活鋒廉得其情如前贈金俾夫妻完聚嘉慶壬戌歲歉出穀平糶以濟隣里邑令李重其行舉鄉飲賓卒年九十有六

國學生何兆編字公召屢世單傳又爲其父暮年所生故鍾

上饒縣志

人物 義行 卷之十九五

二十九

愛特甚而綸孝友性成晨昏定省不敢恃愛而廢禮平居喜讀書好施與族戚中有貧乏者危難者悉竭力匡助無倦色亦無德色邑令鄒贈以額曰嘉惠桑梓中年病目三載垂喪明一夕夢神人以藥塗之瘡而炯炯如初生子七三子成堅國學生四子成基鄉飲賓孫養正郡庠生

國學生鄭功楷字景椿急公好善邑中有義舉無不解橐樂助乾隆三十一年郡守李建長清橋都人士因修葺無資競捐田爲善後計楷亦捐三十三都田七畝有奇四十九年郡守康建信江書院楷子能煜能燿俱監生捐三十三



都田九畝有奇以資膏火

職員潘欽疏財尚義城北有通衢歲久圯坎難行每遇雨雪  
負擔者多顛躓焉欽出貲修築二十餘里悉平坦嘉慶壬  
戌歲祲米價騰貴命子必濬必泰必泗等貴糴踐糶鄉里  
賴之

蔡正楷幼失怙恃謹身節用以訓弟姪充臬司吏潔已奉公  
每昂同曹以守法通醫術嘗施藥餌遇謝槩卻之家居喜  
利濟積穀必平糶不以歲歉居奇至今子例貢元魁孫庠  
生錫麟錫樓俱守遺教

上饒縣志

人物 義行  
卷之十九五

三十

鄭蒂貴字大元廩生兆蘭父也以貿易起家喜行利濟事邑  
西施家埤有堰蓄水日久坍塌頻年苦旱獨購石重砌農  
家賴之王家地橋舊施板易就朽爛貴憫土人釀金維艱  
復出貲易以石嘗遊雲洞寺見神像傾欹卽募工重塑遇  
貧不能殮及路斃者輒施以棺及卒猶勉其子以遵行勿  
怠云

徐藍田字採旃國學生讀書未售諳諳以孝友勗鄉子弟家  
雖豐儉樸自持遇忿爭善排解有窘迫者施與無吝族戚  
義之及卒妻丁氏善體夫志督幼孤廷恩甚嚴自爲諸生



援例成均以恪遵父行爲訓云

周敬驥字襄成生有俊才爲文矩矱先民根柢經訓金匱秦公以殿試第三人守信州郡試得驥卷賞其華實並茂拔冠一軍遂補弟子員家素裕凡腴田富莊悉歸兄效詮掌之及分析銓會計歲入所餘宜補驥錢七百緡以兄弟無質劑理令甥紀學寬代券驥終身未嘗齒及邑有公事解囊仗助無吝色搢紳重其行薦鄉飲賓年七十二卒妻盧氏體夫遺志捐田五畝零人書院出貲募人檢拾字紙二十餘年如一日子之德之緒之祐皆國學生

上饒縣志

人物 義行 卷之十九五

三十一

熊銓字公衡附貢生素以大度稱乾隆十六年饑出穀四百餘石減價平糶里黨賴以全活有異鄉數人流移其地棲息無所銓以屋居之予田以種俾無失業逋欠者貧不能償輒焚其券其他義舉甚夥先是三世單傳至銓舉子六一入邑庠三人太學孫曾百餘列膠庠者五人以爲積善之報未艾云

余珩字楚玉國學生性仁厚事兄極恭伯兄璉治家嚴肅珩隨佐理稍忤卽叱之每怡然順受兄歿繼操家杼寸絲尺帛必與諸姪均居鄉勤謹足不履公庭恤孤憐貧無間遠



近里黨薦舉賓筵卒子維鑑入邑庠維鏘援例太學鑑早逝撫姪如已出生平慷慨好義賑饑平糶人以爲克承父志云

張惟尚監生性散友睦兄弟析產後仍分財以濟其急賜卹族戚視力所能及爲之不少吝惜尤善排解懇切動人所居里鮮有終訟者

太學生吳巨水處家勤儉歲入所餘常以周貧乏嘉慶壬戌歲稔巨水出積穀減價平糶穀盡復購米於閩以繼之而減價如前鄉里全活者甚眾他如造舟渡平道路善行不

上饒縣志

人物 義行 卷之十九五

三十二

一端壬申年當事舉與賓筵

劉明普字懷周國學生樂善好義每除夕視隣里貧乏者輒遺米肉妻早卒不再娶子貢生文城有父風於五十四都建種德亭兼修橋路嘉慶壬戌歲稔出粟平糶廣豐邑侯于贈以義字指困扁孫昌齡邑庠生

貢生姚日輝字允升好善樂施遇貧乏每加周恤嘉慶壬戌平糶賑饑里黨德之嘗修五十五都銅山路五十餘丈過客稱便子利孟國學生

蘇文俊少業儒連不得志于有司因思古人有不爲良相必



爲良醫之論遂取靈樞素問諸書精究之貧者相延雖嚴  
寒暑必往不取錢物平居親宗族睦鄉鄰凡修葺橋路必  
出貲以倡焉子大伸有父風年七十舉與賓筵

飲賓王樓幼聰穎性好施壯志不遂遂入國學居家建祠宇  
修先塋倡造界石渡捐祖田四碩建通河鎮路涼亭一所  
黃竹嶺石橋一甕修鉛邑紅家橋及一切施棺濟人諸善  
事無不樂於勸勸子三長入泮次幼成均孫枝挺秀年八  
十學使王贈以修品延齡額以上前志

毛舒號翼彰廩膳生善書工詩古文詞家中貲而好施與雍

上饒縣志

人物 義行 卷之十九 五

三十三

正間饑煮粥於路者月餘隣家或終日弗炊出粟以濟稱  
貸不能償焚其券鄉里共推之子五長福臣冲齡遊泮次  
三四俱業儒五福奎幼失怙恃遵訓力田孫三羽豐邑庠  
生

吳仲仁號淑和以國學舉飲賓乾隆間購義山一片土名油  
麻坳葬家貧難購地者又於三崑西埤助地建亭廣豐知  
縣胡光祖旌以一鄉之善扁

鄒鳴岐字鳳岡乾隆間饑坑口一帶見餓孳縱橫設粥濟之  
全活無算里構豐端多方排解借券中有貧窶難償者爲



銷焚以杜後累其他義行多類此年七十二終

飲賓辜鳳居庠生辜鳳標均好義居於乾隆歲建帶湖亭標  
葺鳳凰橋橋經咸豐間蛟患獨不傾圮而亭亦至今翼然  
皆異事也

國學周沛然字作霖乾隆間歲祲泛舟接濟全活甚多邑侯  
鄒應元獎以嘉惠桑梓扁

徐徐廩貢生乾隆間助諸溪橋渡義田數十畝郡伯劉以功  
襄利濟額贈之

盧錕國學生家裕承父志於乾隆三十年續修羅橋五藝縣

上饒縣志

人物 義行  
卷之十九五

三十四

令劉以好義可風額褒焉

林開舉邑庠生素務筆耕遇有寒儒遊塾者授之餐解褌袍  
相贈館穀卽無餘泊如也性仁孝所餘脩脯悉供親子桂  
馨桂香俱入庠桂雲中副車任永豐教諭

飲賓吳克讓性慷慨乾隆間饑民多乞糶克讓約貸舊還新  
未嘗取息又設義米分給村貧郡伯汪顥額旌之

毛二南性仁而勇鄉間有虎患搏噬多人二南務除其害挾  
強弓毒矢搜巖穴設法中之果得虎視周孝侯射白額南  
山無異縣令鄒公旌以額程公舉飲賓



程廷錫務農而知義教子讀書待師敬好施道光年間建考棚捐白金百餘兩獎八品銜越數歲獨藝石梁二座於近地一名載福橋一名啟福橋所費甚鉅年五十八終子仕俊邑庠生

高繩武字維烈散品勵行博學多聞作文不趨時好厄於有司家貧設帳不計束修歲貢生葉芬善讀而貧武俾從遊曲爲成就及其門者多知名士高弟周如蘭科名宦業尤卓然可傳云

鄭功福娶妻張氏生子學江年二十五喪偶鑑世人後母之

上饒縣志

人物 義行 卷之十九五

三十五

變不再續絃素好施家僅中貲鄰里乞貸無弗與者嘉慶二十五年饑積豆粟數十石任鄉鄰分取而去多飽德焉王極字建中國學生九齡失恃事母孝鄉試主景大任先生家相契遂遊幕道署回里省親母曰與其餬口四方孰若家居課讀極遵命卻聘初父攜一分爨姪爲教讀婚配極善承厥志同居二十餘年併撥田百畝及祖遺屋與之嘉慶十七年饑運米平糶所爲義舉甚多子七長克學六燮國學生三克思增生二克裕七克生邑庠生

鄭炳勳廩膳生歲饑泛舟接濟村人多賴以舉火者從叔森



周老而無室勲出貲贊成其事宗祠廢弛亦獨力肩承以故族人感勲德歿後另設木主祀之焉學師黃飛翰李日炳有輓聯傳贊

陳繼豐性好義嘉慶間饑豐減價平糶村有貧難自葬者出值募體夫並給之牲醴或新穀將登家無貲則取禾相助從不索還年逾七十卒子于墀邑庠生舉鄉飲介賓

監生楊朝聘字廷蘭少失怙恃繼母葉氏守節請

旌建坊有女弟幼適彭姓者家貧體母心卹之並置產給彌甥佃種數十年不取其租此外建亭砌路減價救饑又所應

上饒縣志

人物 義行 卷之十九五

三十六

爲均無吝色惜年未五十而卒子三世均世堂俱國學德淵附貢生由訓導捐知縣加同知銜以子職例贈奉政大夫

鄭尙立與弟廷立最友愛嘉慶七年饑尙立商諸弟欲減價以濟村貧廷立聞命力贊行之邑孝廉李孔均作詩誌其事鄉里至今亦稱道焉

楊德旺嘉慶道光間歲旱人饑沿途設粥又念荒塋無主每屆寒食節必備香芻攜牲醴徧歷諸邱壠祭之年五十餘尙無子盡焚其借券七十舉一子八十復舉子八十一歲



終

楊武齡字疇五號鶴亭邑增生讀書好義儉約持家待人尤謙恭有禮鄉鄰匱乏者力爲周之而於族親尤加意母病湯藥親嘗衣不解帶者月餘子五均業儒孫敬恕邑庠生保舉軍功六品

貢生張澤字雨亭幼失恃事繼母順無兄弟待堂伯仲若同胞族戚有窮者每春夏交碾米相賙歲荒領廩賑之復葺橋梁平道路助建邑

大成殿文昌宮暨捐賓興義舉延師課子禮敬尤加子公輔國

上饒縣志

人物 義行 卷之十九五

三十七

學生殿場登仕郎以謙例貢生

張公輔字殿臣貢生張澤次子也以子家穀職

誥贈奉直大夫家裕好施每歲減價平糶一如父風道光間饑貴入賤出全活甚多冬則製棉衣分給寒者善醫延輒爲診視從不索酬年四十七終無子立嗣二長家穀由布政司理問加捐六品銜次家訓邑庠生授明經

李樹人性豪邁膽畧過人足跡徧都會嘉慶二十年在山東曹州府曹縣桃源地方緝獲逆匪王秉元解訊擬決奉山東巡撫保奏獎其深知大義道光元年又在福建建寧府



建陽縣訪拿會匪黃孫如等送省浙閩制軍慶訊明置諸  
法札留補用嗣以省親回籍賞白金五十並撥營護送之  
年六十一卒

庠生孫雲錦公正持心不畏強禦親朋中有無狀者亦弗稍  
狗道光五年倡建鐵山嶺亭修上下路十四年饑貧戶譁  
然錦發倉平糶安堵如常並創建宗祠葺橋梁數處幼子  
承烈邑庠生

鄭青山好周人急道光乙未饑減價平糶設粥濟人舒廷笏  
學師贈以望重鄉閭額舉鄉飲眾賓年八十七卒子四孫

上饒縣志

人物 義行  
卷之十九五

三十八

曾亦玉立亭亭

楊立參字啟行幼謹恂未冠父歿無兄弟棄帖誦援例入成  
均博涉羣書徧交知名士尤尊師儒家故殷實守祖父遺  
訓每歲值新陳不接罄廩粟減價以售貧者貸之逋者聽  
之道光十四年歲歉甚四鄉饑民多攘奪獨無至其門者  
蓋平日好施故而家亦以此中落矣友人傳孝廉作舟爲  
立家傳曰迺其廬者有三代善門之目紀實語也平居寡  
嗜好能豪飲座客常滿有孔北海風子四長敬資同治壬  
戌舉於鄉餘俱克守家範云



章錦號秀堂邑庠生舉飲賓居心仁恕里有作鵲蚌持者錦輒平分之歿後村中多故咸歎曰秀堂先生在此事當渙然釋也道光己酉倡建青雲橋旅人稱便

潘兆元字淑精附貢生少孤事孀母孝長受知於學使趙鹿泉性好義舉邑中公務無不捐貲其先世來自閩地之永春嘗遠寄金葺祠廟並增置祀田交族人規措歲荒減價平糶邑南港口河閩浙往來要津也道光元年爲倡建義渡以便行人子德嘉邑庠生德升附貢生卽選訓導孫翊莖優廩生卽選訓導翊臺邑庠生翊瑄翊彬翊澧翊梁翊

上饒縣志

人物 義行 卷之十九五

三十九

琛翊鍾翊貞翊貴俱國學生曾孫贊唐郡廩生

鄭廷彩以兄廷彪習騎射獨承家政道光乙未饑傾倉平糶不數貸諸鄰復泛舟接濟年六十舉鄉耆邑侯曹惺予贈以一鄉善士扁廷彪武孝廉揀選衛分府

王大傑字佩型號靜齋與兄弟析爨以美產讓歲餘薄貲率倡義舉刊善書債戶不能償卽焚其券又精醫術延者踵相接畧無倦容元配蔡氏啟婦道識大體病故旋丁父艱客以續取勸正色拒之年大耋猶日起誦感應篇不輟子文烈出宰湖南迎署就養疾作三沐自潔端坐而逝觀察



鍾音鴻爲撰墓誌銘

從九吳定素性好善多義舉有繆成德者貧無所依素令傭諸家息其餘貲年三十餘卽爲聘室置田廬囑令歸耕道光年間饑出穀平糶建亭於硃砂嶺以便行人子四啟緒啟績啟紹啟徽

連德義樂善好施村中有貧者多方恤之歲饑家無穀爲糶諸他境減值以售道光年間

覃恩給九品年六十有五終

鄆以嵐嘉慶道光間歲饑家無餘積往獅江買米以賑妻周

上饒縣志

人物 義行 卷之十九五

四十

氏亦好施冬製棉衣給丐者每年數十具其子榮忠克承親志人謂以嵐有子云

程星會道光二十九年冬從大橫嶺歸路遇挑草具者且哭且行詢其故答言遺白金數兩不知所在會以言勸慰而別將抵家忽于垣下拾小包解視卽某物也急追還之子文蔚邑庠生

周有默與弟有熙有燕俱業儒以抱屈各場均捐國學伯仲好義凡遇橋亭傾圮悉爲修理道光十四年饑共商平糶次年益歛各施米一月以濟村貧有默有燕先後舉鄉飲



眾寶

國學陳采昭好施與修葺橋亭無不仗助道光年間獨建義渡置田租十餘石爲善後資因名其渡曰昭生焉

姚元芳太學生弟季芳從九品伯仲共遊楚有客蕭某同載遭風物皆覆沒惟季身剩十餘金而已蕭計窮復欲赴水死元急相持囑季以金畀且勸之歸姪勝亮才亮顯亮幼失怙恃均撫成之道光年間歲游饑元先平糶季副焉凡送藥施棺諸舉靡不商行兄弟俱以壽終孝廉邵守訓爲立傳編入家乘

上饒縣志

人物 義行 卷之十九五

四十一

徐見能號京山近地李某貧難婚爲出金完娶不責之償道光年間旱斗米錢六百減價出售以甦貧者年逾五十方舉子

詹德孚邑庠生道光乙未饑出儲平糶道殣給棺葬之咸豐間有賊警奉太守鍾公勸辦鄉團軍功給予六品戊午二月賊踞廣豐德孚率團丁防堵詹昌嶺發錢米犒與賊戰殲數人後大隊至眾寡不敵退居一都之楊村賊入境焚其廬舍毫無怨言嘗建亭於烏門樓路多傾塌旁卽德孚自田遂辟田爲路計數十丈行旅便焉



張鏞字應超號東序幼失怙善事孀母母嘗語諸孫曰先意承志如汝父可謂孝矣汝曹宜則效也時諸孫幼無知莫喻其微惟昏定晨省出告反面諸常儀步趨惟謹而已生平與人無忤而頰笑不苟人亦罔敢以非禮干邑創賓興局鏞董其事所收捐分存董事處不計息鏞攜所存項轉存於市薄其息需用卽於市取本并息歸之局籌辦總建節孝坊費不足捐貲成之凡賑饑平糶恤鄰睦族諸舉不吝解囊類如此前郡伯史公欽其風裁往訪七次皆託故不見踰日袖刺詣謝亦不請謁史公於末次論閩者伺來

上饒縣志

人物 義行 卷之十九五

四十二

謝強畱一見旋以重修浮橋屬不獲辭乃鳩工庀材將所需船隻橋身闢干鏞纜銷鍊全新之一舊不仍并增修兩岸石步僅費銀七百餘金史公驚喜望外蓋曾經公估需銀三千故也年四十有八喪偶有以嫠婦某才色出眾且厚藏勸續娶者鏞婉謝之曰且休如訪有處女年五旬者再商蓋守義不再娶之意決也工書法楹聯扁額求者踵門不厭不受謝有徽商某乞書摺疊二越日走索適元配揭氏病且故鏞以先後延醫治喪鮮暇告之徽商怫然鏞起謝和淚濡墨付之旁觀者怪其不情而鏞轉爲之解說



其器量寬宏人皆以爲不可及云咸豐初元

詔舉孝廉方正郡伯史公欲舉公以應辭再四嗣張秋坪廉訪官山西鄭和甫主政官京師各有書至謂吾邑足膺是選者惟鏞史公出以示人謂公論鄉評遠邇如一若任辭而不就無以仰副

聖天子循名責實之意遂屬邑人士聯名舉報勿令鏞知而以鏞冠一郡之首尋疾卒以長男景渠官加級請封

誥贈通奉大夫以長孫庭杰官加級請封

晉贈資政大夫鏞子四長景渠道光壬辰舉人乙未會試挑取

上饒縣志

人物 義行 卷之十九五

四十三

膳錄由 國史館議叙知縣揀發江蘇歷官無錫吳縣知

縣保升同知知府道員 奏調浙江署甯紹台道以克復

松江府城功加鹽運銜 賞戴花翎次希洵考取內閣供

事三希淵優增生因守城擊賊解圍保舉訓導捐升知縣

分發浙江署處州同知奏調閩省以肅清閩省議叙保升

同知加知府銜歷署汀州府清軍同知攝理泉州府南安

縣事四景江候選鹽大使孫庭杰甲子優貢候補郎中籤

分刑部廣西司以籌餉勞績加四品銜庭斌廩貢生藍翎

安徽候補同知庭楨浙江候補鹽大使柱拔貢生



國學周士亨字弼臣生子三延師教讀每課期必市酒肴命妻余氏親治焉胞姪式金淡于名勸赴試得入邑庠弼家嘗置藥籠諸品悉備遇病無貲服藥者贈以散九歲終戒兒孫輩毋責貸極貧且給之錢米長子式鋒例授登仕郎例貢張以謙字廷斌少業儒屢困場屋中年理家事無巨細悉仰支持白叟黃童不忍欺負而於時賢尤禮敬生平設義學賑饑民葺佛寺助賓興捐修城郭創造路亭所爲義舉難更僕數邑廉訪使張思鏗贈以六行可風扁子家燹貢生家訓庠生家傑監生家紹職員俱克善承厥志云

上饒縣志

人物 義行 卷之十九五

四十四

祝顯彩家窶務農年五十後得累微金獨修橫嶺路數百丈不肯著姓名於石壽六十八以無子終

胡景山字以仰號與京嘗建東山嶺亭並修橋砌路捨藥施棺年七十郡學周毓麟贈以璞玉渾金扁嗣遇

覃恩勅授登仕郎壽八十三卒易簣時焚券金數百間里尤稱其樂善不倦云

陳垣字九宮邑庠生每把卷必以巾浣手儼對聖賢性謹厚事兄如父鄰里有忿爭者聞陳先生名自釋惟恐爲所知素喜周卹晚年家雖窶處之恬然論者謂有古君子風焉



馬士梓弟士標幼貧母歿及長以貿易起家父昆季四人分  
居不忍叔父窶令合炊爲叔娶婦所生兒女均教讀婚配  
產業則與之平分歲饑平糶賑窮債戶還金者納其母不  
取其子極貧且合本息而槪免焉年八十六終子煥仁業  
儒

游綸字美斯邑庠生性孝而仁歲荒設粥經旬以賑饑者晚  
尤嗜學所閱書籍悉加丹鉛里中師事之稱爲善士年七  
十六終

鄭肇炬事親以孝聞兼多義舉生平與廢濟窮修平險幟人

上饒縣志

人物 義行 卷之十九五

四十五

咸頌之而沙溪義渡慷慨捐租俾臨河者得以永登大願  
亦其方便一端也

鄭善明幼操儒業及長習醫族間有貧而病者爲診視且給  
以藥費人多感焉鄉鄰或作蠻觸爭務譬解不聽出錢調  
停之必息乃已學師蕭應城陳宗器嘉其行舉鄉飲眾賓  
鄭啟宇仗義疎財嘗於沙溪清水坂建亭以憇行人生平尤  
喜息爭事有謬乎情理者輒出直言相阻止由是人皆以  
公正稱之

賴錦龍與弟錦麒俱好義甦困濟饑又施棺木建茶亭修橋



路鄉里德之龍年八十七卒麒壽六十餘

監生李沾樹歲饑減價平糶鄉人訟出緡錢處息不責其償  
事親極孝誨子弟以謹飭爲先深得馬伏波遺意年五十  
三終

鄭忠精年二十九喪妻不再娶亦無外緣素習農能敬讀書  
士留飯款茶備伸禮意寒儒分升斗助之生平務吃虧不  
求利已而純嘏躬承眼看五代壽臻百歲卒

熊文楷字守貞郡庠生邑建

大成殿文昌宮首先捐助年三十二妻楊氏亡眾勸其續絃弗

上饒縣志

人物 義行  
卷之十九五

四十六

忍鯨處以終壽八十餘卒

熊文樞邑庠生舉鄉飲介賓素精醫術每診視不索酬謝病  
者感焉孝廉劉昌綸徐椿齡明經周震東均贈以詩門下  
生彭邦直爲記其事載家乘年六十三卒

李廷燮號理人咸豐戊午建橋於靈溪阪庚申城北三里許  
置亭適舉一子命曰亭生卒年五十八其兄廷瓌於亭旁  
結茅爲屋設人守之大暑則施茶以濟渴焉

國學姜天墀號朝陞兄弟友愛析產數十年仍復同居鄙君  
佩言題其第曰三賢堂蓋推姜天墀伯仲也又與修祠宇



助架橋梁年五十六卒

監生楊忠立施濟爲心道光間旱倡義舉按戶核丁日給米一溢村中無少長皆曰此楊公活我也

飲賓姜士儒字君求號立齋與妻徐氏均好施嘗購雨具製寒衣以授丐者夜則必給之燈燭又葺廟修橋平路助田租數十石作清湖寺香花費壽七十五終

高其玉字元旦號崑岡勤學授徒房姪大文貧自授書至遊泮加意栽培未嘗取其束脩年八十三舉賓筵一堂四世子二長祖愷善理家政素多義舉次祖恬舉飲賓孫鍾靈

上饒縣志

人物 義行

四十七

卷之十九五

邑庠生五品銜拔補把總鍾岱國學生增孫文浩保舉候選巡檢觀民聯衢太學生

高其採登仕郎事孀母孝待鄉黨和少年喪偶家道小康人皆以績紘勸毅然不從躬撫子女迄於成立壽八十五孫鍾奇歷任都司武璠鍾翰保舉候選從九曾孫觀盛舉武科咸謂節義之報云

國學傳文祥族大丁繁凡事一身任之每歲必延郡邑知名士以訓族中子弟並廣置祀田所收租穀平價分售雖遇凶饑村無菜色半生拮据經營悉爲宗黨而家僅中貲肥



瘠未嘗一問其公爾忘私如此子二長業儒幼武生

高其新字桂雲候選縣丞慷慨好義道光十四年饑里中議  
平糶家故貧先出粟爲富者倡賴以全活甚多子二大榮  
國學生大猷邑廩生保舉候選訓導

庠生林華春娶妻劉氏生二子年二十四而劉歿長子七齡  
次甫晬人勸續娶且有慕春爲人而以嫁貲豐厚啗之者  
謝曰夫婦恩義詎以貨財奪耶卒不復娶家貧以耕讀課  
其二子現年六十一子達珪邑庠生

鄭嘉銑字正昌號雙南存心惻怛每逢荒歲出粟平糶憫鄰

上饒縣志

人物 義行 卷之十九五

四十八

人鄭某無家無子將祖所買某屋送還且囑其族中爲之  
立嗣學師吳議以孝廉方正舉力辭不就子士準邑庠生

劉文詔字董純幼從月芳桂公遊得其大指後聞懷玉書院  
譚山長名負笈從焉一載而歸曰吾幸聞讀書作文之法  
於南豐譚夫子終身不敢忘遂設桂譚二先生位於家歲  
時伏臘必祭尤愛汲引後進不計脩金及其門者皆克自  
樹立云

姜定鈞號潛臣名孝廉際聖孫也幼時殷富篤志讀書後家  
中落舌耕餬口中年喪偶不續娶以身困各場課督幼子



世俊甚嚴俊入邑庠未幾而亡復課其孫應鐘年二十亦遊泮壽八十五終

姜定周號璜溪 恩貢生候選直隸州州判性尚義每遇荒年出粟平糶監造

文昌宮自備薪水不憚劬勞首倡賓興義舉亦然卒年七十八子世達候選縣丞世榮邑庠生孫應才燮應鴻俱國學生應陞武生

趙殿試字題鴈例授登仕郎性慈祥舉止儼恪喜談孝友節義事尤好行其德凡貧窶者貸無弗與不能償則還其券

上饒縣志

人物 義行 卷之十九五

四十九

凶年出粟平糶兵燹後施錢米以濟難民嘗有因貧欲棄婦者給之貲而責以大義遂夫婦如初卒年七十六子四孫八入邑庠國學及援例者五人

鄭秉恆號勉齋邑增生性豪爽工詩古文詞尤究心天文及兵家言咸豐六年郭守謙等招募廣義軍奉秉恆爲帥營陣旗鼓坐作擊刺悉遵指示訓練士卒凡五閱月因勞致疾而卒論者惜其未展韜畧云

曾守誠字省三邑庠生狀貌雄偉有大志讀書不求甚解喜談兵擊劍尤有至性友人鄭銑鄉試病痢守誠行坐扶持



者半月咸豐五年郭守謙等奉憲募義勇千餘守誠將右  
軍駐防貴溪克復金谿城攻建昌賊每戰必以身先嘗督  
戰攻城鎗子穿其袴大笑了無懼色嗣因兵少難於集事  
遂援例捐知府赴浙投左帥麾下思大展其智畧未幾病  
疫歸沈幼丹中丞以居心誠懇植品端方保薦而守誠死  
矣論者惜之

徐見恩號銘齋邑庠生重義輕財貧戶負債不能償焚其券  
後家雖中落樂善不倦且精岐黃術凡延醫者爲診視饋  
以藥全活甚多年逾六十卒

上饒縣志

人物 義行  
卷之十九五

五十

脩廣高仗義疏財嘗貨殖於村肆見有死難市棺者爲購槨  
殮焉素善息爭遇難排解事卽私出金錢俾歸和好鄉鄰  
由是推重之孫春魁以知府銜請

封典

贈朝議大夫

姜安邦字懋績邑庠生課徒外別無所營家貧糧無隔宿而  
矜操守飭廉隅財非應有一介不苟取焉後竟以蹇塞終  
庠生在之炳號鶴峯胸羅經史議論瀾翻評隲人倫宛如月  
旦年三十一喪妻鰥居至老毫無敗行壽六十三卒子維



城邑庠生

黃文進字啟榜兄弟六人進行三出嗣伯父而以繼產與兄弟併力而耕得增家業二十倍及析爨鬪分六受一繼產外未嘗多求焉性公正鄉里有難決事見文進至輒曰黃老三來可無訟矣顧與人言若重有所畏不能出諸口者或問故答曰前山虎我能擒之世情可畏更甚於虎進嘗從父兄搏虎於隘卒斃虎故云

余錫麟字輯和候選訓導性嗜學藏書甚富手不釋卷以故古今忠孝節義事爛熟於胸遇善舉慨當以慷無吝色嘉

上饒縣志

人物 義行 卷之十九五

五十一

慶道光間歲歉出穀平糶城廂稱道而於公事尤得力常董重建府

文廟及明倫堂工未竣貲匱同事難之麟助金三百役竟太守銘公禹民廉得其情獎以一鄉善士額麟素謹飭非公不至至亦未嘗干以私晚艱步履足不出戶庭朝夕惟以酒自娛醉則呼兒輩訓以義方或聞市井中澆薄行輒停杯大息喟然以人心世道爲憂其四女字邑東李氏李氏子當婚而病麟命女如期適李數月李亡矢志守貞迄今幾二十年善撫繼子勤儉持家蓋麟之素教使然也年六十



一卒子五純乾邑增生純禮邑庠生純沆候選訓導純激  
候選從九純洛附貢生孫十六人長良材附貢生

張玉輝號璞齋

恩貢生性至孝母病三年維持調護未嘗

少懈生平植品篤學淡於營求教授生徒裁成甚廣所積  
脩金歲荒必出其餘以周急咸同年間賊竄擾輝勸辦鄉  
團諭以大義人率樂從又復躬先丁壯防堵靈溪部署指  
揮不辭勞瘁當事深倚重焉卒年七十三

毛福綏字逢麟太學生素明大義事親能曲意承歡而性愛  
遇極貧者嘗慷慨解囊焉鄰里或相爭則力爲排解務使

上饒縣志

人物 義行 卷之十九五

五十二

渙然橋梁傾圯亦倡首修葺之子三翼錦邑庠生

徐新壽素務農最喜讀書士嘗築別墅於山中鄉鄰有假此  
講學者便欣然許焉家無子弟相從遊而待館師極忠敬  
時或欸以酒肴餽以薪米雖東主之禮西賓不是過也性  
友愛其季弟亡視姪一如己出撫育長成鄉里至今猶稱  
道云

葉芳椿字國球太學生少孤貧習商廣邑顏行拾遺金一餉  
候至午失金人果至還之其人願分半以酬不顧而去後  
勤儉至富尤好施予遇困解囊逢饑發廩嘗因修路督工



會大風揚沙拔木芳春爲羊角所扶墮三里外山谷中昇  
歸無恙卒年八十六子三長其葑太學生次其綦廩貢生  
三其荃候選縣丞孫九列膠庠者三人

王克思字慎之郡增生少穎異十二能文詩歌百韻立就性  
嚴峻言笑不苟有至戚某因事賂千金併腴田三十畝毅  
然不受爲勸息焉弟媳余氏暨甥女早寡皆竭力維持以  
成厥志鄰里相爭者得其一言亦立解壽七十七卒葬後  
有過其墓而拜者子紹曾附貢生

鄭文魁字起鈺四齡失怙善讀書家貧棄學務農常以菽水

上饒縣志

人物 義行 卷之十九五

五十三

承孀母歡壯歲家漸裕遂督仲子湘讀書於南巖雖歲晚  
不令歸一日天大雨雪魁負衣被赴南巖爲湘禦寒至巖  
外聞湘書聲朗澈分外驚喜不覺亂踐深雪中爲斷竹所  
刺血染雪赤竟忘痛楚後湘學業大進不幸夭亡人爲魁  
惜而魁卒課亞孫芳蘭以底於成平居事母孝所交必正  
人凡屬義舉無不樂爲年七十九卒

鄭滔字學水文魁長子也孝友謙和扶危濟急貧者周之病  
者藥之屢費貲財家因中落嘗曰司馬涑水有言積田遺  
子孫恐其未必能耕也積書遺子孫恐其未必能讀也不



若積德遺子孫則相繼於無窮但德豈易言吾亦盡吾不  
忍人之心以求其所安耳平居儉約自守重道尊儒綽有  
父風而樂善之心至老不倦終歲食貧弗計也年六十七  
卒感其德者持牲醴泣奠於庭蓋數十人焉

楊金宰灘頭撐渡者人呼爲金宰駝子有過客遺金百兩於  
舟中金宰拾得呼客還之客嗟嘆屢爲人稱述

徐廷恩字含之號敬山附貢授州同職幼失怙稟母丁訓理  
家政井井有條日漸充裕貲甲一鄉生平好周人急值歲  
歉遠近村莊計數十環而告糴日填於門皆平價以應全

上饒縣志

人物 義行 卷之十九五

五十四

活無算友愛素篤毫不殖私同爨親弟早故撫孤姪春齡  
飲食教誨恩勤備至道光己亥春領鄉薦逾年卽補內部  
副郎皆其栽培所致也迨析爨分貲厚春薄子尤屬人情  
所難夙甘淡泊不戀紛華嘗題燕居楹語有藤蘿雖美何  
加我松柏如常自有真句亦可想見其素志矣子五壽齡  
珍齡紹齡皓齡餘齡珍齡由邑庠生報捐例貢候選訓導  
餘均職員孫四有志有達有容有銘有志郡廩生餘俱幼  
業儒

徐餘齡字慶善

例授五品銜直隸州州同廷恩季子也性



耿而慈有父風族戚告貸立予弗靳聽其自償積券塵封  
不責也歲饑倡設義米按戶碾糶不給遠糶以繼鄉鄰飽  
德村外數里許有衝衢焉傍山臨水日就傾圯行旅視爲  
畏途餘齡目怵心惻捐金數百獨力修砌乃工未畢而疾  
作速之成不及疾大漸家人聚於寢猶指畫卧前作部署  
狀命裁葬具竣之鄉人於其卒也爲立石道傍以垂不朽  
云

劉朝興務農而好善罄生平所蓄徧砌各途或建亭以便行  
旅推其心殆欲使崎嶇世路悉就蕩平焉

上饒縣志

人物 義行 卷之十九五

五十五

姜達先家裕好善曾於近村險處獨建亭以便行人是亦義  
行中之一端也

徐敦元 例授六品銜父芳田早卒元甫舞勺弟啟暹八齡  
依母鄭居左右就養克供子職逾年稟訓操家政部署井  
然生平好周人急咸豐乙卯歲歉因廩粟告罄貴糶賤糶  
以飽饑者是年粵逆鴟張攻陷郡城元慮禍及詣玉界購  
余藐山莊爲避亂地戊午秋寇氛突逼蘇村元聞警挈眷  
運器具預赴山莊匿焉未幾賊入村鄉鄰避亂者源源而  
來及至已曠黑卧無榻炊乏糧者比比也元覺悉供給弗



斬人皆德之屈稀齡檢舊時積券中有力不能償者盡數焚之曰吾不以此累人并累子孫戚黨推爲善士厥後壽躋八旬端坐而逝

童美泰少貧以貿易起家有魚販楊某者得鱸十餘兩置擔頭息肩買肆外爲偷兒所眩覓無踪擬自縊泰憫之如數解囊年六十餘瀕死復甦誠其子孫曰楊某之項汝毋向取遇方便事自可多爲言畢而瞑子邦衛邦韜邦畧俱國學孫正方邑庠生

傅日榮家貧賃力嘗躬耕於外見荒塚纍纍慨然太息每當

上饒縣志

人物 義行 卷之十九五

五十六

寒食中元日長至必出餘貲購楮錢向墻間焚之俾免餓而年百歲卒

余兆元咸豐八年賊竄南瀘挈眷避鯉洋莊難民踵至元振粟旬餘倉廩幾罄凡遇捐款悉躬先倡率家遂中落有來告貸者仍傾囊予之未嘗稍吝人勸其盍稍爲子孫計則對以積金不如積德云

傅光球邑庠生年八十餘見族子弟貧難讀書者爲延師並給以膏火使就學焉邑中倡賓興義舉飲之金祭田宗譜嘗獨力肩承鄰饑設義米賙之卒年九十三孝廉劉昌



綸有贊

史國璋素善會計嘗倡集冬至金司其出納銖積寸累得千緡爲翺建家祠做范文正公義田法置租數百石每年分給於臘終郡伯史獎以德邁吾宗扁有紹武同姓某傭璋家積值倩息後一去不來偵已死矣他人鮮不度外置者璋獨一親訪其地焚香芻核子母璧之且爲立祀閩人至今稱焉子文翰孫兆麟俱邑庠

陳上闕壽百齡歲荒嘗傾廩以賑村貧府倅許天奇贈以推恕奇英扁弟上廷孫鐘文曾孫毓川元孫位燮俱庠生

上饒縣志

人物 義行 卷之十九五

五十七

茂才章道鴻孳孳樂善歲歉減價救饑橋渡廢亦倡捐修復年逾六袞舉介賓子向榮庠生文謨例貢

甯金聲好行善事見有家貧不能自殮者贈之棺歷年約計數百具又建永福亭永濟橋以便行旅長子玉彰邑庠生何維銘性沈默外嚴而中惠家小康趨人之急常若不及歲旱多流亡施棺數百具親視掩埋又修橋路散寒衣年幾七十舉二子人以爲積善之報

鄭蘭邑庠生樂善好施村有永濟渡助田租爲募舟子費生平見義勇爲晚舉兩子壽七十餘終長光玘監生另有傳



次光珏邑庠生

李邦慶少失怙家小康所餘食米母喜零星糶以便村貧每升較市值減二三錢慶承母志亦然素善鍼砭製丹膏丸散甚多鄉鄰求醫者無貧富悉給以藥餌不取分文遇急症雖大暑嚴寒亦必親往診視後一茶而已妻鮑氏避賊詹家山賊至麾兒走獨自危坐賊亦無敢犯僉謂慶忠厚之報云子二毓鴻廩貢生毓濼太學生

飲賓余添順少家貧力田服賈以致富爲人質樸遇善樂爲老年益篤于義建亭汪家山往來稱便並延師課兒孫輩

上饒縣志

人物 義行 卷之十九五

五十八

讀有成名者年八十餘卒子建中附貢生孫亦業儒

李毓鎮邑增生大父母俱存能承歡意嘗鬪方書製醫藥村中有病瘡瘍者出丹膏以平其患乞人必給之簞食冬製棉衣夏裁苧布爲袴按名予焉每當新舊交接間念債戶艱難從旁勸父減其息或代爲挪墊鄉里窮者卽密齎斗米送諸家多至數石生平舉步嘗看蟲蟻暑天蠅蚊嘍亦弗手驅第吹噓使去而已雪天鳥雀凍餓撒飯筐中俾相呼啄遠近以故稱善人云年三十餘歲卒

祝新吉世務農生四子幼無儋石以勤儉起家兒孫五世同



居新吉素持爲正尺帛分文無不畫一由是家人化之門  
庭內無詬誶聲婦孺無知亦悉就範村人謂有浦江風焉  
孫正國入武庠

監生陳際昌慷慨好義邑西九股松義渡捐產以垂久遠歲  
歉傾貲賑濟妻氏吳出簪珥助之夫婦壽俱八十餘五世  
同堂學使張文毅公獎以五世衍慶扁子錫周郡庠生錫  
光國學生錫齡郡增生孫德昭邑庠生德普副貢生

監生楊克勝家僅中貲南鄉四十九都烏橋傾囊獨建並置  
田租善後北鄉八都浮橋捐船隻復出金以垂久遠道路

上饒縣志

人物 義行  
卷之十九五

五十九

崎嶇者募工修之冬月則散給棉衣以禦號寒至今猶有  
挾纊示人者曰此昔日楊公賜我也年七十郡伯拖贈以  
德懋稀齡扁孫鳳池鳳儀俱邑庠生

童添盛少孤鞠於叔事叔如父及長析居謹告叔曰叔丁口  
幾倍添盛先人有敝廬得斯足矣此外竊非敢冀叔爲之  
慨然又讓叔腴田數十畝以報其勞嘉慶季年歉出錢糴  
米接濟村貧中歲學醫招卽往活人甚多未嘗索謝年八  
十八終

劉華彰號闇叅國學生隨父宦秦川歸憐族壽蘭貧助百金



使之貿易囑諸子曰此金吾所遺索取不關汝曹也壽蘭竟由此起家焉

方渙太學生二十四喪偶一子三齡一女九歲左右以攜持保抱之不可無人也再四勸續絃渙悼亡婦賢不忍娶遂鰥居終又好施仁柴嶺石橋費甚鉅渙毅然獨爲一舉千金毫無吝色

鄭養初家貧仰給樵蘇一日負薪還過高塢口渴飲泉見遺囊在地株守遺時無來覓者遂挈歸啟視則紅券白鏹爲數甚鉅婦喜曰君得此殆天貺也養曰不然物非應有得

上饒縣志

人物 義行 卷之十九五

六十

之不祥遂蚤起經往所遺處俄一人至問何爲泣而告養引之抵家還其所失某藏券分鏹相謝養笑曰滿籬尙爾况區區也弗受

鄭光純國學生一日坐庭中有丐婦攜羣兒乞於門面加鵲色憫焉詢其里居姓氏具言夫某素力耕因貧質田得值數十緡以奉翁姑而使氏挈諸兒自覓食純聞益惻留餐給米去囑夫可一來夫至貸之金令贖田回數年兒長業日進供純縹主以酬恩鮮有知者後純孫某過其村遇長老爲談及往事引至家見木牌猶在嗟歎久之



游煥字大奎性公正邑令黃中鍵蒞任數載查三十四三十  
五兩都獨無案牘異而詢焉吏以煥對令卽詣董團訪兩  
都事狀何以悅服乃爾煥曰第剖其是非耳令曰吾公庭  
讞毫不徇私尙難心帖若先生者殆漢之王彥方也欽羨  
久之然後去煥四旬時伯仲已分炊後手增田租二千餘  
復與平分族人咸稱爲義子三長城舉鄉飲介賓次學以  
弟子員貢成均三坤亦蜚聲郡庠

鄭臨波國學生歲饑減價平糶高書義渡界通衢問津者夥  
波捐租十餘石爲善後計里中玉帶橋碧雲庵亦出巨貲

上饒縣志

人物 義行  
卷之十九 五

六十一

首倡先後告成縣令重其義舉飲賓子二岳奇援例營分  
府岳靈太學生

詹炳亨妻應氏琴瑟和諧生一兒未週而應故時亨年二十  
八人勸續絃亨念妻賢且有子遂撫其呱泣永不再娶年  
八十一終孫四曾孫十有三

何文華妻林氏生二子尙穉林遂物故文華年三十家小康  
兩兒又急需鞠養族親勸其續絃不聽日挈兩兒置隴畔  
農畢則背負以歸如是者數歲鄉人共稱爲義夫焉

王士進素憐貧歲歉族有窮餓者傾倉箱分升斗賑之歲豐



間賊竄廣豐難民絡繹過該村大半無錢米進見心惻按名以青蚨相助道載口碑

覃恩給予從九品

徐賢慶字鍾敏世居峙港口道光九年隨父僑寓於羅橋未幾雙親故兄弟九人胥飲食教誨服闋娶妻曾氏舉一男越數年曾卒誓弗再娶嗣是不復理外事遇橋路坍塌古墳暴露者往往捐貲修葺之後子引機入邑庠人以爲義行之報

徐占蓄邑庠生有連布風里中傷和睦率親往力爲解紛又

上饒縣志

人物 義行 卷之十九 五

六十二

念行者之無以避風雨也出貲建亭施茶療渴並架橋設渡接濟往來後舉鄉飲介賓以壽考終

徐作賡國學生重道尊儒凡延師課讀厚奉脩金每日必虔供肴饌極其豐腆道光年間葺

聖廟作賡倡首請於縣堂庶一新厥後兒孫皆相繼成名賡亦以壽考舉飲賓焉

徐書升國學生母丁氏白首孀居

旌建綽楔復置亭一所命之曰節壽爲母立也此外設津渡造橋梁葺廟宇遇事傾囊率多善舉子六人延師課讀具成



翹秀後以年高舉鄉飲介賓

王化行號圖南邑庠生學優品粹望重一鄉許劭王烈彷彿似之嘗讀書得素問靈樞自念活人活國醫相同功於是又精倉扁術以壽考舉鄉飲介賓

徐嘉言國學生舉鄉飲介賓好行方便遇事輒傾筐倒篋出菽粟金錢以相助閭里被其恩施者眾而言無倦容亦無德色論者謂其樂善出於自然云

章馥邑庠生性謹飭樂善不倦聚徒講學因材施教而篤不計脩金鄰里饑給升斗弗吝見有忍溺女嬰者亦多方勸戒保

上饒縣志

人物 義行 卷之十九五

六十三

全無算夙精岐黃貧戶來相延爲診視弗取其貲子登羸附貢生

周錫鋒字象靈讀書屢困各場因習青囊術素多義舉見饑寒者輒解衣推食地有碧霞橋爲鋒祖球與趙某所建歲久將傾鋒繼先人志約謝氏子達倡修之費千金

黃錫功少業儒家貧以服賈致富樂善好施鄰有周某者貸錢數十緡苦貧窶計鬻婦以償功覺卽齎券書至其家爲塗抹之並贈以青蚨後舉賓筵卒年六十六子佩芬曾孫玉榮俱庠生



甯才華素多義舉歲饑減價平糶憫婦人溺女成風力挽救之一日入市見某持白鏹交易中雜銅鉛爲主人所察將鳴於官才華令毋譁出良金解焉都有同心橋建已久獨力重修並置租百餘石善後又甃通衢三十丈以便行人子毓亮太學生

趙發祥幼失怙恃家貧屋僅數椽質以供葬後倣陶朱法生計日饒卽延師課子弟讀書性重義輕財積而能散獨造高源汾水橋修高沙義渡並給散丸存活人焉壽八十四無疾終

上饒縣志

人物 義行 卷之十九五

六十四

徐兆吉樂善好施河鎖金家埧義渡捐田數十畝暨店房一所永作修費又三十四都赤石橋亦捐租善後利濟往來至今稱便

張興三生平慷慨歲饑傾倉平糶不敷爲市諸他鎮接濟源源穀升乃已橋梁亭路諸善緣亦捐金倡助年七十餘終鄭元榜素好施邑西焦石跨通衢隔於水榜倡立石橋並修孔道十餘丈又念鄉間子弟貴讀書助田租十石以鼓舞之多士百年蒙其惠壽七十終

蔡家貴字希良初由諸溪住新田家甚窶見病涉者輒架木



爲梁後饒裕有貲遂建巖垆橋雙溪橋青石橋石廳橋楊  
婆橋凡五處族間匱乏者亦出升斗以周之壽七十九終  
廖雲衢字含章例貢生有貧家某將鬻妻聞輒親往給錢數  
十緡令其完聚歲大疫村多流亡施棺殮之逋者拮据不  
能償塗借契或付諸回祿龍潭支港爲設義渡置田租善  
後俾垂久遠又印送立命全書若干卷以勸世人

徐大川字利涉年二十三喪偶謂所親曰婦人之義從一而  
終吾輩鬚眉烏容苟合遂屏絕外緣誓不再娶年七十三  
卒

上饒縣志

人物 義行  
卷之十九五

六十五

官益三號敬友素習岐黃有負病者或服藥無貲爲診視出  
丸散授之痊可後不索謝亦不責償近地高橋向架以木  
屢圯於水益三爲倡捐砌石俾得久遠併置田租十餘畝  
善後

楊性龍賣茶亭畔有玉邑某憩於中遺銀數十兩急追還之  
某感甚願酬以十金楊笑曰若利君財顧舍多取少耶卻  
弗受其人拜謝而去

熊文樞家素封歲荒屢糶義米大暑施茶行之嘗數十載六  
旬覽揆弗稱觴製棉衣百具散給貧兒七旬亦謝賀客出



贊平道路葺祖時所建涼亭助橫峯寺田租爲救溺女費  
邑中行鄉飲欲上其名以無德辭年八十六終子四孫天  
慶例貢生天善國學生曾孫開科邑庠生

鄭景昌邑庠生志高而行潔臨財不苟素守卧碑循規矩見  
懦弱者輒惻然若權勢熏赫未肯折節也居鄉以任郵爲  
先親鄰有急卽往救之事苟義所當爲亦出粟捐金不少  
各年五十九終

熊煦字日華號春臺幼警敏日誦千餘言先達咸目爲大器  
年二十餘應童軍已入彀以書法不佳黜遂薄利名崇根

上饒縣志

人物 義行  
卷之十九五

六十六

祗窮年讀書燕室中時而痛哭時而嬉笑以見志煦治家  
嚴肅見人輒迎以善氣翼扶後進化導庸愚家貧不以施  
濟爲仁而居心行事其功轉什伯於財死之日有牙儉某  
易園蔬設雞酒薄祭哭畢而去彷彿徐孺子之奠黃瓊也  
子四長志剛邑庠生次昌年登仕郎孫十人新邦登仕郎  
九廩膳生

劉唐天字世高號行健倜儻有大志樂善好施凡葺廟宇橋  
亭道路俱踴躍捐貲族親貧乏者率賙卹之遇紛爭力爲  
調停人咸服其公正生平重道尊儒延師課子最喜流覽



古格言年九十精神矍鑠出入不扶筇目能辨蠅頭小字  
妻黃氏克內助舉案齊眉均近百歲見五世同堂而卒孫  
元勳良佐俱庠生

監生汪焜字文勝武生瑞遠之父進士浙江處州遊擊安邦  
之祖父邑附生兩元武舉兩田之曾祖父也以貿易起家  
自奉極約而喜行濟人事族戚中賙卹備至有相忤成釁  
者必爲委曲解之雖損己財弗吝也歲饑諸米商多昂其  
價以取利文勝私謂其子曰歲饑不克賑由於力薄情可  
恕也若昂價以取利人縱不予責予獨無愧乎卒以活人

上饒縣志

人物 義行  
卷之十九五

六十七

事所費不貲家遂中落同邑鄭明經兆蘭嘗言汪文勝有  
隱德足以著其後昆貧何足愠云

蔣日盛號達魁距家半里許建亭以便往來歲饑赴河鎮買  
米平糶貧者德之後舉飲賓年六十三卒時呼兒積券悉  
付丙丁人尤感甚子三長庚長慶俱國學生

章維綱爲人公正素善解紛嘗精形家術所決吉凶神如著  
蔡見義舉則挺身獨任倡修金雞亭設茶療渴又葺鉛石  
山真武殿以妥神靈晚年益勵有志家聲特延名師督課  
後嗣其孫甫果遊邑庠尋食餼而綱亦以壽躡六十獲與



賓筵焉

國學朱邦楷字積懷號小園素諳大義父客他鄉課督諸弟甚力弟亡撫孤姪使之成立初楷貿易於姑蘇值江右會館事廢弛楷以身肩之經營兩載井井有條同鄉諸商販咸心折焉與友同財始終如一友某歿如數還金并厚加贍給生平尤善解紛族戚相爭者得其一言無不冰釋所助軍糈亦不下數千緡年五十三卒子慶例授員外郎楷念父簡園積學未售不令供職後錄博士弟子員以子職例封朝議大夫

上饒縣志

人物 義行 卷之十九五

六十八

繆若鏡邑庠生樂善好施鰲頭嶺古庵圯有年矣鏡出貲重修並助田十餘畝爲每歲設義漿費行人憩其地者不至望梅止渴云

繆玉林舉飲賓鄉有鰲頭嶺勢高而仄當邑北衝行人苦陟跋焉林倡首興修卒成平砥來往便之

潘時禧字書升世居婺源父廷鎮始入籍上饒禧讀書應試有聲因父老佐理家政援例入成均喜施與諳岐黃學多制丸餌以救人戚友有美舉慷慨解囊又憫逋負家困數十載無催租詞咸豐八九等年饑與弟時禮碾米平糶不



繼赴河鎮運糧接濟價值較鄰都約減其半都有銀嶺爲郡北要區咸豐初賊竄德樂禧禮竝賞築碉堡捐勇餉百名遇警集勇隨官軍赴隘堵禦知府袁雪舟書同懷宣力額獎焉郡伯仲甫鍾公嘉其急公好義題獎禧州司馬職禮布政司理問銜銀嶺堡前後距村落甚遠禧建卞置田募人往種名曰守望局並給燭施茶以便宵迷暑渴者其他善行難更僕數

洪祖發性素好施嘗建亭於本境名之曰樂安又修平道路以便行人同治元年

上饒縣志

人物 義行

六十九

卷之十九

覃恩給予九品銜

馮帝臣性仁而好義債戶貧不能償或拮据復貸益之每晨嘗攜一囊出儲青蚨數緡見貧窮者以仟伯贈之必罄方歸如是者計數十年又屢修葺華嶺路不惜重貲子二長大勲登仕郎次仕勲國學生

從九洪帝廷性仁厚嘗讓田廬於伯父眾競稱之鄰有貧窮者出錢米賙又繼先人續修華山嶺路所費甚多子八長裕琮國學生四昱暉邑庠生壽七十六卒

鄭廷琰重義輕財族有貧難度活者給錢文復遺之薪米取



求雖再四莫瑕疵也年逾八秩

覃恩給予九品銜

鄭廷輝素知大義弟早亡其婦青年守寡輝視如己女所產孤兒撫之成立壽八旬以

覃恩給予從九品

汪瑞遠字厚庵文勝子也讀書不成去而學射入武庠因父好施家中落艱苦備嘗課兒孫讀一日蚤行拾遺金於道俟來覓者還之後以子職膺

榮封家日起勤儉如初敝衣麤食晏如也幼所從遊悉加禮敬

上饒縣志

人物 義行 卷之十九 五

七十

與鄉人接亦退若不勝子四長安行太學生馳贈武功騎尉次安邦武進士浙江遊擊三安畿候選從九四安濤太學生孫十人雨元邑庠生雨田武舉

楊克麒字性舒太學生其初家窶卽好施後漸小康益能務義里中建禹門寺費缺工停麒玉成善舉復助之田遇極貧者寒給棉衣死施樁木貧窶逋負不能償取券焚焉壽逾六十而終

祝可臣性好施凡橋亭傾圯卽無餘貲必稱貸修葺之工鉅則售產業以助村某家窶將棄妻券已立矣臣聞給以金



完聚如故年八十八終

黃必義家僅小康篤信因果嘗建佛寺於龍蟠山又設儼若書院以課寒士郡南張獻基故廉訪使思鏜父也聘延西席鏜隨焉義念鏜家窶給筆硯並資之膏火後鏜捷南宮義剛八秩特贈以碩德遐齡扁子文旭邑庠生孫慶潮入國學

繆伯壽字志仁號靜齋業儒好義歲饑他戶居奇壽罄其所  
有減價以售且爲乞糶於鄰村源源接濟壽七十九終  
繆必芳字士銑素憐貧債戶不能償招之至還其券書併以

上饒縣志

人物 義行 卷之十九五

七十一

溫言相慰素務持平是非一經解譬無不渙然而訓兒孫  
則以詩禮有韋氏風年九十卒

繆若霖字沛然敏而好學童試有聲生平見義必爲非禮勿  
動苟利於人無妨損己嘗謂吾儒善行不在博施果能持  
正秉公不隨流俗作福多矣毋須推食解衣也識者避之  
壽九十餘卒

繆甲初讀書明理族黨爭爲剖其曲直是者慰之非則面相  
譴毋稍寬恕由是人咸服焉歲饑嗷嗷待哺俗豪皆坐擁  
贏餘貧民騰沸而初獨罄倉庾減價以糶眾遂帖然壽八



十一卒

繆丙煌幼讀詩書長勤耕作遵父訓不爲非分而待同胞極其友愛子姪則教之義方弗納於邪殆所謂庸中佼佼者壽六十終子雲階邑庠生

徐晉紳號傳巖讀書制藝力法先程以故童場終見剛昆季二家政獨持兄亡待孀嫂敬撫孤姪視如己出而於宗族間遇事必曲爲調停橋亭傾圮者亦倡修之咸豐元年覃恩給予登仕郎越四載卒

繆爾珍字之鑣性仁厚見橋梁傾圮貧乏顛連輒倡首捐修

上饒縣志

人物 義行 卷之十九五

七十二

多方施濟路斃則給棺木掩埋之兵後多疫施藥救人至今猶有散製清涼方傳肘後者

附貢王學熙素好施仁咸豐間村遭兵燹成焦土者不下百餘家風餐露宿滿目蕭條熙憫甚給穀數百石始定哀嗷欷石西南達廣興隔於水借伯仲商創義渡助田租善後又承祖志修祈雨山橋行人稱便年五十五終子思遠思道俱庠生

例貢李朝曦素好學有嫻某何氏子家窶讀書夙志未逮曦憫焉爲之師令寄食門下教誨殷勤未嘗取其脩脯數年



某遊泮負笈言旋曦喜其各之遂而慮無以營生也臨別贈白金俾成家室士林中咸侈爲美談焉

李朝暹邑庠生性豁達人以非禮干輒置弗較鄉鄰相競必勸以良言不聽爲出金錢陳酒食雖有損於已不顧也道光乙酉饑村多乏食設粥於路賑之復碾米作零星糶以應急需

鄭淑盛年登上壽見乞人裸裎心竊羞之每歲必製禪襦數十具以蔽其體受脛衣者不止歌五袴焉平居好讀書課兩孫篤上觀上眷均業儒

上饒縣志 人物 義行 七十三 卷之十九五

王仲陞幼失怙恃家貧傭力姪蔭葵年穉父母雙亡陞撫養成人代爲婚娶舉一兒甫晬而蔭葵又亡復爲之撫養族有被兵燹者每丁給之穀以甦其困瀕危囑子蔭蘭建亭死後告竣名曰成志年九十二終子三蔭蘭邑庠生孫七成章弟子員

鄭長森性仁厚家貧務農一日晚歸拾遺金於道詰朝往失處候之客果至引抵家款以酒食如數還焉客願分十金謝長森介然不取壽百有一歲終

余錫邦號杰人國學生讀書知大義以孝友聞生工平好行其



德嘗周朋儕賑族黨凶歲平糶濟饑道光間有葉姓者以  
田契質金歲納息租負至數十石自知累重私議鬻媳抵  
償邦得其情呼葉至塗抹其欠單葉感且泣曰夙債尙多  
不能不作此計邦遂將所質契檢還聽其他售又有廖某  
向邦討種田畝每年交租三石有奇有因田戾謀種願增  
租請邦易佃邦不之許壽八十二瀕危前一 夢彩輿在  
堂衣冠甚眾呼曰迎善人云子五長純懋浙江分缺先用  
典史次純治邑庠生三純淮浙江候補縣丞出繼胞叔爲  
嗣四純喜國學生五純涇業儒孫良生良辰良梅均能恪

上饒縣志 人物 義行 七十四  
卷之十九 五

守家範

齊廷高妻徐氏生二子年二十五病故廷年二十七誓不再  
娶撫養兩兒終其身無敗行鄉人以義重之現年七十四  
楊德九個儻仗義歲侵率先平糶又免債讓租施棺散藥置  
義山以埋路斃世居邑之五十四都與五十二五十三等  
都毗爲禁山隘口通閩要津每至春夏山流暴溢過客多  
自崖而返因謀諸鄰境就通衢處架木橋四座行者德焉  
咸豐元年都人士上事於太守王公以樂善好施額贈之  
盧評梅號吟圃邑庠生性好施予有呼庚者輒相應素善解



紛姻親構釁隙得一二言卽渙然冰釋有魯仲連風以故  
義聲滿於城市道光五年縣令陶公請董建

聖廟並襄修邑乘十一年郡建

大成殿亦與役二十二年督修郡垣太守姚熊飛上其勞績獎  
八品銜而大尹月舫麟公葺大堂亦延梅營度薪俸禮儀  
概辭不受益欽仰焉後以胞姪定勳貴

馳封奉直大夫子六壽七十九終

郭金友候選縣丞堯階祖也與兄玉昆同生長耽經史淡  
於科名習岐黃及叢辰家術不受人酬性溫厚處世無爭

上饒縣志

人物 義行  
卷之十九五

七十五

有稱貸者必給其求不能償亦弗之取壽九十六無疾終  
里人稱五福先生云

樓建崑號秋浦同知銜習商河鎮嘗客錢塘滬瀆間喜買靈  
應丸分送救人咸豐末避亂邑北之繆源見山路崎嶇捐  
貲葺之行者稱便

郭定邦字有信號蓮浦國學生幼貧力穡長就賈客遊吳楚  
閩粵間貨殖屢中自歎未習詩書務尊師以教其子邑中  
向無賓興館承兄蘭陔命捐蚨洋千圓首倡兄亡遺孤二  
命與同炊撫如己出漆產數倍悉平分之素明大義自軍



興以來助餉約五千金又立學田置祀產止鬻婦拯溺嬰  
修路建亭散衣施藥設普濟義渡甃澎塘石橋嘗語人曰  
諸凡義舉內助居多蓋指妻楊氏也壽七十五終子三長  
鼎勲候選訓導次鼎成例貢生孫五長正綱次正常均博  
士弟子員

郭經邦字永清號蘭陔候選理問幼苦家貧嘗輟耕歎曰吾  
先高祖妣茹荼守節祖佩玉公一生教讀父遜齋公安分  
守已顧長窮困若此乎乃棄農服賈稍得微貲以贍家用  
兄弟五長二四俱早世與五弟蓮浦友愛貿易獅江積財

上饒縣志

人物 義行  
卷之十九五

七十六

巨萬而待姪如兒延師課讀厚出脩金不吝也爲人慷慨  
仗義念邑向無賓興館命弟蓮浦捐千金倡而立學田置  
祀產暨修橋砌路設義建亭諸善舉亦踴躍爲之倡子二  
長鼎元卽補都司次鼎雲候選從九孫三均業儒

黃憲通溫厚和平一鄉稱善村有靈溪橋屢修屢圯費數千  
金通捐貲甚鉅畧無倦容里俗素驕悍每荒歉輒洶洶然  
通以小姓居其間出錢周濟又開張市肆白米紅鹽悉相  
假貸弗責償由是雖狂夫亦望而起敬呼之曰黃公道光

丙午授



恩者子二長元仁保舉州同請五品

封典

李廷珪號採蓮國學生父故理家視弟廷欽廷杰廷楷等質均美延師課之讀禮款殷勤珪以身率羣弟善事悉爲欽等亦雅體珪心孜孜力學有列膠庠者

繆福寬性剛正遇事敢言林中無巨細咸折衷焉素多善舉建集賢亭於本境並葺路修橋賑饑蠲欠後以出力捐貲給予軍功六品人尤義之

附貢余錫孖字子成號承齋與拔貢生郭光啟善因延光啟

上饒縣志

人物 義行  
卷之十九五

七十七

課其兄子純溥及子純泮備極敬恭事寡嫂游氏如母家政稟命而行嘉慶七年饑出穀數百石以濟凡造

文廟

文昌宮暨賓興義舉捐貲悉鉅又助祀產以奉祖先尤爲不忘厥本焉

余純泮號芹香附貢錫孖子也幼從郭光啟受句讀稍長遊外父王惟賢門詩文書法皆清麗拔俗而屢試不售遂援例入太學生平篤實謙和尤得力於慈訓道光十四年饑承父志出穀二百餘石濟之惜享年不永未得擴其善念



云

監生周有熙字思敬事親以孝聞昆季五人懽然友愛初家本中貲後經積累遂益饒裕性輕財重義凡族親告貸無不解囊積券既多召其人還之否則爲焚於火歲饑按丁給米每屆臘終凡貧窮家出錢相助里有龍津橋路通八閩獨力告成復經重葺而鯉陽庵山嶺路極崎嶇亦修甃數百丈先是祠中少祭產血食不敷熙與族人仰高等倡首捐金權其子母增置數十畝永奉馨香尤急務也

周丕顯字耀宗號穆齋增廣生丁酉堂薦額溢見遺人咸爲

上饒縣志

人物 義行 卷之十九五

七十八

顯惜顯則怡然也父老理家遂棄舉業援例入成均構館於室旁游息其中集羣子弟誨之曰所貴乎讀書者在身體力行非爲弋取科名計忠孝節廉立身大本汝曹可弗念諸性剛正家法甚嚴門內婦孺聞警咳輒斂容屏氣而心最憐貧族有急者率按丁多給以米錢咸豐間饑兩次平糶全活甚多近地柴嶺橋圯於水亦捐貲倡葺之往來稱便子四汝霖浙江縣丞鼎博士弟子員謙釗國學生周有烈字思忠號從吾性穎悟博涉羣書旋以理家援例入上舍每臘終族人告匱者施與不吝道光壬辰癸酉饑減



價平糶全活甚多素工書法星期地學皆精通有求輒應  
子至健國學生

周埏字仰高幼失怙恃理家井井有條族親貧乏者慷慨周  
之宗祠缺祭產資用不敷埏與族人丕顯等倡首捐貲經  
營積累增置腴田數十畝遂修葺家廟鳩工庀材躬爲督  
率年七十孫子森羅嘗舉古今來得失成敗爲訓而於先  
世譜牒則戒後生輩須謹視以俟續修子二長培蓮次培  
蘭孫景瀛例貢生

徐嘉澍號澤春幼警敏舞勺時卽從父經營財產暇則力學

上饒縣志

人物 義行

七十九

卷十九

與邑中姚海嶠胡一山等同受知於顧文宗尋以家事援  
例成均後舉鄉飲素曠達勇於行義

文廟城垣諸大舉悉躬先倡率並造西堡橋修香溪嶺暨施茶  
惜字排難賑饑生平自奉極菲非常若寒畯五世一堂規模  
整飭遂使百十餘口之家驩然相接日在太和元氣中督  
學何棣珊題福備椿庭額贈焉嘉澍有弟二蚤卒無嗣命  
兩子以承其後而螢窗課讀遊泮聯翩鴻案延禧舉家敦  
睦寶禹鈞教以義方張公藝惟書忍字何以加茲

徐佩璋附貢生仗義輕財歲荒減價平糶村中死者不能殯



購木殮之道路橋梁亦捐金修葺年逾六十終

監生鄭光玠幼失怙母督弟稚家政賴堂兄光斗力爲支持及長孝友兼盡性公正村中數百戶事無大小率聽指揮凡屬應行爲解仔肩獨任其尤著者重修靈溪石橋與兄光斗弟光珏悉心勸助功藉以成太守士良史公嘉玠好義適母壽七十題畫荻凝禧扁贈焉玠得父遺書精堪輿術戚友相招動扞吉穴望弟成名延師課讀脩金館穀必厚必豐弟光珏亦克承兄志庠序蜚聲肝膽照人士林推重一時競稱爲難弟難兄不幸年方壯盛相繼病亡論者

上饒縣志

人物 義行 卷之十九 五

八十

惜之

劉元勳字天杰號冀五邑庠生自祖父以來世貽忠厚勲善承先緒安分讀書任卹睦鄰鄉鄰引重素剛方遇不平事輒正色厲聲無稍徇庇而量極寬宏家祇中富每逢義舉樂爲襄成卽逋負家有愚頑者亦但多方告導未嘗一訟於官焉生平念切本源謂敦宗必須收族因與堂弟庠生良佐等訪系東甌會修譜牒彈心纂輯派別支分尤屬仁人孝子之先務也年七十三卒子四幼長庚業儒

游蘆邑增生素樂善嘗捐貲倡建本鄉永安石橋以便行旅



憫女孩遭溺猝難徧拯與友合梓濟嬰寶筏廣爲流布復  
明大義咸豐間奉諭辦團卓著勞績經屈道憲保舉五品  
銜性嗜學工詩賦善書士林咸嘖嘖焉子二長錄勲增貢  
生次鼎勲邑庠生

游肇楫邑庠生夙好義曾捐金合建毛毬石神祠咸豐間恪  
遵憲諭辦理本都團務著有成效經屈道憲保舉軍功五  
品晚歲以齒德兼優獲與賓筵學師贈以德美金玉堂額  
家居偶暇輒臨池寄興兼善岐黃活人無算鄉里迄今德  
之

上饒縣志 人物 義行 八十一  
卷之十九五

余錫鏞太學生幼失恃事繼母以孝聞素樂善佃某因子多  
且稚積逋甚重將鬻妻以償鏞聞心惻畀以多金并爲撫  
育諸子歷十餘稔佃某家室賴以完聚迄今猶稱道弗衰  
王朝靖邑東人因喪明未能讀書家僅小康勤儉致富族戚  
有困乏者率賙之祈雨山路爲江浙通衢水壤數丈獨力  
修葺先世榮公祀歲僅入穀十碩零所費不敷族知靖善  
居積舉以相委靖亦毅然受每歲祀費貸以已資所收祀  
穀概爲生息經理十餘年添置八十餘石祀事賴以不墜  
年六十卒子學章議叙九品孫思贊監生

以上  
新增